

萬 有 文 庫

第二集七種

王雲五主編

宋 詩 紀 事

(五)

厲鶚曰瑣輯

商務印書館發行

宋 詩 紀 事

(五)

輯 瑄 日 馬 鶻 厲

國 學 基 本 叢 書

萬有文庫

第二集七百種

總編 蔡元培

王雲五

商務印書館發行

宋詩紀事卷二十五

晁端友

端友字君成。迴四世孫。无咎之父。第進士。為杭州新城令。有新城集。

葉石林云。外祖晁君成善詩。蘇子瞻所謂清厚靜深。如其為人者也。

黃庭堅撰晁君成墓志銘。晁氏世載遠矣。而中微。有諱迴者。事某陵為翰林學士承旨。以太子少保致仕。謚文元。生執政。開封晁氏始顯。君成曾王父諱迪。贈刑部侍郎。王父諱宗簡。贈吏部尚書。父諱仲偃。庫部員外郎。刑部視文元母弟也。君成夫人楊

氏。生一男。則補之。以元豐甲子十月

乙酉葬。君成于濟州任城之呂原。

宿濟州西門外旅館

寒林殘日欲棲鳥。壁裏青燈乍有無。小雨悒悒人不寐。臥聽羸馬齧殘芻。合璧事類續集。

馬處厚席上探得早梅

嶺梅何處早。雪裏看芳菲。北陸寒猶在。南枝春已歸。曉妝初見妒。殘角未成飛。引我江頭夢。清香憶滿衣。

瀛奎律髓

錢唐 厲鶚 輯
吳 毛德基 勘定

甘露寺寺有石如臥羊謂之很石

北固山頭寺風煙昔縱觀臥亭秋石很環舍海濤寒越舶樓前聚江楓戶外丹最宜清夜月虛閣憶盤桓

早行

馬上雞初唱天涯星未稀驚風時墜笠零露暗霑衣山下疎鐘發林梢獨鳥飛遠峯煙靄澹迤邐見朝暉

以上文翰類選

齊廊

廊字公廊會稽人舉進士歷三司度支判開封府出爲江淮轉運使積官至光祿卿祕書監卒

寶林寺

峯勢聳如龜簷牙照錦暈路盤危磴出僧觸斷雲歸萬井分塵界千巖列翠圍浮生任多事到此合忘機

越詠

如歸亭

翬飛綺構成賓至得佳名岫列千螺出江涵匹練平吟看客帆度坐見釣舟橫獨倚雕闌外令人心骨清

吳江縣志

李奉世

句

珠鞍昔御恩猶在玉璽親扶事已非

石林詩話神宗皇帝天性儉約奉慈壽宮尤盡孝道慈聖太后嘗以乘輿服物未備因同天節作珠子鞍轡爲壽神宗一御于禁中後藏去不復用一日與兩宮幸後苑賞花慈聖輦至神宗卽降步親扶慈聖出輦屢卻不從聞者太息慈聖上仙李奉世時爲侍郎進挽詩云蓋記此二事神宗覽之泣下

曰路按二句孔平仲談苑作王存但小異耳今兩存之

李行中

行中字無悔本雪川人徙居松江高尚不仕獨以詩酒自娛晚治園亭號醉眠東坡居士與之遊賦佳人顰梅圖

蠶眉鴉髻縷金衣折得梅花第幾枝顰盡餘香不回面思量何事立多時

中吳紀聞云

意尙深遠

自詠醉眠亭

簷低檻曲莫嫌隘地僻草深宜晝眠代枕暮憑溪上石當簾時看屋頭烟倦遊拂壁畫山逕貪醉解衣還洒錢一水近通西浦路客來猶可棹漁船

寄韓憲仲廷評

野徑荒亭草沒腰一眠聊以永今朝放懷不管人閒事破夢時聞夜半潮冰柱劉叉詩未厭金龜李白酒

難招知君有意尋安道。咫尺何時動畫橈。以上至元嘉禾志。

韓宗文

題李無悔醉眠亭

得酒休論飲得仙。醉中遺物爲神全。世閒反覆無窮事。吏部難忘抱甕眠。松江府志。

蘇 枕

題李無悔醉眠亭

趁陽渴鹿背清泉之子名。亭取性便適意中。閒卻無事期君忘醉亦忘眠。松江府志。

晁端佐

題李無悔醉眠亭

蕭灑松陵江上亭。醉來一夢遊雲屏。生前笑語君須惜。世事紛紛不用醒。至元嘉禾志。

關景山

關字彥瞻。景仁弟。舉進士。

題李無悔醉眠亭

杜老顛狂尋酒伴。經旬出走只空牀。輸君縱飲還高臥。長有生涯在醉鄉。至元嘉禾志。

毋 沆

沆太常少卿。

遊王官谷

不污唐家亂，蕭然表聖居。泉聲與山色，相得共清虛。熙寧戊申歲冬至，虞鄉縣令俞充書。王官谷集。

王觀

觀字明叟，如皋人。第進士。哲宗朝，擢右正言，進司諫。徽宗朝，遷御史中丞，改翰林學士，安置臨江軍卒，入黨籍。

望日與諸公會于大慈，聞海雲山茶合江梅花開，遂相邀同賞。雖無歌舞，實有清歡。因成拙詩奉呈。野寺山茶昨夜開，江亭初報一枝梅。旋邀座上逍遙客，同醉花前澁豔杯。秀色霜濃方潤澤，暗香風靜更徘徊。仙姿莫遣常情妒，不帶東山妓女來。成都文類

胡宗師

和王公觀賞海雲山茶合江梅花

錦水黃金密印開，東南時望滯鹽梅。得隨劍外同爲客，幸逐花前醉倒杯。白玉蘂高枝瘦碧，燕支萼嫩葉低徊。綺羅不識清詩骨，須趁春風摸石來。成都文類

徐彥孚

和王公觀賞海雲山茶合江梅花

萬蘂山茶傍臘開，一番春信入江梅。追遊共按黃金轡，縱賞還傾白玉杯。濃艷迎風香斷續，疎枝橫月影徘徊。隼旗不負登臨興，更約攜朋載酒來。成都文類

吳師孟

師孟字醇翁成都人

成都記吳師孟張商英張唐英善書天覺喜草而不工東坡戲之所謂脫帽風流餘長史是也

和王公觀賞海雲山茶合江梅花

何處珍叢最早開。海雲山茗合江梅。忽傳詩帥邀膚使。不用歌姬侍宴杯。曉豔鮮明同綺靡。晚妝清淡奉徘徊。此時文酒風流事。豈似臨江放蕩來。

成都運司園亭詩 和韋質夫

翠錦亭

東閣治臺政。西堂備燕飲。介于二堂閒。華構饒花品。紅紫鎮長春。四時如活錦。公暇一繩牀。上有通中枕。茅菴

結茅爲圓屋。環堵不可牖。齋居如雁堂。廣長纔六肘。深藏子猷竹。不植陶潛柳。勿起滅定心。宴坐空諸有。
以上成都文類

徐介

介陽翟人官屯田

過杜工部墓

水與汨羅接。天心深有存。遠移工部死。來伴大夫魂。流落同千古。風騷共一源。江山不受弔。寒日下西原。

王得臣塵史熙寧初調官泊報慈寺陽翟徐秀才出其父

屯田詩清苦平淡有古人風其過杜工部墓一首云云

胡璞

璞字器之南平人熙寧三年進士

經采石渡

抗議金鑾反見讐。一杯蟬蛻此江頭。當時醉弄波閒月。今作寒光萬里流。

輿地紀勝蘇子瞻見之

疑唐人作歎賞不已

陸佃

佃字農師越州山陰人熙寧三年擢甲科徽宗朝仕至吏部尚書拜尚書右丞罷知亳州卒入黨

籍有陶山集

送人之潤州

丹青太守舊名卿。騎竹兒童夾道迎。醉尹笙歌添酒病。謫仙風月苦詩情。江湖天地農桑早。水竹人家枕

簾清。白首懷君心未已。夢魂猶繞鳳皇城。詩林萬選

贈別吳興太守中父學士

蓬山仙子任天真，乞領南麾奏疏頻。金鎖闕邊辭黼座，水晶宮裏約朱輪。公庭事簡煩承掾，齋閣詩多泣鬼神。莫爲行春戀苦雪，蠻坡揮筆待詞臣。瀛奎律髓

句

棠棣行中排宰相，梧桐名下識韓家。

能改齋漫錄：韓子華兄弟皆爲宰相，門有梧桐。京師人以桐木韓家呼之，以別魏公也。子華下世，陸農師作挽章云：蓋紀實也。

鄧忠臣

忠臣字謹思，長沙人。熙寧三年進士，仕至考功郎，坐元祐黨廢。有玉池集。

考校同文館戲贈子方兼呈文潛次无咎韻

五年坎壈哀南方，江湖魏闕兩相忘。洞羅巖桂寡孤芳，月潭風渚儔漁郎。單闕孟夏草木長，望都樓觀鬱蒼蒼。忠臣：熙寧六月，以宗艱去國，丁卯四月還省。誰令焚芟辭楚狂，復來上君白玉堂。黃門戟曜羽林槍，未央引籍

班胡羌，雲屯錦膊馬斯臧。大官日膳瓊爲糧，追隨威鳳鳴高岡。豈敢偃息復在牀，投鈴歸休下殿傍。衛士傳詔來如驪，館閣外西城隍。書臺迫遽不及裝，顛俊士集要言揚。得弓勿問何人亡，趙璧旣入秦城償。

穎脫喜見錐出囊，同人于野不擇鄉。峩峩羽翮整顏行，金闕玉勒皆驢驕。伯喈懷牘望金商。天啓魁梧奇

偉，值子房。文帶家令數術應帝王。无咎三英粲粲日爭光，我輒與之較雌黃。芳菲滿室蘭生香，坐堂月久秋

氣涼。將軍思歸歌撫觴，子方倚梧目送雁南翔。想見葭葦水中央，洞庭河漢遙相望。香楓葉老赤染霜，感

槩少日七步章。長安城西約鄭莊。予與子方先告文潛天啓嘗有此約。牽率不往有底忙。人生可意乃吉祥。快馬
劃過小苑牆。入門爛醉銀瓶漿。秦箏趙瑟喜高張。同文館倡和詩。

邯鄲道中夜行阻風

欲瀉懸河雨。先號拔木風。問津厖吠處。覓路電光中。徒御憂羣盜。兒童笑拙翁。當知步兵哭。初不爲途窮。
瀛奎律髓

蔡京

京字元長。興化軍仙遊人。熙寧三年進士。歷尚書右僕射。轉司空。累封魯國公。加太師。徽宗朝凡
四入相。靖康中。再被貶。死于潭州。

清波雜誌。蔡京死潭州。數日不得殮。棄葬漏澤園。以青布
條裹屍。初宣和年間。京師染坊有名太師青者。茲其識也。

題保和殿壁

瓊瑤錯落密成林。檜竹交加午有陰。恩許塵凡時縱步。不知身在五雲深。

侍宴保和殿命賡補成篇

保和新殿麗秋暉。恩許塵凡到綺闈。雅興酒酣添逸興。玉真軒內見安妃。

見安妃像

玉真軒內暖如春。只見丹青未見人。月裏嫦娥終有恨。鑑中姑射未應真。

雲湖雜記。東都宣政閉禁中有保和殿。殿西南廡有玉真軒。軒內有玉華閣。即安妃妝閣也。妃姓劉氏。入宮進位貴妃。林靈素以左道得幸。謂上爲長生帝君。妃爲九華玉真安妃。每降神。必別置妃位。畫妃像。其中每祀像。妃方寢而覺有酒容。是時羣臣唯蔡元長最承恩。遇嘗賦詩題殿壁云云。侍宴于保和殿。上令妃見京。先有詩命京賽補。成篇須臾。命京入軒見妃像。京又有詩云云。已而至閣。妃出見京。勸酬至再。日暮而退。

與范謙叔飲西園

一日趨朝四日閑。荒園薄酒願交驩。三峯崛起無平地。二派爭流有激湍。極目榛蕪唯野蔓。忘憂魚鳥自波瀾。滿船載得圭璋重。更掬珠璣洗眼看。

墨莊漫錄。范致虛謙叔。與蔡元長相忤。久處閑散。宣和初。自唐州方城召還。提舉寶籙宮。未幾執政。時元長以五日一造朝。居西第。乃與謙叔釋憾。一日觴于西園。主禮勤渥。元長作詩見意。三峯二派。指王黼林靈素輩方盛也。

恭和御製己亥十一月十三日南郊祭天齋宮卽事賜詩

雪晴至日月初南。帝舉明禋祀事嚴。萬瓦溝中寒色在。一輪空外曉光暹。雲和龍軫開冰轍。風暖鸞旗拂凍簷。共喜天心扶聖德。珠璣更誤寵恩霑。

題神霄宮

下馬神霄第一回。時空宮殿九秋開。月中桂子看時落。雲外仙輶特地來。以上揮塵餘話。

詔賜南園贈親黨

八年帷幄竟何爲。更賜南園寵太師。堪笑當時王學士。功名未有便吟詩。

中吳紀聞。南園乃廣陵王舊園。中有流杯旋螺亭。亞于滄浪之景。王黃州爲長洲時。無日不攜客醉飲。嘗賦詩云。他年我若功成後。乞取南園作醉鄉。今園中大堂。遂以醉鄉名之。大觀末。蔡京罷相。欲東還。詔以其園賜之。京卽以詩贈親。蘇云。黃州之詩。不過寓意耳。京遽以無功名請之。黃州雖終爲黜臣。其名與天地同不朽矣。

寄子攸

老嫗身心不自由。封書寄與淚橫流。百年信誓當深念。三伏征途盍少休。目送旌旗如昨夢。心存關塞起新愁。緇衣堂下清風滿。早早歸來醉一甌。

獨醒雜志。燕山招納之舉。多出於蔡攸。王師敗于白溝河。元長以詩寄攸云。稍傳入禁中。徽宗命京進呈。上閱畢曰。三伏征途。不若改作六月。王師觀此。則是舉非惟當時人知其非。雖其父亦知之矣。

別寵姬

爲愛桃花三樹紅。年年歲歲惹東風。如今去逐他人手。誰復尊前念老翁。

揮塵後錄。蔡元長既南遷。中路有旨取所寵姬。慕容邢武者三人。以金人指名來索也。元長作詩以別云。

句

龍燭影中猶是臘。鳳簫聲裏已吹春。春帖子 西清詩話。

蔡卞

卞字元度與兄京同年登第。王安石妻以女。因從之學。元豐中。以薦爲國子直講。徽宗朝。累擢知樞密院。加觀文殿學士。拜昭慶軍節度使。政和末。謁歸。上冢道死。紹興初。追貶單州團練副使。

贈華陽法師

師到華陽洞。仙花幾度開。祇應常救物。卻遣世人來。茅山志。

汪泌

東湖其樂堂

臨海城東湖。氣象清且奇。無風綠色淨。十頃澄琉璃。中有其樂堂。今其名者誰。或人答我問。太守下車時。訪民所疾苦。民曰水最危。其水或暴至。城壞民流屍。公謀得上策。壘石金城基。外遺數百家。室屋鱗參差。水至無所障。適與漂溺期。又欲隄其東。苦乏土石資。開湖足取用。隄勢橫虹霓。湖光占空闊。物從鑑中窺。紫翠前後山。環列如屏幃。結屋就虛曠。與俗同遊嬉。太守宴堂上。遊人歌水湄。歌云從公來。除患補瘡痍。況有此壯觀。不樂復何爲。有如登春臺。人心舉熙熙。從事能文者。作辭書之碑。庶幾不朽功。上徹堯軒墀。

台州府志。台之東湖地。初爲水軍營。熙寧四年。郡守錢暄始開爲湖。中有其樂堂流杯亭。諸勝。汪泌有詩。

錢暄

暄字載陽。惟演子。以父蔭累官。駕部郎中。知台州。拜寶文閣待制。卒。子景臻。尙秦魯國大長公主。題東湖其樂堂。

疏就湖山秀氣濃。花林茂列景爭雄。管弦交奏客懽合。臺榭競登人喜同。環陸鷺行飛早晚。平波魚陣掠西東。荒蕪芟去成佳致。換得汀洲月與風。

台州府志。熙寧四年。暄守台州。累石修城。以水至漂溢。鑿湖以受衆水。凡一萬六千步。有共樂堂流杯亭在湖心。詩云。

晁端禮

端禮字次膺。熙寧六年進士。兩爲縣令。忤上官坐廢。晚以承事郎爲大晟府協律。有閑適集。

能改齋漫錄。政和間大晟樂成。蔡元長以次膺薦。詔乘驛赴闕。次膺至都。會禁中嘉蓮生。遂屬詞以進。名並帶芙蓉。上覽之稱善。除大晟府協律郎。不克受而卒。

絕句

去日玉刀封斷恨。見來金斗熨愁眉。黃昏飲散歌闌後。懊惱水邊樓上時。

侯鯖錄。次膺薄游南京。嘗作詞云。花前月下堪垂淚。水邊樓上總關心。後過其家。已與客飲。復作詩云。

句

尋常自是司空慣。咫尺寧憂丞相噴。

漫叟詩話。次膺卽席贈妓句。雅不減張祜。骰子裏手之作。

晁端受

瑯琊翠微亭

曉風吹落秋泉聲。夜雨洗出秋山色。上有樓臺深翠微。可惜丹青圖不得。滁陽志。

晁端彥

端彥字美叔。官祕書監。

龍湫觀瀑

萬丈龍湫水。飛流翠壁開。始疑河漢落。翻若海潮來。飄灑四時雪。喧聞萬壑雷。廬山吾未到。氣象勝天台。雁山志。

晏幾道

幾道字叔原。號小山。殊幼子。監穎昌許田鎮。能文章。尤工樂府。有臨淄公風。子溥字慧開。靖康初。官河北。與妻玉牒趙氏死難。

與鄭介夫

小白長紅又滿枝。築毬場外獨支頤。春風自是人間客。張主繁華得幾時。

侯鯖錄。熙寧中鄭俠上書事作。下獄。悉治平時所往還厚善者。

晏叔原皆在數中。俠家搜得叔原與俠詩。裕陵稱之。即令釋出。

戲作示內

生計唯茲椀，般擊豈憚勞。造雖從假合，成不自埏陶。阮杓非同調，顏瓢庶共操。朝盛負餘米，暮貯藉殘糟。幸免播聞乞，終甘澤畔逃。挑宜筇作杖，捧稱葛爲袍。儻受桑間餉，何堪井上螯。綽然真自許，噫爾未應饒。世久輕原憲，人方逐子敖。願君同此器，珍重到霜毛。

墨莊漫錄：叔原聚書甚多，每有遷徙，其妻厭之，謂叔原有類乞兒，搬漆椀。叔原作詩云。

題司馬長卿畫像

犢鼻生涯一酒壚，當年嗤笑欲何如。窮通不屬兒曹意，自有真人愛子虛。

觀畫目送飛雁手提白魚

眼看飛雁手攜魚，似是當年綺季徒。仰羨知幾避繒繳，俯嗟貪餌失江湖。人間感緒聞詩語，塵外高蹤見畫圖。三歎繪毫精寫意，慕冥傷涸兩躊躇。

公儀招觀畫

初約看花花已盡，重親閑客客應歡。眞花旣不能長豔，畫在霜紈更好看。以上聲畫集。

七夕

雲幙無波斗柄移，鵲慵烏慢得橋遲。若教精衛填河漢，一水還應有盡時。合璧事類前集。

賀鑄

鑄字方回，衛州人。孝惠皇后族孫。娶宗女，授右班殿直。元祐中，李清臣奏換通直郎，通判泗州。太

平州卒有慶湖遺老集

王直方詩話方回言學詩于前輩得八句云平淡不涉于流俗奇古不鄰于怪癖題詠不窘于物義敘事不病于聲律比興深者通物理用事工者如已出格見于成篇渾然不可鑄氣出于言外浩然不可屈盡心于詩守而勿失

老學菴筆記賀方回狀貌奇醜俗謂之賀鬼頭喜校書朱黃未嘗去手詩文皆高不獨工長短句也有二子曰房曰廩於文房從方廩從回蓋寓父字於二子名也

望夫石

亭亭思婦石下閣幾人代蕩子長不歸山椒久相待微雲蔭髮彩初看輝蛾黛秋雨疊苔衣春風舞蘿帶宛如姑射子矯首塵冥外陳迹遂無窮佳期後莫再脫如魯秋氏妄結桑下愛玉質委淵沙悠悠復安在

菽溪漁隱叢話方回因此詩以得名交遊間無不愛之

客有攜寇萊公眞挂于驛舍傍題云今作閻羅王慨然有作

凜凜英風萬世孤忽瞻容貌涕洟俱遺謀不媿生張說異事猶煩鬼董狐黑白已分歸節義丹青長在懾奸諛不煩搖扇蒼蠅去一片寒冰挂座隅

和彭城王生悼歌人盼盼盼盼馬氏善書染死蘇南臺卽鳳皇原也

東園花下記相逢倩盼偷回一笑濃書籠尙絨香豆蔻鏡奩初失玉芙蓉歌闌燕子樓前月魂斷鳳皇原上鐘寄語虞卿謾多賦九原無路達魚封

茅塘馬上

壯圖忽忽負當年。回羨農兒過我賢。水落陂塘秋日薄。仰眠牛背看青天。

題定林寺

破冰泉脈漱籬根。壞柄遙疑挂樹猿。蠟屐舊痕尋不見。東風先爲我開門。以上慶湖遺老集。

詩人玉屑。王荆公見此。

詩大相歎賞。由此知名。

鄔柄

柄字德久。晉陵人。

鑑湖先生未老挂冠以詩卜居于姑蘇。毘陵兩郡依韻奉和。

清監風流賀季真。先生端是昔人身。如何未老催歸去。要臥烟霞兩郡春。慶湖遺老集附。

王雱

雱字元澤。安石子。未冠舉進士。歷官龍圖閣學士。早死。

趙槩見聞雜錄。王雱丞相之次子。有心疾。娶龐氏。不睦。丞相離而嫁之。時侯叔獻死。其妻幃箔不修。丞相表其事而斥去。時人語曰。王太祝生前嫁婦。侯工部死後休妻。

鍾山絕句

當年睥睨此山阿。欲著紅樓貯綺羅。今日重來無一事。卻騎羸馬下陂陀。

許彥周詩話。此王粲評直。不
爲荆公所喜。然詩實可傳。

關山篇

萬馬度關山。關山三尺雪。馬盡雪亦乾。沙飛石更裂。歸來三五騎。旌旗暎雲滅。不見去時人。空流磧中血。

絕句

一雙燕子語簾前。病客無慆盡日眠。開徧杏花人不到。滿庭春雨綠如烟。
霏微細雨不成泥。料峭輕寒透夾衣。處處園林皆有主。欲尋何地看春歸。以上後村詩話。

翠雲寺

寺古無鄰家。千山抱虛碧。門開猿鳥路。殿鎖烟霞積。老木森回溪。飛湍自淙激。曾無車馬到。絕境聞今昔。
逍遙賢大夫。寫此攜佳客。鳴騶清曉來。歸時日常仄。不使訟庭空。誰能傲泉石。撫州府志。

袁點

點字師與。無錫人。熙寧初太學直講。

呈東坡先生

青蓋美人回鳳帶。繡衣男子返雲車。上天一笑渾無事。從此人間樂有餘。

玉照新志。東坡南遷北歸。次毘陵。時久旱得雨。有里人袁點呈一絕。

云。云。坡見大喜。爲之重寫。且以手簡褰之。今袁氏刻石藏之于家。

藍奎

奎字秉文。潮州程鄉人。第進士。官郡博士。

句

嬾思身外無窮事。願讀人閒未見書。廣東通志。

周諤

諤字希聖。尤溪人。熙寧六年進士。知新會縣。不肖奉行新法。求歸。著孟子解義。禮記說。門人稱周夫子。

寄子弟

浪有虛名落世閒。自慙無實骨毛寒。末年三十力先倦。纔得一官心已闌。卜宅擬尋栽藥圃。買田宜近釣魚灘。他年子弟重相見。藜杖蓑衣筍籜冠。谿山餘話。

周述

述遂昌人。熙寧癸丑進士。官太常卿。

吳臯東作屏山草堂四首之一。

天設名區擁翠屏。草堂風度晚雞聲。年來不作繁華夢。飯犢郊原學耦耕。處州府志。

關澥

澥字子容。景仁子。熙寧六年進士。餘杭令。

絕句

野艇歸時蒲葉雨，綠車鳴處棟花風。
江南舊日經行地，盡在于今醉夢中。
寺官官小未朝參，紅日半竿春睡酣。
爲報鄰雞莫驚起，且容殘夢到江南。

春清紀聞關氏詩律精深妍妙世守家法。

此子容詩世傳以爲東坡先生作非也。

遊九鎖

山下寒流咽細泉，曉林浮日自生烟。
九峯密鎖疑無路，五洞潛通別有天。
羽客依山多得道，昔人涉海漫求仙。
我來要學棲真事，願借孤雲一榻眠。

洞霄詩集。

曾 叟

叟字彥和，龍溪人。熙寧六年進士，監潤州倉曹，嘗纂潤州類集。

次韻趙仲美表弟西齋自遣

知餘州作。

謫守淒涼臥郡齋，夫君失意偶同來。
海邊故國渺何許，城上新樓空幾回。
寧羨一囊供鶴料，會看千里躍龍媒。
清吟未免縈機慮，只恐飛觴便見猜。

錄。

自注云：唐幕官俸謂之鶴料，今歲較頭所得止此。仲美省試下第，故云。墨莊漫

遊九鎖

山勢盤紆是幾重，溪行亂石水溶溶。
東西路口分雙洞，蒼翠羣中起一峯。
石上仙翁留去跡，鏡開羽客有

吟蹤夜分不是紅塵境。清夢回時曉殿鐘。洞霄詩集

龔程

程字信民。宗元子。熙寧六年進士。歷西安丞。桐廬令。

中吳紀聞。信民嘗憤聖道不明。排異端之學家。不置釋老像。祭祀未嘗焚紙錢。儒家甚宗之。讀書攻苦。食淡。手未嘗釋卷。記問精確。鄉人號爲有脚書廚。

題壁

月度疎櫺起更慵。坐聽澄照五更鐘。卻思湖上西風急。吹送山前萬箇松。中吳紀聞。

常安民

安民字希古。邛州人。熙寧六年進士。元祐初爲宗正丞。除監察御史。謫監滁州鹽酒務。改通判鄆州。入黨籍。

題醒心亭

我愛昌黎湖上句。醉來直上醒心亭。宿醒不待山風解。臥讀殘碑已自醒。錦繡萬花谷。

孫諤

諤字元忠。睢陽人。熙寧六年進士。累官右正言。以直龍圖知廣德軍。徽宗朝。遷左司諫。卒入元祐黨籍。

資聖院在遂寧小溪。

四山藏一寺。方丈壓諸峯。回首坐禪處。白雲深幾重。全蜀藝文志。

劉涇

涇字巨濟。簡州陽安人。熙寧六年進士。王安石薦爲經學所檢討。歷國子監丞。知處貌真坊四州。元符末。上書召對。除職方郎中。卒。有前溪集。

郭椿畫繼云。涇爲米元章畫友。善

作林石樣竹筆墨。狂逸體製拔俗。

和米元章龍真行祕府右軍書一卷有一龍形真字印故作。

秦火蕩焚天地赤。孔堂壞後無餘壁。不知科斗六書文。化作龍蛇二王跡。集賢他日作仙久。官姓篆章存歷歷。白憐黃眼未親逢。一段因依徒奪魄。元章揮灑早驚動。祕篋墨皇曾敬識。孤標未要後生知。劣許下官論莫逆。好奇舉世不多得。神物尤來終變易。神鋒雙合會有時。真靈一飛無處覓。頗聞祕篋作訛語。別有擾龍招異客。不如乾沒歸去來。勝在箇家遭水厄。米芾書史。

元章好古過人書畫驚世起余作歌

天下愛奇人。沒量奇不諛。人奇解相奇。人奇物方合。壁乞與世閒人物樣。六朝唐盛始兼得。訪古知名已蕭爽。人亡物喪付衰夢。注想後來逢好尚。元章心自鑒。秋月一路仍行九霄上。家時菜色無斗粟。書畫奇奇世人望。譬如大海沈百寶。爾輩乘風得之浪。二王褚陸已天作。老顧如來更天匠。其餘緹襲凡幾重。但見光明爛垂象。珍岸瑞錦扶蘭葦。龍躍鸞驚訶魍魎。金仙詎敢觸以手。雪子玉人聊置掌。余家辭素最沈沈。

著退舍還師覺難傍。世人往往力能幹。未免月蝦終惚恍。絨機僞謬各臣妾。未觀堂堂筆中王。袖間澀縮氣如線。淨几明窗謾瞻仰。從來所有萬錢價。不卽臭帑當火葬。傾心妙絕豈求勝。妄意臨摹須殺謗。端居自號書一品。好事如封繪三藏。諸郎青出卽護持。未宥充飢謬爲駟。書史載薛道祖詩云。寧罄動破千金資。是也。余衰二物擬高閣。子可專之世無兩。書來詩往但悠悠。塵土欺人正惆悵。米芾畫史。

題韓溪在陝蜀路間。蕭鄴侯追淮陰侯處。

豪傑三從意氣中。憐才傾倒獨蕭公。後來可是無奇客。東閣投名尙不通。許彥周詩話。

龍崆巖

蒼巖如堂石如踞橋。梁如繩水如布。不有樵夫踏破雲。世閒那得知其處。

天王寺

金碧爲家定化城。書牀南偃略相迎。人閒蜚夢正深黑。天上木魚初發明。半里好風招隱士。一枝枯竹助閑行。已慙懷絨無高致。可更標門著姓名。以上括蒼彙紀。

遊麻姑山

謝公好登山。折屐第三谷。麻姑乃不到。頗負登山足。寒杉鳴古磴。澗道瀉淙玉。筇竹白接籬。吾將追往躅。溪行愛宛轉。石坐憐皴蒼。白雲起目前。如鶴兩翼張。蛻我衣上塵。駕之以翺翔。欲攬恍不接。身在意飄揚。石鼓埋入地。荆壁飛上天。嗚呼魯公碑。風雨三百年。愛字不愛石。磨滅安得傳。不敢手觸之。謂是甘棠篇。
麻姑集。

朱服

服字行中烏程人熙寧六年進士哲宗朝歷中書舍人禮部侍郎徽宗朝加集賢殿修撰知廣州黜知袁州再貶蘄州安置子彧有萍洲可談

黃斯張吳興備志萍洲老圃彧自號也在黃州蓋其僑寓之地事見齊安志彧字無或

過廬州

昔年吳魏交兵地今日承平會府開沃壤欲包淮甸盡堅城猶抱蜀山迴柳塘春水藏舟浦蘭若秋風教弩臺獨有無情原上草青青還入燒痕來方輿勝覽

九日

一見黃花只自羞蕭然短髮不禁秋誰人爲整烏紗帽獨倚西風滿眼愁後村千家詩

句

西清邇英閣密忽侍經筵晝漏逾三鼓宸居近五輒多聞資學殖清問發眞筌元豐盛事合璧事類後集
孤臣正泣龍鬚草遊子空簪鳳尾花

朱或萍洲可談先公崇寧元年帥廣正月遊蒲澗見遊人簪鳳尾花作口號一聯云云蓋以被遇先朝自傷流落後監司乃指此句爲罪其諫注云契勸正月十二日哲宗皇帝已大祥豈是孤臣正泣之時鞠獄竟無他意議曰可畏如此

宋史本傳服知廣州哲宗既祥服賦詩有孤臣正泣龍鬚草之句爲部使者所上黜知袁州

葛書思

書思字進叔。密之子。熙寧六年進士。官朝奉郎。卒。特諡清孝。

喜子勝仲登第

廣場筆陣數千人。喜汝穿楊箭鏃親。慶緒綿長時幸會。文科興復事還新。昔年繼榜熙寧歲。今寓同登紹聖春。從此莫教書種斷。孫曾應復值昌辰。韻語陽秋

丁注

注字葆光。吳興人。熙寧六年進士。知永州。有丁永州集。

永慶寺二覽亭

插迴飛簷聳。凌虛疊砌危。四天欄下揖。萬象掌中窺。目力不到處。雲容無盡時。塵塵看勝事。凭檻幾人知。赤城志

宋詩紀事卷二十六

錢唐厲鶚緝
仁和趙昱勘定

蔣之美

之美之奇弟。宜興人。熙寧六年進士。

遊惠山寺

維舟上重巘。景物近斜暉。流水連珠落。殘花碎錦飛。白雲隨步武。幽鳥榜軒扉。拂井松傾蓋。緣崖薜上衣。池光清可鑑。竹色翠成圍。更接高僧話。林梢帶月歸。惠山集

吳棫

棫字顧道。歐寧人。熙寧六年進士。徽宗朝官龍圖閣學士。鎮成都。後知郢州。中山府。

暑雪軒

呪土臺頭寺。披襟笑語閑。千年雲抱石。六月雪彌山。酒熟籩嘗外。茶新碾試閒。要須時點筆。來此賦躋攀。成都文類

嚴陵懷古

龍衮新天子。羊裘古野人。清名在林藪。高行動星辰。風月空齊地。烟霞自富春。滄浪秋更碧。不敢濯塵纓。

釣臺集

登姜相臺

滿林紅葉墜紛紛。耆老猶言別駕墳。舊府光華關右月。故鄉蕭索海南雲。酒杯湖上同方伯。茶竈巖邊共隱君。二百餘年真一夢。遠牆荒隴半耕耘。

題秦君亭

秋日春風麗句亭。先生天上少微星。滿爐松影隨香碧。一硯苔痕帶雨青。姜相笑中應斗酒。等公談外祇函經。何人爲我攜蠶蠟。來洗蒼碑墨數廳。以上南安縣志。

劉次莊

次莊字中叟。長沙人。以開梅山入洞。曉諭得官。熙寧六年。賜同進士出身。仕至侍御史。江西漕使。敷淺原見桃花。

桃花雨過碎紅飛。半逐溪流半染泥。何處飛來雙燕子。一時銜不畫梁西。墨莊漫錄。

江神祠

髻插幽蘭花。手把菖蒲葉。漁郎偷語人。云是江神妾。江神昨夜鼓雲濤。開帆拍天上千艘。吳洲女兒弄春水。浪溼船頭紅錦袍。前賢小集拾遺。

王昭君

斂袖出明光。埽瑟道路長。初聞胡騎語。未解漢宮妝。薄命隨塵土。元功屬廟堂。蛾眉知有用。慚媿羽林郎。

崔嶧

嶧長安人第進士累官河東轉運使刑部侍郎致仕

題萊公泉事詳范諷詩下

三相南行至道初記名留詠在精廬甘泉不洗天涯恨畱與行人鑿覆車湘山野錄

呂大臨

大臨字與叔大鈞之弟受學伊川之門登進士監鳳翔府司竹監元祐中除太學博士遷祕書省正字有玉溪集

春靜

花氣自來深戶裏鳥聲長在遠林中斑斑葉影重新蔭曳曳絲光入素空濂洛風雅

孔宗翰

宗翰字周翰道輔次子第進士知虔州元祐中官刑部侍郎以寶文閣待制知滁州未拜而卒

題壁

屈指從來十七年交親零落一潸然嬋娟再見中秋月依舊清輝照客眠四朝詩

畢仲游

仲游字公叔士安子第進士元祐初召試學士院擢為第一除集賢校理歷職方司勳員外郎京

南淮南轉運副使以黨籍終于西京留臺有西臺集

寄鄭介夫

鄭子安強否梅花萬里春如何投虎穴直欲犯龍鱗北闕今無數南方信有人可憐妻子在年少不謀身

宋文鑑

絕句

水痕天影淡相宜露坐秋涼乍快時桐葉芭蕉最多事曉昏風雨報人知

全芳備祖

邢 怨

怨字和叔鄭州原武人從伊川學第進士以薦歷職方郎哲宗紹聖初擢御史中丞以罪落職俄復顯謨閣待制提舉崇福官建炎初追貶常德軍節度副使

遊浯溪

歸舟一夜泊浯溪晚雨絲絲不作泥指點蒼崖訪遺刻更磨苔蘚爲留題

浯溪集

朝陽洞

溪流貫清江湍瀨亘百里龍蛇幾盤紆雷雨忽奔駛石渠伏穿鑿怪力祖誰氏突如見頭角虎豹或蹲峙橫江立棟柱小艇俄紛委蘋藻翳泓澄松竹蔭崖浹兩山東鳥道側岸數魚尾繚然闕深幽梵宇疊危址鐘唄雜灘聲亭臺森水底凭闌幾遊目策杖時臨履酒杓閒茶鐺基枰延晝晷放懷得天倪清嘯謝塵滓忽忘兒女縛似接羸秦子顧予拙謀身霜鬢颯垂耳雅意在延齡丹砂夙充餌焉得茲結廬悵念遠桑梓

秦觀

觀字少游。一字太虛。高郵人。舉進士。元祐初。蘇軾以賢良方正。薦除祕書省正字。兼國史院編修。官紹聖初。坐黨籍削秩。監處州酒稅。徙郴州。編管橫州。又徙雷州。放還。至藤州卒。有淮海集。閑居集。

茗溪漁隱叢話。東坡薦少游于荆公云。向屢言高郵進士秦觀太虛。公亦龐知其人。今得其詩文數十首。詞格高下。固已無逃于左右。此外博綜史傳。通曉佛書。若此類未易一一數也。荆公答書云。示及秦君詩。適葉敦遠一見。亦以謂清新婉麗。鮑謝似之。公奇秦君口之而不置。我得其詩。手之而不釋。又聞秦君嘗學至言妙道。無乃笑我與公嗜好異乎。

呂氏童蒙訓。雨砌墮危芳。風軒納飛絮之類。李公擇以為謝家兄弟得意不能過也。少游遊嶺後。詩嚴重高古。自成一家。與舊作不同。

王直方詩話。少游紹聖閒。以校勘為杭倅。方至楚泗閒。有詩云。平生遭欠僧。房睡準擬如今處。處還詩成之明日。以言者落職。監處州酒人以為詩識。

敷陶孫詩評。秦少游如

時女遊春。終傷婉弱。

和黃法曹憶建溪梅花

海陵參軍不枯槁。醉憶梅花愁絕倒。為憐一樹傍寒溪。花水無情自相惱。清淚斑斑知有恨。恨春相逢苦

不早甘心結子待君來。洗雨梳風爲誰好。誰云廣平心似鐵。不惜珠璣與揮掃。月落參橫畫角哀。暗香銷盡令人老。天分四時不相貸。孤芳轉盼同衰草。要須健步遠移歸。亂插繁花向晴昊。

易元吉獐猿圖歌

參天古木相繆枝。嵌空怪石銜清漪。兩猿上下一旁挂。兩猿熟視蒼蛙疑。蕭蕭叢竹山風吹。海棠杜宇相因依。下有兩獐從兩兒。花餐草齧含春嬉。易老筆精湖海推。畫意忘形形更奇。解衣一掃神扶持。他日自見猶嗟咨。金錢百萬酒千鴟。荆南將軍欣得之。老禪豪取橐爲垂。白晝掩門初許窺。房櫳炯炯明冬曦。榛叢羽革分毫釐。殘編未終且歸讀。歲暮有閑重借披。

贈女冠暢師

瞳人翦水腰如束。一幅烏紗裹寒玉。超然自有姑射姿。回首粉黛皆塵俗。霧閣雲窗人莫窺。門前車馬任東西。禮罷曉壇春日靜。落紅滿地乳鴉啼。

桐江詩話。暢姓唯汝南有之。其族尤奉道。男女爲黃冠者十之八九。時有女冠暢道姑。姿色妍麗。神仙中人也。少游挑之不得。作詩云云。

和參寥

樓閣過朝雨。參差得霽光。衣冠分禁路。雲氣繞宮牆。亂絮迷春闕。嫣花困日長。平康在何處。十里帶垂楊。

王直方詩話。參寥言舊有一詩寄少游。少游和之云云。華老讀至末句言者。小子又賤發也。少游後編淮海集。遂改云。經句牽酒伴。猶未戴長楊。

題大年小景四首

本自江湖客，宦遊何苦心。因君小平遠，還我舊登臨。
公子歌鐘裏，何曾識渺茫。唯應斗帳夢，曾入水雲鄉。
曉浦烟籠樹，晴江水拍空。煩君添小艇，畫我作漁翁。
島外雲峯晚，沙邊水樹明。想當揮灑就，侍女一時驚。

春日偶題呈上尙書錢丈

三年京國鬢如絲，又見新花發故枝。日典春衣非爲酒，家貧食粥已多時。

王直方詩話：少游爲黃本校勘，甚貧。錢穆父爲戶書，皆居東華門之堆垛場，少游春日作詩遺穆父，云：穆父以米二石送之。

秋日

霜落邗溝積水清，寒星無數傍船明。菰蒲深處疑無地，忽有人家笑語聲。
月團新碾淪花瓷，飲罷呼兒課楚辭。風定小軒無落葉，青蟲相對吐秋絲。
連蜷雌蜺挂西樓，逐雨追晴意未休。安得萬妝相向舞，酒酣聊把作纏頭。

藝苑雌黃云：此語亦豪而工矣。

遊仙詩

陰風一夜攪青冥。風定霏霏雪霰零。想見玉清真境上。白虛光裏誦黃庭。
夜深樓上撥書眠。天在闌干四角邊。風掃亂雲毫髮盡。獨留璧月照人圓。
天風吹月入闌干。烏鵲無聲子夜閑。織女明星來枕上。了知身不在人間。
日路按此首墨莊漫錄作納侍兒邊朝華之作。

本是廬山種杏人。出山來事碧虛君。上清欲問因何到。請看仙家十賚文。
以上淮海集。

侯鯖錄此詩

東坡稱之

遣朝華

月露茫茫曉柝悲。玉人揮手斷腸時。不須重向燈前泣。百歲終當一別離。

再遣朝華

玉人前去卻重來。此處分攜更不回。腸斷龜山離別處。夕陽孤塔自崔嵬。

墨莊漫錄少游侍兒朝華姓邊氏京師人元祐癸酉歲少游納之嘗爲天風吹月入闌干之詩時朝華年十九也後三年少游欲修真斷世緣遂道歸父母家資以金帛而嫁之朝華臨別泣不已少游作詩云云既去二十餘日使其父來云不願嫁卻乞

歸少游憐而復取歸明年少游出俸錢塘至淮上因與道友論議歎光景之過歸謂朝華曰汝不去吾不得修真矣亟使人走京師呼其父來遣朝華隨去復作詩云云時紹聖元年少游嘗手書記此事未幾遂竄南荒

遊杭州佛日山淨慧寺

五里喬松徑，千年古道場。泉聲與嵐影，收拾入僧房。鐵網珊瑚。

張 賈

夢中作

天風吹散赤城霞，染出連雲萬樹花。誤入醉鄉迷去路，傍人應笑不還家。

西清詩話：張賈熙寧中夢行大空中，聞天風海濤聲，振林木，徐見海中樓閣金碧瓊瑤，環佩者數百人，揖賈出紙請賦詩，細視筆研皆碧玉色，且戒之曰：此閒文章要似隱起鸞鳳，當與織女機杼分巧過，是乃人間語耳。賈成絕句云云。有仙人曰：子詩佳

絕未免近凡，酌酒一杯極甘。

寒忽覺身墮萬仞山而寤。

張 耒

耒字文潛，楚州淮陰人。第進士。元祐初，仕至起居舍人。紹聖中，謫監黃州酒稅。徽宗召爲太常少卿，坐元祐黨，復貶房州別駕，黃州安置。尋得自便居陳州。主管崇福宮，卒。有柯山集。

王直方詩話：文潛人物魁偉，故無已有詩云：張侯便然腹如鼓。

雷爲飢聲，汗爲雨，山谷有詩云：六月火雲蒸肉山，皆戲語也。

石林詩話：頃見晁无咎舉文潛斜日兩竿眠幘晚，春波一頃去鳧寒。自以爲莫及。又云：文潛過宋都詩：白頭青鬢隔存沒，落日斷霞無古今。氣格不減老杜。

呂氏童蒙訓：文潛詩自然奇逸，非他人可及。如秋明樹外天，客燈青暎壁，城角

冷吟霜，淺山寒帶水，早日白吹風，川鳴半夜雨，臥冷五更秋之類，迥出時流。

龍改齋漫錄。張文潛言。昔以黨人之故。坐是廢放。每作詩。嘗寄意焉。有云。最憐楊柳身無力。付與春風自在吹。又云。梧桐直不甘。衰謝數葉迎風尙有聲。

韓幹馬

頭如翔鸞月。頰光背如安。與鳧臆方。心知不載田舍郎。尙帶開元天子紅袍香。韓幹寫時國無事。天閑樹蔭春晝長。雙鬣執轡儼在傍。如瞻馳道黃屋張。北風揚塵燕賊狂。廐中萬馬驅范陽。天子乘騾蜀山險。滿川百草爲誰芳。

侯鯖錄。元祐中。館職諸公賦。

韓幹馬詩。獨文潛最高勝。

七夕歌

人聞一葉梧桐飄。蓐收行秋回斗杓。神宮召集役靈鵲。直渡天河雲作橋。橋東美人天帝子。機杼年年勞玉指。織成雲霧紫綃衣。辛苦無懽容不理。帝憐獨居無與娛。河西嫁得牽牛夫。自從嫁後廢織紅。綠鬢雲鬢朝暮梳。貪懽不歸天帝怒。謫歸卻踏來時路。但令一歲一相逢。七月七日河邊渡。別多會少知柰何。卻憶從前恩愛多。恩恩離恨說不盡。燭龍已駕隨羲和。河邊靈官曉催發。令嚴不管輕離別。空將淚作雨滂沱。淚痕有盡愁無歇。寄言織女若休歎。天地無情會相見。猶勝嫦娥不嫁人。夜夜孤眠廣寒殿。

侯鯖錄。此歌。

東坡傳之。

離黃州

扁舟發孤城。揮手謝送者。山迴地勢卷。天豁江面瀉。中流望赤壁。石脚插水下。昏昏烟霧嶺。歷歷漁樵舍。居夷十三載。鄰里通假借。別之豈無情。老淚爲一灑。篙工起鳴鼓。輕櫓健于馬。聊爲過江宿。寂寂樊山夜。

容齋隨筆文潛暮年哦老杜玉華宮極力模寫其離黃

州詩偶同此韻音響節奏固似之矣讀之可默喻也

題中興頌碑後

玉環妖血無人掃。漁陽馬厭長安草。潼關戰骨高于山。萬里君王蜀中老。金戈鐵馬從西來。郭公凜凜英雄才。舉旗爲風偃爲雨。灑掃九廟無塵埃。元功高名誰與紀。風雅不繼騷人死。水部胷中星斗文。太師筆下蛟龍字。天遣二子傳將來。高山十丈磨蒼崖。誰持此碑入我室。使我一見昏眸開。百年廢興增歎慨。當時數子今安在。君不見荒涼涪水棄不收。時有遊人打碑賣。

留題奉先寺

荒涼城南奉先寺。後宮美人官葬此。角樓相望高起墳。草閒柏下多石人。秩卑埋骨不作冢。青石浮屠當丘隴。家家墳上作享亭。朱門相向無人聲。樹頭土梟作人語。月黑風悲鬼搖樹。宮中養女作子孫。年年犢車來作主。廢后園林官道側。家破無人掃陵域。官家歲給半千錢。街頭買餅作寒食。

秋螢行引

碧梧含風夏夜清。林塘五月初飛螢。翠屏玉簾起涼思。一點秋心從此生。方池水深溪雨積。上下輝輝亂

凝碧。幸因簾捲到華堂。不畏人驚照瑤席。漢宮千門連萬戶。夜夜熒煌暗中度。光流太液池上波。影落金盤月中露。銀闕蒼蒼玉漏遲。年年爲爾起愁思。長門怨妾不成睡。團扇美人還賦詩。避暑風廊人語笑。闌下撲來羅扇小。已投幽室自分明。更伴殘星碧天曉。君不見連昌宮殿洛陽西。破瓦頽垣今古悲。荒榛腐草無人迹。只有秋來熠燿飛。

柳

永豐坊裏舊腰肢。曾見青青初種時。看盡道傍離別恨。爭教風絮不狂飛。以上張右史集

贈營妓劉淑女

初官通許時作

可是相逢意便深。爲郎巧笑不須金。門前一尺春風髻。窗外三更夜雨衾。別燕從教燈見淚。夜船唯有月知心。東西芳草渾相似。欲望高樓何處尋。

未說蟾蜍如素領。固應新月學蛾眉。引成密約因言笑。認得真情是別離。尊酒且傾濃琥珀。淚痕更著薄胭脂。北城月落烏啼夜。更是孤舟腸斷時。侯鯖錄

木香

紫皇寶輅張珠幃。玉女熏籠覆繡衾。萬紫千紅休巧美。人閒春色在檀心。墨莊漫錄

次韻奉酬无咎兼呈慎思天啓

平生結交圓納方。過眼十人八九忘。畹蘭蕙畝幽谷芳。嬾隨家奴諛五郎。苦飢方朔身漫長。顛毛種種顏欲蒼。誰謂勝癡端坐狂。清淮之陰一草堂。列筆作陣茶森槍。絕口平戎與破羌。百年如此計亦臧。何用竊

食官倉糴。元黃病足畏高岡。但願縮頸老支牀。煌煌東曉日月傍。神仙鸞鳳爭騰騰。萬書落架城復隍。牙籤如雲丹碧裝。晁侯再作班與揚。正始故在何曾亡。江湖十年願飽償。夜成七發光出囊。蘇公後出長卿鄉。爲君吳都無一行。蘇翰林欲作杭州賦。見先哲杭州七述乃止。世有伯樂生驢驘。寫使弭耳隨鹽齏。鄧侯楚山深閨房。名走上國交侯王。朝隨日影夜燈光。包攬今古窮炎黃。吐詞分葩有國香。近君如雪六月涼。又似心醉醞醘觴。東南蔡子名飛翔。同隨天書拜未央。瑰璋宏傑萬夫望。頰牙凜凜有風霜。文如神鼎爛龍章。鍾山長齋讀老莊。論兵說佛兩俱忙。不夸得硯文字祥。但願破敵如頽牆。我窮乞酒更得漿。仰看三虎爭雄張。同文館倡和詩。

輸麥行 并序

余過宋。見倉前村民輸麥。止車槐陰下。其樂洋洋也。晚復過之。則扶車半醉。相招歸矣。感之。因作輸麥行。以補樂府之遺云。

場頭雨乾場地白。老稚相呼打新麥。半歸倉廩半輸王。免致縣吏相催迫。羊頭車子毛布囊。淺泥易涉登前岡。倉頭買券槐陰涼。清嚴官吏兩平量。出倉掉臂呼同伴。旗亭酒美單衣換。半醉扶車歸路涼。月出到家妻具飯。一年從此皆閑日。風雨閉門公事畢。射狐置兔歲蹉跎。百壺社酒相經過。

蓉塘詩話。自鎮江以東。有獨輪小車。凡百乘載皆用之。一人挽于前。一人推于後。謂之羊頭車。書籍未見。載此名者。獨張文潛輸麥行云。羊頭車子毛布囊。泥淺易涉登前岡。始見詩人用之。

劉純臣

純臣新建主簿

送王迪夫婦偕隱

髮如抹漆左參軍，脫去青衫作隱淪。世上更無羈縶事，壺中別有自由身。鼎烹玉兔山前藥，花看金鰲背
上春。莫怪少年能決烈，藍田夫婦總登真。

復齋漫錄：熙寧中，王迪爲洪州左司理，有道人磨鏡，俾迪自照。

見星冠羽幘，縹緲鏡中。遂棄官與妻偕隱。純臣詩送之云云。

張芝

芝泮人

投李珣廟

風輒潮生江水平，遙峯隱隱浸寒青。自從香骨沈波底，獨我爲詩弔爾靈。

翰府名談：李珣字溫叔，都官之幼女也。八歲能詩。後適江夏王常同汎舟，射利江湖間，不久常死，而珣溺舟于三山磯下。後三日，屍忽出水中，土人異之，爲立廟。熙寧間，都人張芝作詩焚廟中云云。夜見一婦人謂之曰：妾溺此時，水官令賦詩及校九江會源錄。一夕而畢，水官大悅，令江神出屍顯靈，血食于此。謝子詩意所不敢當，煩聽一石載妾前車，將有奉報。芝後不爲立石，舟再過三山，幾覆，又夢其婦詬責之。

魯有開

有關字元翰，以從父宗道恩授韋城令。熙寧中，擢膳部郎中，知冀州。

遊大滌山

馬蹄清曉破瓊田。一出紅塵骨已仙。任鎖九重山下路。終尋五處洞中天。泉流碧砌長鳴玉。跡隱蒼崖久
蛻蟬。人世歸時知變否。樵夫曾記爛柯年。洞霄詩集

陳師錫

師錫字伯修。建安人。熙寧中。廷試第三。調昭慶軍。掌書記。歷考功員外郎。徽宗朝。拜殿中侍御史。

出知穎廬滑三州。坐黨論削官。安置郴州。卒。紹興中。贈直龍圖閣。

題李公麟畫歸去來圖。有雪竇和尚親書偈。

百中神鋒誇妙手。當時破敵祇同機。餘花墮穢無人見。半偈流傳豈易知。志雅堂雜鈔。

程建用。楊杏

建用字彜仲。眉山人。熙寧進士。

大雨聯句

庭松偃蓋如醉。建用。夏雨淒涼似秋。楊杏。有客高吟擁鼻。無人共啣饅頭。轍。

茗溪漁隱叢話。東坡言。余幼時。里人程建用。楊杏。家弟子。由。

會草舍中大雨聯句六言云云。坐皆絕倒。今四十餘年矣。

呂南公

南公字次儒。南城人。熙寧鄉貢。一試禮部不偶。遂罷舉。自號灌園先生。有集。

葛仙峯

南峯枕崇坂，逕路荆榛稠。遺壇在其巔，名爲仙翁留。石角已剝泐，林芳自春秋。誰云塵土姿，來繼丹霄遊。
四江詩話

李復圭

復圭字審言，邯鄲公淑之子。神宗朝，歷鹽鐵副使，以集賢殿修撰知荆南。

秀峯上方

吳王昔日館娃宮，殿閣鱗差軼碧空。寂寂香魂招不得，惟餘松柏韻天風。
吳郡志

句

老風池邊蹲不去，飢鳥臺上噤無聲。

事文類聚前集曾魯公自嘉祐秉政，至熙寧中，尙在中書，年雖甚高，而精力不衰，故臺諫無非之者。惟李復圭作詩譏之云云，魯公遂致仕去。

楊适

适字時可，棊州人。年十八登第，從陳后山學詩。晚爲尙書比部郎。

絕句

尖頭奴有五兄弟，十八公生四客卿。過我書齋無一事，似應終日待陶泓。

合璧事類前集本朝百家詩載錢次公以墨四丸筆五枚賜楊時可楊戲曰安得硯乎次公曰不難須一詩楊乃作一絕云云

李新

新字元應仙井監人第進士元符末上書奪官謫遂州有跨黿集

錦江思

獨詠滄浪古岸邊牽風柳帶綠凝烟得魚且斫金絲膾醉折桃花倚釣船成都文類

觀前古美人圖

璧月塵昏瓊樹秋無從百媚一回眸茶蘼香度梅妝冷鸚鵡聲低玉笛幽睡背但能知禍水逢春輒莫上迷樓歸來安守無鹽女不寵無驚共白頭聲畫集

折楊柳

東風來何時百花已飄零獨有隄上柳慘淡含春榮扁舟復何適延客江上亭顧無青玉案何以送子行攀條欲相贈上有雙流鶯流鶯正求友柰此離別情

漁父曲

黃蓑老翁守釣車賣魚得錢還酒家醉中乘潮過別浦睡起不知船在沙籬根半落秋江水稚子蓬頭采洲芷蓴絲芹甲滿筠籠日暮溪橋得紅米以上前賢小集拾遺

李孝博

孝博廣東提點刑獄

英州次蔣穎叔韻

維舟庭下號三灣，萬疊青山一水閒。偏愛澄江照天碧，飛來幾片白雲閑。方輿勝覽

張師正

師正字不疑，熙寧中仕爲辰州帥，著括異志，倦遊雜錄。

武林別文瑩上人

憶昔荊州屢過從，當時心已慕冥鴻。渚宮禪伯唐齊已，淮甸詩豪宋惠崇。老格疎閑松倚澗，清談瀟灑坐生風。史官若覓高僧事，莫把名參技術中。

碧嶂孤雲冉冉歸，解攜情緒異常時。餘生歲月能多少，此別應難刻後期。玉壺清話

舊將封侯盡，降王賜姓歸。昇平詞分鹿是非皆委夢，落花貴賤不由人。隱居詩話

王世寧

臨終作

翠羽旌幢仙子隊，紫皇樓閣玉皇家。人閒風雨易分散，回首武陵空落花。

詩話總龜太原王世寧自言籍係第十八洞玉

仙人熙寧中以暴疾終于家臨終作詩云云

劉叔贛

叔贛神宗朝中書舍人。鶚按贛廣韻頁同。劉敞有仲遠父之稱。疑此卽劉敞。實父不敢臆斷。姑附于此。

過柏林院贈吉長老有古殿吳道子畫維摩居士又有斷碑是寶曆中記義峯禪住佛院事

靈光歲久獨巋然。峴首遺碑亦未遷。會向三生記前佛。暫從方丈謝諸天。篆香徐刻黃金印。梵宇時開貝葉篇。門外霜風正搖落。庭前松柏自安禪。

和李公擇題相國寺壞山水歌

蒼山本是千萬丈。怪爾斷落盈尺中。枯松挂巖正矯矯。白雲出谷方溶溶。憶昨高秋十日雨。百川湧溢騰蛟龍。丹青壞卻不可住。金碧拂地成都空。人閒流落萬餘一。掇拾補綴幾無從。當時畫手合衆妙。得此誠是第一工。松陰行人何草草。秃帽小蓋馬色驄。長途未竟不得息。嘯歌正爾來悲風。巨靈擘華疏黃河。夸娥移山開漢東。海波芥子忽出沒。大雄遊戲神與通。我今與君未嘗覺。指視壁畫將無同。新詩飄飄脫俗格。得閑會復來從容。

壁畫古槎歌

南山大樹楓與樗。百年不到生理枯。老枝錯落麋奮角。病根纏結龍垂胡。風霜不知春不改。古苔懸蔓相縈帶。豈知高堂素壁上。畫圖能令觀者愛。野夫晨興坐樹邊。偶說此槎來上天。暫乘西風犯牛斗。卻看東海成桑田。

次韻蘇子瞻韓幹馬贈李伯時

韓幹畫馬名獨垂。冰紈素幅橫素絲。諸公賦詩邀我和。我如鈍鎚逢利錐。區中纔容三萬里。正可騷擾一日馳。朝吳暮燕亦其亞。幸得夷路無熱羈。此閒三馬皆國馬。瑰姿逸態成嘯奇。有時秋空見霜骨。下睨衆禽皆伏雌。良工苦心爲遠到。天機要眇潛得之。區區駑駘浪自負。豈有醜骨包妍皮。李侯灑筆定超詣。尙有天驥君未知。宛王母寡今授首。汗血不敢藏貳師。

畫鶴

置此憐神駿。三年故不飛。軒居寧假寵。野客會忘機。燕雀那相笑。鳧鷖直自肥。蓬萊千萬里。正想玉爲衣。
以上畫鷲集。

張唐民

唐民熙寧中任西川轉運使京東路提刑。

題捫參閣在昌州。

訟簡民淳羨小州。兩衙纔退似歸休。一懷山果三升酒。暮掩青峯卽下樓。
方輿勝覽。

李之純

之純字端伯。滄州無棣人。登進士。元祐初。歷寶文閣直學士。工部尙書。紹聖中。出知單州。崇寧中。

入黨籍

西園辨蘭亭和韻

綠葉纖長閒紫莖。蜀人未始以蘭名。有時只怪香盈室。此日方傳譽滿城。恩意和風揚馥郁。光榮灑露滴。

清英庭階若不逢精鑿。何異深林靜處生。成都文類

駕幸太學

羽衛金輿煥彩章。天街端去入虞庠。嚴師致奠初加拜。延講終篇不計行。萬乘屈尊先郡國。諸生賜坐亞侯王。輔臣歸美榮歌詠。首發清風政事堂。中州題詠集

梁 燾

燾字況之。鄆州須城人。舉進士。提點京西刑獄。元祐中。拜尚書右丞。紹聖初。以黨論貶雷州別駕。化州安置卒。

駕幸太學

原廟親持十月觴。天迴寶輦款虞庠。當陽赭幄翬龍座。屬地霜袍振鷺行。拭目嚮儒移美俗。虛懷稽古自興王。太平重見清風頌。嘉句飛傳到玉堂。中州題詠集

劉奉世

奉世字仲馮。敏子。官集賢校理樞密使。入元祐黨籍。

送越帥程公闢

使君遺愛徧南州。五馬新歸瘴海頭。持橐未厭青瑣直。懷章還作鑑湖遊。餘姚人物傳吳遠。越地山川向鄞幽。應有清詩資臥理。會吟他日記風流。刻錄

駕幸太學

聖典垂精及表章。曠儀親舉自宗庠。縱觀橋擁浮雲蓋。侍問庭充振鷺行。首舉儒風隆上國。光增帝業掩前王。太平榮遇慚多幸。重見歌虞起廟堂。中州題詠集

周 商

駕幸太學

雲覆鸞輿五色章。鳴鞘聲肅下儒庠。佩於霧集三千子。儀衛星羅十二行。位列夔龍陪帝聖。經陳戊甲獻成王。元龜象齒方來供。不用論兵政事堂。中州題詠集

李師德

駕幸太學

隆典遺經已表章。又傳清蹕幸膠庠。黃龍繞駕天移仗。白雪分袍士綴行。況是體元能作聖。更歡稽古效規王。太平盛世文明遠。萬國儒風自一堂。中州題詠集

李 階

駕幸太學

天祐斯文賴表章。皇心眷眷事膠庠。享嚴祖殿回龍馭。德警儒班肅鷺行。降輦詣祠追四聖。擁經求道舉三王。欲知盛美前無古。賢聖相逢在廟堂。中州題詠集

吳安持

安持充之子。寶文閣待制。王荆公之婿。

駕幸大學

翰林墨客奏封章。天子欣然幸國庠。綵仗六龍初擁路。青衿三舍已重行。隆儒共慶賢堯舜。訪道誰知應帝王。附鳳鶩淵皆法從。獨慙由也亦升堂。汴京遺蹟志。

畢仲愈

仲愈字將叔。仲游弟。國子監丞。

句

已招明月移歌扇。更喚春風試舞腰。元夕。明燈數點林中見。橫笛一聲烟外聞。夜行。萬姓統譜。

孔舜思

舜思官尚書職方郎中。通判齊州。

題靈巖寺

石刻在泰山。

忽從平地出塵籠。親到諸天釋梵宮。卻悟冗官長役物。爭如大士日談空。山橫青壁千層合。泉迸丹崖一線通。幽鳥靜啼人外境。疎鐘不墮世閒風。目無可欲猿猱伏。心絕微塵冰鑑融。自恨無緣陪宴坐。他生願效種松翁。熙寧九年丙辰十月。顧炎武求古錄。

王延禧

延禧字仲祥。熙寧中知夔州。

題制勝樓

夔子城新築。長江便作壕。欲兼諸面敵。故起北樓高。卽舊基仍峻。因時力不勞。青天纔咫尺。翠壁似周遭。近照東西瀼。遙分上下牢。百蠻歸指掌。三峽見秋毫。帝道方無外。皇威到不毛。三鉤閑夜鎖。八陣縱春遨。守土慚非稱。提兵亦謬叨。經營皆使指。備豫本戎韜。功乏爲山助。名加制勝褒。登臨欲吟咤。深媿杜陵豪。

名勝志

宋詩紀事卷二十七

錢唐 厲 鷄 緝
仁和 杭世駿 勘定

郭祥正

祥正字功父。當塗人。舉進士。元豐中。知端州。元祐初。階至朝請大夫。請老歸。家于青山下。有青山集。

文獻通考。張浮休評郭祥正詩。如大排筵席二十四味。終日揖讓而適口者少。

竹坡詩話。質方回嘗作青玉案詞。有梅子黃時雨之句。人皆服其工。士大夫謂之賀梅子。郭功父有示耿天籟一詩。王荆公嘗爲之書其尾云。廟前古木藏訓狐。豪氣英風亦何有。方回晚倅姑孰。與功父游甚歡。方回寡髮。功父指其髻謂曰。此眞賀梅子也。方回乃捋其鬚曰。君可謂郭訓狐。功父鬢而鬚。故有此語。

遜齋閣覽。功父曾題人山居一聯云。謝家莊上無多景。只有黃鸝三兩聲。荆公命工繪爲圖。自題其上云。此是功父題山居詩處。卽遣人以金酒鍾并圖遺之。

明皇十眉圖

明眉逸事傳十眉。正是唐家零落時。霓裳曲調雖依舊。阿蠻終不似楊妃。畫工貌得非無意。欲使流傳警
來世。翠翹紅粉尙爭春。隱約香風起仙袂。六龍真馭竟何之。秦陵荒草長狐狸。猶將妙筆勸尊酒。醉覺人
閒萬事非。

金山行

金山杳在滄溟中。雪崖冰柱浮仙宮。乾坤扶持自今古。日月彷彿懸西東。我泛靈槎出塵世。搜索異境窺
神功。一朝登臨重歎息。四時想像何其雄。卷簾夜閣挂北斗。大鯨駕浪吹長空。舟摧岸斷豈足數。往往霹
靂槌蛟龍。寒蟾八月蕩瑤海。秋光上下磨青銅。鳥飛不盡暮天碧。漁歌忽斷蘆花風。王直方云二語大爲荆公
所賞。蓬萊久聞未曾往。壯觀絕致遙應同。潮生潮落夜還曉。物與數會誰能窮。百年形影浪自苦。便欲此
地安微躬。白雲南來入長望。又起歸興隨征鴻。

蒼溪漁隱叢語功甫

金山行造語豪壯

鳳凰臺次李太白韻

高臺不見鳳凰游。浩浩長江入海流。舞罷青蛾同去國。戰殘白骨尙盈丘。風搖落日催行櫂。湖擁新沙換
故洲。結綺臨春無處覓。年年荒草向人愁。

娛齋堂詩話郭功甫嘗與王荆公登金陵鳳

凰臺追次李太白韻按筆立成一座盡仰

訪隱者

一徑沿崖踏蒼壁。半塢寒雲抱泉石。山翁酒熟不出門。殘花滿地無人跡。以上青山集。

寄東坡先生自朱崖量移合浦

君恩浩蕩似陽春。海外移來住海濱。莫向沙邊弄明月。夜深無數採珠人。

困學紀聞。東坡文章好譏刺。文與可戒以詩云。北客若

來休問事。西湖雖好莫吟詩。晚年郭功父寄詩云。

李公麟

公麟字伯時。舒城人。第進士。歷泗州錄事參軍。用陸佃薦爲中書門下。後省。刪定官御史檢法。元符三年。病瘵致仕。歸老龍眠山。

蔡寬夫詩史。韓幹畫馬。多分其驥爲三。莫曉何意。唯白樂天春深學士家詩云。鳳書裁五色。馬鬣翦三花。唐學士例借飛龍殿馬。則應是時國馬皆如此也。李伯時喜學韓幹畫。每不知三驥之意。常難於下筆。有得樂天詩者。先爲誦之。而不言所出。伯時請之力。乃使爲畫數馬。始以集示之云。

次韻鄧謹思初入試院

敕使書囊問隊行。聚星深館粲諸英。雲隨襟袖來蓬島。香散房櫳宿化城。振鷺充庭天有幕。珊瑚入網海無聲。範模一世尊先覺。況此提平慰後生。同文館倡和詩。

小詩并畫卷奉送汾叟同年機宜奉議赴熙河幕府

畫出離筵已愴神。那堪真別渭城春。渭城柳色休相惱。西出陽關有故人。整畫集。

春社出郊

千尋古樸笑聲中。此日春風屬社公。開眼已憐花壓帽。放懷聊喜酒治蠶。攜刀割肉餘風在。卜瓦傳神俚俗同。聞說已栽桃李徑。隔溪遙認淺深紅。事文類聚前集。

呂希純

絕句
希純字子進。公著次子。登第爲太常博士。哲宗朝。歷寶文閣待制。知亳州。謫道州安置。後入黨籍。

夢寢西山結草廬。逝將臨水詠游魚。何人見卯求時夜。更著閑言問藐姑。

紫微詩話。崇寧間。談命術者多言叔祖待制與曾內翰子開皆宰相命也。或有占紫姑者。代書村童書於紙云。待曾呂相方發。然皆不驗。叔祖有詩云云。

元夕

何莫元宵好。迎鑾册府西。鞘聲雲外起。扇影日邊低。祕禁威容肅。名流步武齊。舜瞳回左顧。真欲過金閨。
何處元宵好。雙林宴坐僧。戒圓三五夜。心耀百千燈。茅舍門常掩。繩牀几謾憑。世間娛樂事。一念不曾興。
瀛奎律髓。

林迥

迴羅源人熙寧中惠安簿。

同黃祕教遊連江玉泉

青山好景微權尹。訟庭稀曉馬破雲去。夜船乘月歸。妓歌珠不斷。人醉玉相依。薄宦自拘者。咄哉多是非。
青瑣高議

題林子默隱居

先生平昔命何非。萬卷詩書一布衣。回首長安成底事。吳山蒼翠幾時歸。
泉州府志

俞充

充熙寧中虞鄉令。

王官谷十詠存四

貽溪表聖山居記云谷之名本以王官廢壘在其側。司空氏易之爲貽溪。溪舊不蓄魚。及表聖居之。石竇泉隙。魚皆充牣。見於說魚篇。今亦無魚。

濯纓溪流上。清心共澄澈。人存魚自躍。人亡魚亦竭。此意雖冥冥。可與仁者說。遺音竟誰繼。十里閑風月。

休休亭本濯纓亭爲俠軍所焚復構之易名休休。

洗耳謝市朝。構亭得餘址。三徑草長深。一毫塵不起。支肘看青山。引鶴聽流水。獨有愛君心。時時擬綸音。

司空氏舊居王官谷舊皆司空氏別業。自表聖沒轉易不常。

孤鶴去不還。雲閒犬空吠。獨聞溪鳥銜。表聖詩云。溪鳥待排銜。尙有里人愛。表聖多以金帛施於閑里。巖花無開落。

表聖云小巖西有石巖故老目爲杏花。世事幾興廢。我乘幽興來。靜邀秋月對。

石硯表聖云西谷路有石如硯。人謂之秦王硯。

嘗讀表聖詩云是秦王成。憫時著密史。表聖所著密史深救時病。對此潛經營。新雨淨如洗。亂苔生復平。表聖詩云硯石苔平矣。應誤山中客。浪近翰墨名。王官谷集。

仇伯玉

訪王官谷休休亭

飄香山徑踏殘花。來訪仙鄉隱處家。當日廟堂延至計。未應懷璧老烟霞。山鷗營巢欲哺兒。晴杏拆早先離披。盤回一徑穿碧篠。谷口數家耕水湄。王官谷集。

王翰

司空侍郎故居

西風策馬問王官。松徑縈紆上百盤。泉響夜潭穿石竇。峯高天柱矗雲端。一鳴共許才華舊。三詔方知節操寒。花落烏啼人不見。休休亭上倚闌干。王官谷集。

陳易

易莆田人。熙寧中。隱居石門。時號陳聘君。

嘗有需禪師

年來多病愛棲禪。寶鑑慵將照醜妍。卻憶南湖孤頂月。定回金磬落巖前。興化府志。

楊時

時字中立。將樂人。熙寧九年進士。游二程之門。歷知瀏陽。餘杭。蕭山三縣。召爲祕書郎。欽宗朝。兼國子祭酒。高宗朝。除工部侍郎兼侍讀。以龍圖閣直學士提舉洞霄宮。卒。諡文靖。學者稱龜山先生。有集。

望湖樓

斜日侵簾上玉鉤。簷花飛動錦紋浮。湖光寫出千峯秀。天影融成十里秋。翠鷗翻風窺淺水。片雲隨意入滄洲。留連更待東窗月。注目晴空獨倚樓。

觀梅贈胡康侯

欲驅殘臘變春風。惟有寒梅作選鋒。莫把疎英輕鬪雪。好藏清豔月明中。

藏春峽爲隱士吳儀作

山銜幽徑碧如環。一壑風烟自往還。不是武陵流水出。殘紅那得到人閒。

含雲寺書事

蜨夢輕揚一室空。夢回誰識此身同。窗前月冷松陰碎。一枕溪聲半夜風。以上龜山集。

求仲弓

仲弓字德夫。黃巖人。熙寧九年特科。與王荊公爲文字交。仕終樂平令。

靈龜潭

江湖雖闊多罾網，幽澗清虛且勉旃。待我功成買雙鶴，歸來伴汝一千年。赤城志。

陳覺民

覺民字達野，仙遊人。熙寧九年進士。元祐間知建陽縣，累遷宗正丞。歷知漳建二州，移知福州。言者承安悖意劾罷，尋起知泉州，遷本路提刑。復以右文殿修撰知廣州卒。

武夷山

昇真洞口接天門，靈草丹桃日日春。聽說列仙來瑞世，三朝德業在斯民。

方輿勝覽：章聖出自武夷，事見楊大年家集神考哲廟。亦武夷真君應出，故有三朝德業之句，事見氏族編。

寄米元章

汨汨塵埃閱歲華，青山相見認空花。清淮風月元無價，憑仗詩翁爲我賒。

長淮千古自流東，六月城頭日日風。天際玉潢無少處，夜山圖在明月中。珊瑚網。

姚莘

莘字舜徒，慈谿人。熙寧九年進士，累除提舉成都府常平事。後以直龍圖閣知夔州事，卒。

碧波亭

在簡州東溪。

賴簡池臺兩蜀誇，東溪別是一仙家。令人卻憶康王谷，坐看珠簾濺雨花。錦繡萬花谷。

李格非

格非字文叔，濟南人，舉進士，元祐末爲國子博士，紹聖初爲禮部郎，提點京東刑獄，以黨籍罷，長女能詩，嫁趙明誠，卽易安也，有集。

過臨淄

擊鼓吹竽七百年，臨淄城闕尙依然，如今只有耕耘者，曾得當時九府錢。

後村詩話文叔詩文高雅。

條暢有義味，在晁秦之上。

賀幸太學

日月天回十二章，詔移清蹕幸膠庠，六龍穩轉橋門曲，多士橫穿錦仗行，俎豆威儀瞻闕里，東西風教自周王，太平誰謂初無象，四海形容在一堂。汴京遺蹟志。

葉濤

濤字致遠，處州龍泉人，熙寧進士，仕至中書舍人，龍圖閣待制，入元祐黨籍。

望舊廬有感

重來舊屋誰爲主，江令蕭條歎獨存，已媿問人纔識路，卻悲無柳可知門，舟車到處成家宅，歲月惟驚長子孫，孤客濫巾非得已，故交零落與誰論。江令尋宅詩云：見桐猶識井，看柳尙知門。宋文鑑。

張介

介字吉甫，番陽人。

句

應是子規啼不到，致令我父未歸家。

能改齋漫錄。番禺張吉甫。方娠時。父去客東西川不還。張君自爲兒時。已愴然有感。其言語食息。未嘗不在蜀也。與尙書彭公器資同學。作詩云云。聞者皆憐之。既長。走蜀。父初無還意。乃歸省母。復至涪。聞往逝者三。其父遂行。以熙寧十年三月至自蜀。

鄉人迎謁太息。或爲感泣。

一時名士賦詩以紀其事。

錢景諶

景諶景臻從兄。舉進士。居毗陵。熙寧末。從張景憲。辟知瀛州。至朝請郎。

洞霄宮

清夜宿瑤宮。雲開天柱峯。千巖空洞月。萬籟古壇松。仙馭聞鳴鶴。琅輿想六龍。朝元步虛罷。祥吹引林中。

洞霄詩集

杜默

默字師維。濮州人。熙寧末。特奏名。仕新淦尉。

王直方詩話。石守道作三豪詩。謂曼卿豪於詩。永叔豪於文。杜默豪於歌。故詩云。師維二十二。筆距猛如鷹。玉川月蝕句。氣欲相憑陵。而歐公亦有詩云。南山有鳴鳳。其音和且清。鳴於有道國。出則天下平。杜默東土秀。能吟鳳凰聲。作詩幾百篇。長歌仍

短行謂豪於歌者有送守道詩云。聖人門前大蟲。學海波中老龍。及推倒楊朱墨翟。扶起仲尼周公之句。

句

一片靈臺挂明月。萬丈詞焰飛長虹。乞取一勺鳳沼水。活取久旱泥蟠龍。上歐陽青真高議。倚風莫恨唐工部。後裔寧知不解詩。東平郡宴賦海棠。蔡寬夫詩史。

蟾輝吐光育萬種。我公得此爲心胸。老桂根株撼不折。我公得此爲清節。孤輪碾空週復圓。我公得此爲機權。餘光燭物施洪惠。我公得此爲經濟。

隱居詩話。李文定迪八月十五日生。杜默作中秋月

詩以獻。其中有句云。雖造語粗淺。然亦豪爽也。

廖正一

正一字明略。號竹林居士。安陸人。元豐二年進士。元祐中。召試館職。除祕書省正字。出知常州。紹聖間入黨籍。貶監玉山稅。有竹林集。

郡齋讀書志。廖明略元祐中。召試館職。蘇子瞻在翰林。見其所對策。大奇之。俄除正字。時黃秦、晁、張、皆子瞻門下士。號四學士。子瞻待之厚。每來必命侍妾朝雲取密雲龍。家人以此知之。一日子瞻又取密雲龍。家人謂是四學士。窺之。乃明略來謝也。

汝墳驛題壁

阿憐二十頗有餘。秀眉豐頰冰瓊膚。無端欲作商人婦。更枉方尋海畔夫。

阿梅笄歲得同歡。懊惱情深解夢蘭。鶯語輕清花裏活。柳條弱嫩掌中看。

墨莊漫錄。明略與唐州二營妓。往來情好甚篤。其一小字憐憐。其一名梅時。憐憐爲大賢所納。明略道過汝墳。有感作詩。方尋海畔夫。用海上有逐臭之夫事譏之也。

答張十八畫

玉人風味夙相親。骨法多奇巫峽神。何幸丹青煩右相。坐令虛室四時春。聲畫集。

和補之梅花

蕙蘭芳草久睽離。偶洩春光此一枝。自許輕盈羞粉白。何人閑麗得鄰窺。寒欺薄酒魂消夜。月入重簾夢破時。幸有暗香襟袖暖。江南歸信不應遲。梅花鼓吹。

蔡肇

肇字天啓。丹陽人。元豐二年進士。徽宗朝。歷官戶部郎。兼修國史中書舍人。以顯謨閣待制知明州。擢職。提舉洞霄宮。會赦。復知睦州。卒。有丹陽集。

王直方詩話。夏喻道言。蔡天啓初見荆公。坐間偶言及盧全月蝕詩。人鮮有誦得者。天啓誦之終篇。遂爲荆公所知。

石林詩話。王荆公在鍾山。有馬甚惡。蹄齧不可近。一日兩校牽至庭下。告公請齧之。天啓時在坐。曰。安有不可調之馬。第久不騎。耳。卽起捉其鬣一躍而上。不用銜勒。馳數十里而還。公大壯之。卽作集句詩贈之。蔡子勇成。能騎生馬駒。復有身著背。

衫騎惡馬。日行百里尙嫌遲。心原落落堪爲將。卻是
君王未備知。士大夫自是。盛傳荆公以將材許之云。

敬用无咎學士年兄長韻上呈子方太僕

兩河郡縣淪西方。西人思漢今未忘。果園蕪沒白草芳。靈州乃赫連勃勃果園。旃裘戲馬誰家郎。車箱峽口澗
谷長。旄頭倒挂回穹蒼。王師西出討獍狂。六花蒺藜來堂堂。前鋒銳頭臂兩槍。伏姦謀索收生羌。天聲隱
鱗搖姑臧。奇兵繚臂斷饋糧。決河有聲如壞圉。城頭擊鐘聲殷牀。萬甲幾欲漂無旁。雖有伉健誰騰驤。一
夫不敢陵彼隍。馬首欲東促歸裝。絨胸有策鬚眉揚。歸來恍恍若有亡。劬勞累日何由償。戰鞍挂屋尋書
囊。目隨飛鴻思帝鄉。彭城老將官橫行。幕中市駿收驪驪。射堂兩部奏清商。應弦破鏑如蜂房。劉涇州射爲
天下第一。笑談斥士羈名王。畫圖遣奏朝明光。詔書留典眞乘黃。錦韉玉勒春風香。平池老柳高雲涼。神駿
在目豪吟觴。跨下躩蹠驚鳧翔。皇居九衢天中央。我時項背聊相望。西城九月天隕霜。夜談關塞評文章。
微言竊比惠與莊。和詩秃筆覺我忙。祝君韜養壽且祥。功名有來成堵牆。忽驚寒暑敗肉漿。鞬弓箛矢用
則張。同文館倡和詩。

題畫授李伯時

鴻雁歸時水拍天。平岡老木尙寒烟。付君餘地安漁艇。乞我寒江聽雨眠。

汎舟橫塘遇雨

平野風烟入夢思。殷勤作畫更題詩。扁舟臥聽橫塘雨。恰遇江南歸雁時。

墨莊漫錄。天啓入官京師日。有藪澤之思。常于尺素作平岡老木。極有清思。因授李伯時。令于餘地。加遠水歸雁。扁舟以載。天啓。題詩云。伯時懶不能竟。他日王漁之取去。以示宗子。令戩。卽取筆點染。如詩中意。天啓見之。愛其佳。後天啓汎舟宿橫塘。遇雨。閉篷而臥。夜分不寢。聞歸雁聲。因復爲詩云。

從孫元忠乞貓

廚廩空虛鼠亦飢。終宵齟齬近秋帷。腐儒生計唯黃卷。乞取銜蟬與護持。墨莊漫錄。

送錢齊珩倅蘇州二首

一尉東南屈指中。雍容車騎舊兒童。郎君扇枕家中晚。侍史焚香省戶空。十里浮梁晴臥竦。一江春水淨磨銅。三年官滿東吳去。爲具扁舟破浪風。

洞庭飛雨打湘弦。燕寢凝香思渺然。四者難并知我老。七言俱賦爲君妍。雜花遶徑迎藍輦。春鳥喧洲起畫船。聞道山公方啓事。重看一鶚在秋天。

除夜宿垂虹亭

東南勝槩未忘情。老去扁舟復此行。小邑歲除無市井。下田水落見農耕。雪消西嶺層樓出。春到重湖鱗甲生。橋下霜蛟貪睡美。爲槌千鼓作雷聲。以上吳郡志。

題李世南畫扇

野水潺潺平落澗。秋風瑟瑟細吹林。逢人抱甕知村近。隔屋聞鐘覺寺深。宋文鑑。

再至學省

平生擾擾復膠膠。學省重來歲又交。騎馬醉遭官長罵。讀書慚被學生嘲。何爲眷戀五斗米。便可經營一把茅。好買江干千箇竹。待看烟雨長春梢。合璧事類後集

過邢惇夫墓下作

人物于今歎渺然。孤墳宿草已生烟。日暮行人道傍歇。應逢年少共談元。詩人玉屑

申王畫馬圖

天寶諸王愛名馬。千金爭致華軒下。當時不獨玉花驄。飛電流雲絕瀟灑。兩方岐薛寧與申。憑陵內廐多清新。肉駿汗血盡龍種。紫袍玉帶眞天人。驪山射獵包原隰。御前急召穿圍入。揚鞭一蹙破霜蹄。萬騎如風不能及。雁飛兔走驚弦開。翠華按轡從天回。五家錦繡徧山谷。百里烏珥遺塵埃。青驪蜀棧西超忽。高隼濃娥散荆棘。苜蓿連天鳥自飛。五陵佳氣春蕭瑟。

苕溪漁隱叢話。東坡樂有申王畫馬圖詩。乃蔡天啓作。氣格有類。東坡世因誤收入。其後姑蘇居世英家。刊東坡前後集遂刪去。

題李伯時照夜白馬圖

天上房星不下來。連山芻粟飽駑駘。龍姿逸駕飛騰盡。賴爾毫端力挽回。苕溪漁隱叢話

題朱之純谷陽園

陸機異時宅。故物無復迹。悠悠谷水陽。野水淒餘碧。我觀豪士賦。文字豈不白。一爲功名誤。末路真可惜。

至今風雨夜。哀鶴鳴不息。千秋得吾人。淨眼照阡陌。結茅風烟際。一悟世網窄。古今一工務。貴賤百年客。閉門橙橘香。隱几冰凍釋。我慙升斗祿。矯首望八極。人生勞佚閒。此殆天所檄。鵬翔亦霄動。鯨噴碧海坼。爲爾具扁舟。送此齒髮迫。至元嘉禾志。

送洞元法師歸茅山

絳節飄飄下紫清。更參隱訣制頽齡。若逢方丈龐眉叟。來受囊中赤甲經。一菴疇昔共嶽峯。古木垂陰歲月深。恐是三生房次律。要隨藤杖去重尋。

題三茅風雨圖

筆閒雲氣生毫末。紙上松聲聽有無。收得三茅風雨樣。高堂六月是冰壺。以上茅山志。

立春至焦山

歲爲茲山一再登。藍輿乘興幕溝塍。春生江海交流處。人在藤蘿最上層。畫鷁搶沙眠百賈。華鯨吼日集千僧。道人邀上東巖宿。坐看冰輪半夜升。京口三山志。

岳山龍池

在宜興有禿角白龍穴其中將雨則見。

南山瑟瑟天作鼓。號召諸龍盡行雨。惟有禿角最先到。潑墨雲中雪鱗舞。名勝志。

冬日遊甘露寺

漕河膠舟水流咽。水關著鍵行者歇。大江伏槎臥長劍。萬頃溼銀寒不結。蓬萊諸仙亦避寒。海門冥冥凍欲折。朔風吹晚雁叫空。蓬卷松杉崖石裂。道人丈室最高處。地爐蒲團穩坐熱。我來乘閑不問道。方牀相

對無言說。鎮江府志。

句

城響濤頭入。山昏雨脚斜。
柳閒黃鳥路。波底白鷗天。
斷逢帆影天斜入。夾鏡波光水倒流。
松江 雪浪齋日記。

疊嶂巧分丁字水。臘梅遲見二年花。

庚溪詩話。天啓紹聖元符閒。爲中書舍人。嘗與元祐諸公遊。遂遭斥逐。嘗守睦州。到任謝表有曰。城譙闐寂。一葉落而知秋。疊嶂縈迴。二水合而成字。復有語云。人謂能狀桐廬郡景物。

鶚按。此二句有全詩見唐杜牧之集。未知孰是。

華鎮

鎮字安仁。會稽人。元豐二年進士。官至朝奉大夫。嘗作會稽覽古詩。子初平亦登進士。爲太常博士。有越中考古錄。

會稽覽古詩

鐵門限 王中令裔孫智永善隸草。爲世所重。求者弗達。戶外之人如市。所居限頽爲之毀。以鐵固之。時號鐵門限。真草千字文。十九年成一千通。柳誠懸稱其書得家法。世傳右軍蘭亭真蹟。弟子辨才。尤加寶祕。貞觀中求之不得。至使蕭翼設奇而取之。山中父老。尙能道其事。

鐵限僧坊迹未移。千通眞草了無遺。蘭亭墨蹟何由見。祇說蕭郎奉使時。

秦望山 秦始皇東巡登高麗覽刻石紀功故曰秦望

秦人兩世盡東游。輦輅曾臨到上頭。睫在眼前終不見。不知登望竟何求。

樵風涇 鄭巨君弘采薪若耶山中得仙人遺箭歸之而獲便風之報千載之下朝暮不渝

碧山重疊水溶溶。南北朝來日暮風。巖壑會稽眞勝絕。樵蘇猶是漢三公。

城山 其山中卑四高宛如城堞吳伐越次查浦句踐保此拒吳又名越王城有佛眼泉洗馬池泉中產嘉魚越拒吳時吳意越之乏水以鹽魚爲饋越取雙魚答之遂解圍去

兵家制勝舊多門。贈答雍容亦解紛。緩報一雙文錦鯉。坐歸十萬水犀軍。

雙筍石 在上虞縣釣臺山高百餘丈若人冕而對峙者其巔有異花每杜鵑啼時開若霞錦神宗崩三年不榮高宗崩花忽變白孝宗崩三年若枯旣而復茂

千尺相高卓翠珉。雨餘雲外露嶙峋。鼎湖龍去蒼髯斷。三載叢花不記春。

放馬澗 在新昌縣支道林放馬之所或譏道人養馬不韻答曰貧道賞其神駿

春草茸茸澗水清。路人猶記昔時名。金羈縱後雙蹄逸。想見風前蹀躞聲。

虞國墅 在餘姚羅壁山襟帶溪山大勢具體金谷郝太宰徧遊諸境樓情於此每至良辰攜子遊憩後以司空臨郡遂卜居之

山列翠屏圍碧落。水流鳴管繞平田。郝家池館蘿蕪沒。金谷形容自渺然。

燕竹越人以其燕來時出筍，因以爲名。

竹箭黃芽欲老時，杏梁日煖燕初歸。他林未聳千竿翠，此地先抽一握肥。

孟橋橋南漢孟嘗宅也。

溪上還珠太守家，小橋斜跨碧流沙。清風不共門牆改，長與寒泉起浪花。以上會稽志。

傅崧卿云：詞格清麗，興

寄深遠，足以垂觀來者。

陳瓘

瓘字瑩中，號了翁，沙縣人。侁子。元豐二年進士。徽宗朝，歷右司諫、權給事中。崇寧中，以黨籍除名。編隸台州，移楚州，卒。靖康中，贈諫議大夫。紹興中，賜諡忠肅。有了齋集。

吳江作

中郎亭榭據江鄉，雅稱詩翁賦卒章。蓴菜鱸魚好時節，秋風斜日舊烟光。一杯有味功名小，萬事無心歲月長。安得便拋塵網去，釣舟閑繫畫闌旁。

中吳紀聞：陳文惠公留題松陵詩，其末有秋風斜日鱸魚鄉之句。屯田郎林峯爲吳江日作亭江上，因以鱸鄉名之。了翁初至吳江，簿賦詩云：箬仕之初已無戀官職之意矣。

寄覺範長沙

大士游方興盡回，家山風月絕纖埃。杖頭多少閑田地，挑取華嚴入嶺來。苕溪漁隱叢話。

自合浦還清湘寄虛中弟

行徹天涯萬里山。月明方照海珠還。瘴鄉來往渾閑事。聊爲清湘一破顏。桂林府志。

蘇文饒往昌國意頗憚之送以詩

已聞舟楫具。那得苦留君。雨過霜風急。帆飛雪浪分。長途方策足。暇日正論文。功業他年事。風波豈足云。

文饒自京師還欲往昌國而風作不可渡絕句戲之

欲衝高浪卻沈吟。酒近瀛州懶得斟。莫道顛風無好意。爲君吹過遠歸心。以上定海縣志。

沈偕

偕字君與湖州人。元豐二年進士。

齊東野語。吳興東林沈偕。老老之子。家曉於財。少遊京師。入上庠。好狎游。時蔡奴擊價甲於都下。沈欲訪之。乃呼一賣珠人於其門。首茶肆中。議價再三。不售。撒其珠于屋上。賣珠者窘甚。沈笑曰。第隨我來。依汝所索。還錢。蔡于簾中窺見。令取視之。珠也。大驚。惟恐其不來。後數日。乃詣之。其家喜相報曰。前日撒珠。即至矣。接之甚至。一日。攜上雙樓。樓乃京師酒肆之甲。飲徒常千餘人。沈徧語在坐。皆令極量盡歡。至夜盡爲還所直而去。于於豪侈之聲。滿三輔。旣而擢第。盡買國子監書以歸。

遺賈耘老蟹

黃杭稻熟墜西風。肥入江南十月雄。橫跪蹒跚鉗齒白。圓臍吸脅斗膏紅。螯須園老香研柚。羹藉庖丁細擘蔥。分寄橫塘溪上客。持螯莫放酒杯空。

齊東野語。賈耘老隱苕城南橫塘上。沈以詩遺之。蟹得詩不樂。和韻詆之。沈得報怒曰。吾聞賈多與郡將往還。預政言人短長。曾爲人所訟。吾以長上推之。乃鄙我若此。復用韻報之。有闕雌還卻勝尖雄之句。賈晚娶眞氏。人謂賈秀才取眞縣君以爲笑。沈所指爲此。賈尋悔之。而戲語已傳播矣。

周 鏗

鏗字廉彥。鄞人。元豐二年進士。初調桐城尉。不赴。豐稷范祖禹薦知南雄。忤時相。又元祐黨籍。退休西湖。有集。

寄題錢公輔衆樂亭

雙虹倒影上簷楹。碧水澄空一鏡明。野草閑花無限趣。短藜幽榜不勝情。已知風月隨人意。聊爲湖山載酒行。卻訝錦囊賡夢草。坐令詩思繞寰瀛。延祐四明志。

佛蹟巖 在慈谿縣東北大蓬山。

靈山名大蓬。香水靄蘂。龍祇久覆護。雲物翳深谷。拂衣向劫中。神斧斷蒼玉。至今天人尊。靈跡印金粟。頗聞開士識。飛錫隱巖麓。坐令湖海閒。香供走川陸。巍巍虔報地。色相儼金屋。緬想舊巾瓶。猶能慰心目。籃輿訪蓮社。一笑欣自足。撫事動幽尋。疇能念榮辱。松爐曩如見。餘力付碁局。更覺夢中身。儻然百無欲。寧波府志。

題全氏萬金樓

幾年江上夢黃鶴意悠悠百尺獨臨水萬金難買秋杵聲喧藥市闌影浸漁舟應有湖中客分身向此遊

甬上耆舊集

襲原

原字深之處州遂昌人第進士徽宗朝歷兵部侍郎寶文閣待制奪職居和州嘗入元祐黨籍

贈王筌并序

筌字子真富鄭公客元豐中賜號冲照處士元符三年從劉先生受上清籙華陽洞便門一夕忽開自左慈得進洞宮旋閉且千載矣

華陽新報洞門開應爲高人受籙來試問玉門砂遠近未饒元放是仙才

茅山志

陳侑

侑字君舉沙縣人世卿子以父任補太廟齋郎調蔡州通判屢知泉尉惠三州以朝議大夫致仕卒

題泉州萬安橋

跨海爲橋布石牢那知直下壓靈鼉基連巖嶼規模壯勢截淵潭氣象豪鐵馬著行橫絕漠玉鯨張鬣露寒濤縑圖已幸天顏照應得元豐史筆褒

方輿勝覽泉州萬安橋一名洛陽橋嘉祐間太守蔡君謨勸州

民成此橋元豐初運使王公嘗進畫本天子嘉賞故卒章及此

宋詩紀事卷二十八

李昭玘

昭玘字成季，任城人。濤五世孫。自洛徙齊。元豐二年進士，以薦爲祕書正字。歷起居舍人，崇寧入黨籍，奪官，閑居，自號樂靜先生。有樂靜集。

雲龜李氏序略云：伯父詩奇麗，適章

斷句絕，餘思羨溢，得詩人味外之味。

春日遊金明池

日有江湖思，坐無車馬塵。橫橋自照水，啼鳥不驚人。輦路晴飛絮，宮門暗鎖春。多情老園吏，灑地喜相親。

宋文鑑。

觀劉孝嗣寫真

程生高價傳兩都，劉子骨相真丈夫。呼見當軒試一展，嚔嚔指點相驚呼。此應前日坐頭客，何乃不語嚴襟裾。胸中豪氣不可狀，但見粉墨無紆餘。虎頭食肉亦天賦，尺面封侯宜不誣。須知中令有真相，忽效香山悲故吾。凌煙功臣易磨滅，貞觀學士猶傳模。當時人物不易得，曾看風神有此無。

錢唐 厲鶚 緝
歙 吳震生 勘定

觀江都王畫馬

落落名王唐帝孫。筆端飛灑只逡巡。風雲絕足知何在。粉墨餘姿若有神。可信權奇盡龍種。不應膿股失天真。驂騑寂寞龍眠死。更復何人接後塵。

觀畫

夢澤正天寒。南峯帶秋色。詩人句不盡。餘意傳粉墨。年來兩眼昏。吏牘苦侵迫。明窗展橫素。刮膜謝砭石。往時蓬萊宮。圖畫燦東壁。拾遺老陰峭。思訓麗春碧。經年一過眼。行繞不暇食。太行逢李生。筆勢妙思索。未成真營工。不俗已高格。安得十萬錢。盡致鵝溪白。不須念衣裘。髻灰日滋殖。寫我江湖心。浩蕩滿千尺。
以上擊畫集。

句

靜疑多事非求福。老覺無心勝攝生。
優古堂詩話。

劉 夆

夆字偉明。江西安福人。元豐二年進士。復中詞科。歷官知峨眉縣。改太學博士。元符中。有事南郊。進大禮賦。除祕書省正字。徽宗立。改著作佐郎。實錄院檢討。卒。有龍雲集。

走筆答郭子隆句稽

春歸幾何時。綠樹陰已滿。蕭條子雲巷。誰借吹噓暖。常日雙柴扉。深扁類休澣。穉燕掠翩翾。疎蟬弄淒斷。擷芳聊自娛。任從食息嬾。嶷嶷棲鸞郎。蝸居開三款。兒童憚逢迎。應客事謾誕。謝絕高軒榮。祇增鼯鼠短。

賴君不吾靳，慙慙接閭侃。酸然梅雨天，煩襟斗滌浣。

送李侯朝散還任

西山閱今昔，章水弄清泚。雲陴插天半，滕閣中隱起。青鴛千萬家，湖光豁如洗。鍾陵一都會，信亦非偶爾。君來無幾何，所得已倍蓰。笑談送白日，慷慨拾遺軌。成詩殆百篇，天籟落凡耳。事竣告還朝，相送情難已。悲歌一再行，杯觴覆蒼翠。秋標拔孤雲，鴻鴈思吾子。

人日

去年人日螺江邊，今年人日在通川。故家浩蕩五千里，客子騷屑心茫然。霜蘆盡解故時葉，生意陡爾歸蘭荃。海風如刀冰塞渡，欲航野水雪暗天。他鄉信美非吾土，香草悅魂真浪傳。南冠故聲祇操楚，劉章雅志惟歌田。五秉如單費廩粟，一囊就盡持餐錢。顛毛冉冉不吾與，齒根浮動輕于翾。小雀誰言畏死鷁，未肯屈折同杯椽。章貢直西三徑在，爾來望眼欲成穿。科桑洗竹真吾事，孰使齷齪纒充員。何時解得無拘束，歸釣潭頭楓葉鱸。

秋日儀真卽事

丁字河頭紋錦翼，似有東園故鷓鴣。天風蕭蕭吹汝急，遣汝周章無好色。江籬羃歷過行人，一顧爲之三歎息。我願舴艋從溪翁，雙春鋤邊作幽客。

莆田雜詩

清樾陂陀外，春深四五家。叢祠下簫鼓，平楚暗桑麻。水國潛蚪偃，天程去鳥賒。仙山仍在目，瀟灑送生涯。

九曲池

昔帝橋鳥下日邊。曾留清蹕此踟躕。魚龍窟暗浮春漲。鳧雁行低破暝煙。星閣摧頽空歲月。蕪城埋沒舊山川。後庭一曲陳家破。更看當年水調傳。

題吉水南華院

紫翠浮浮奪晚昏。生涯谷汲與松焚。俗塵一點自應少。終日到門惟白雲。
野興由來愜杖藜。層巒影裏見翬飛。虛堂一炷起凝碧。化作九天雲染衣。以上龍雲集。

獨醒雜志。吉水南華院。在山谷窮絕處。有白

雲堂。劉偉明未第時。曾寓書劍於此堂。有詩。

劉 跋

跋字斯立。摯之子。王鞏之壻。與弟蹈同登元豐三年進士。遭黨禍。爲李延年所誣。編管壽春。自號學易老人。有學易集。

題半隱堂

一堂圖籍自陶冶。三徑蕭蘭俱歲華。定非平恩許侯宅。會是仲長公理家。端居雅不煩摒擋。佳設頗嘗成咄嗟。唯我身閑數來往。徽弦一汎卽生涯。宋文鑑。

絕句

麥隴漫漫宿橐黃。新苗寸寸未經霜。手中馬竈餘三尺。想見歸時如許長。能改齋漫錄。

句

急雨欲來先暑氣。涼風已過卻秋聲。龍山寺。優古堂詩話。欲成塞士賦。應作半人詩。病中。後村詩話。

黃裳

裳字冕仲。南平人。元豐五年進士第一。累官端明殿學士。禮部尚書。有演山集。

王悅序云。逸歌長句。駿發踣厲。兼衆體而有之。

簡元輿祠部

百花巖上仙人住。巖下爲州山水聚。白頭青冢南北人。倒影沈沈獨懷古。倚闌把酒與誰同。況是使君爲獻主。應喚漁舟疎葦中。旋睽游鱗落紅縷。祕書座上最軒昂。能共春雲爭態度。紅衣帶月今何處。幾轉春殘掩朱戶。飛船送客空斷腸。梁塵謾落聲中句。虛白亭前湖水閒。忽爲霓裳起思慕。出門沙土亂如雨。薰風吹夢天南去。

燕子樓

盼盼初歸樓上時。相如燕子長雙飛。有才將色世閒少。況復節義猶堪依。將軍一去十餘載。玉簫瑤瑟無心解。豈不能死空相隨。以色累公非所知。白老曾爲賦詩客。風裊花枝醉無力。後會勳郎漢陽驛。因語歔歔已成昔。走筆還廣美人句。猶感白楊堪作柱。我來登賞非唐人。尙引多情聊愴神。人生真盡皆爲塵。百年一餉難留春。高樓人散誰復親。只有燕子年年新。

社日遊雲門山

不須扶我自登山，脚力能勝十八盤。一字雁低頭上過，兩城人細掌中看。雖知北戶緣猶在，卻笑南柯夢未闌。忽見歸雲應是信，滿襟先得洞天寒。

秋日有感

秋來猶寄一涯天，葉葉秋聲似去年。可恨蕭晨長在客，不堪孤館更聞蟬。以上演山集。

晁說之

說之字以道，濟州鉅野人，端彥之子，自號景迂生。元豐五年進士，蘇軾以著述科薦，元符末與崔鷗同書邪籍，靖康初召爲著作郎，試中書舍人，兼東宮詹事，建炎初終徽猷閣待制，有景迂生集。陳叔易被召出山作二絕句。

東海一生垂釣客，石渠萬卷校書郎。丈人風味今如此，鶴到揚州興更長。鶚按：此首本集無。

處士何人爲作牙，盡攜猿鶴到京華。故山巖壑應惆悵，六六峯前只一家。

風月堂詩話：唐秦系和章蘇州詩，具銜云：東海釣客。試祕書省校書郎。本朝陳恬叔易隱陽翟澗上，號澗上丈人。大觀間，宋喬年諷監司薦于朝，起爲館閣，書疏中猶不去丈人之號。晁以道作詩譏之，其後以道謁叔易于京師，有婢應門，嚴妝麗服，熟視之，乃故時澗上赤脚也。以道又作一絕云。

宮殿千門白晝開。三郎沈醉打毬回。九齡已老韓休死。明日應無諫疏來。

超然亭戲作時爲明州船塢

終日一杯終日醉。看潮初上看潮回。自疑前世陶貞白。乘興閑遊鄞縣來。

贈筆處士屠希

屠希祖是屠牛坦。今日卻屠秋兔毫。自識有心三副健。可憐無補一生勞。

排悶

鄜時來爲吏。多愁尙喜論。山川分漢郡。人物客羌村。老杜詩有羌村。宮廢神仙在天清貳負昏。山海經貳負之精

在此。莫言無妙麗。土穉動金門。

陸放翁跋景迂此詩云。鄜人善作土偶兒。精巧雖都下。莫及宮禁及

貴戚家。爭以高價取之。喪亂隔絕。南人不復知。此句遂亦難解。可歎。

鄭洛道中遇降羌作鶚按宋文鑑作晁詠之。

沙場尺箠致羌渾。玉陛俱承雨露恩。自笑百年家鳳闕。一生腸斷國西門。

老學庵筆記。晁氏世居都下。昭德坊。其家以元祐黨人。及元符上書籍

記不許入國門者數人。以道其一也。鄭洛道中遇降羌。以道詩云云。

答陳叔易求長松

長松不經黃帝手。小斲漫翻嵩室雲。縱有何堪寄夫子。鼎頭寶氣自氤氳。

思四明所居

今朝旅恨到何處。軒窗直到桃花渡。桃花渡上風吹雨。道人芒屨誰來去。

贈鄜田玘

前世能歌田順郎。今身追悔太昌昌。戲泥巧盡羣兒態。休憶小姑初倚牀。以上景迂生集。

老學庵筆記。承平時。鄜州田氏作泥孩兒。名天下。態度無窮。一對至直十緡。一牀至三十千。一牀者。或五或七也。子家舊藏一對。臥者有小字云。鄜州田玘製。

句

干戈難作牆東客。疾病猶存硯北身。

墨莊漫錄。臬說之以道作感事詩云。牆東用王君公事。而硯北身乃漢上。題襟集。段成式書云。杯宴之餘。常居硯北。蓋言几案南面。人坐硯之北也。

晁補之

補之字无咎。年十七。從父端友宰杭州之新城。著錢唐七述。受知蘇軾。舉進士。試開封及禮部別院。皆第一。元祐中。爲著作郎。紹聖末。謫監信州酒稅。起知泗州。入黨籍。有雞肋集。

芳儀曲

金陵宮殿春霏微。江南花發鷓鴣飛。風流國主家千口。十五吹簫粉黛稀。滿堂詩酒皆詞客。奪錦揮毫在瑤席。後庭一曲風景改。收淚臨江悲故國。令公獻籍朝未央。敕書築第優降王。魏俘曾不輸織室。供奉一

官奔武疆。秦淮潮水。鍾山樹。塞北江南。易懷土。雙燕清秋。夢栢梁。吹落天涯。猶並羽。相隨未是斷腸悲。黃河應有卻還時。寧知翻手一朝事。咫尺山河不可期。倉皇三鼓。淖沱岸。良人白馬。今誰見。國亡家破。一身存。薄命如雲。信流轉。芳儀加我名字新。教歌遣舞。不由人。採珠拾翠。衣裳好。深紅暗盡。驚胡塵。陰山射虎。邊風急。嘈雜琵琶酒闌泣。無言數徧天河星。只有南箕。近鄉邑。當年千指。渡江來。千指不知身。獨哀中原骨肉。又零落。黃鵠寄意。何當回生。男自有四方志。女子那知出門事。君不見李陵。椎髻泣窮邊。丈夫漂泊。猶堪憐。

避暑漫鈔。李芳儀。江南國主李景女也。納土後。在京師。初嫁供奉官孫某。爲武疆都監。爲遼中聖宗所獲。封芳儀。生公主一人。趙至忠。虞部自北歸。明嘗仕遼。爲翰林學士。修國史。著虜庭雜記。載其事。時晁補之爲北都教官。覽其書而悲之。與顏復長道。作芳儀曲云云。江州廬山真風觀。李圭有國日。施財修之。刊姓氏于石。有太寧公主。永禱公主。皆李景女。不知芳儀者孰是也。

行路難和鮮于大夫子駿

贈君珊瑚夜光之角枕。玳瑁明月之雕牀。一繭秋蟾一麗殺。百和更生之寶香。穠華紛紛白日暮。紅顏寂寂無留芳。人生失意十八九。君心美惡誰能量。願君虛懷廣末照。聽我一曲關山長。不見班姬與陳后。寧聞衰落尙專房。

茗溪漁隱叢話。余觀雞肋集。古樂府是其所長。辭格俊逸可喜。

自題畫留春堂山水大屏

胸中正可吞雲夢。蓋裏何妨對聖賢。有意清秋入衡霍。爲君無盡寫江天。

和李秬雙頭牡丹

二喬新獲吳宮怯。雙隗初臨晉帳羞。月地故應相伴語。風前各是一般愁。

廬山

南康南麓江州北。五百僧房綴蜜脾。盡是廬山佳絕處。不知何處合題詩。

塔山對雨

在新城縣

山外圓天一鏡開。山頭雲起似浮埃。松吟竹舞水紋亂。坐見溪南風雨來。

謝王立之送蠟梅

去年不見蠟梅開。準擬新年恰恰來。芳菲意淺姿容淺。憶得素兒如此梅。以上雞肋集。

墨莊漫錄。王直方立之父。名械。家多侍兒。而小蠻素兒尤妍麗。王嘗以蠟梅花送晁無咎。以詩謝之。有句云云。

考校同文館戲贈子方兼呈文潛

二十年來曹子方。新詩曾見未能忘。多才善謹稱物芳。吳娃席上呼作郎。瞥然何許歲月長。只今未老毛髮蒼。自言逢掖非昔狂。傳經華陰夫子堂。何曾騎馬身挾槍。詔隨上將西擊羌。董蒲跗注謂我臧。夜行馬嶺飢無糧。鼓鼙驚谷騎卷岡。吏呼爲微醉在牀。前鋒奄至靈武傍。中堅反後無敢驤。城開三日牧蔽障。百

輓載箭千囊裝。旌旗立壘烏鳥揚。還軍不省一矢亡。坐師無獲勞不償。鏡歌又奏虛錦囊。秋風鱸魚思故鄉。銳頭宜董鶴鵝行。得官猶領萬驢驢。王城對巷如參商。那知連月居茲房。稱多量少少非我王。羣公古鏡懸秋光。閉門飯飽庭葉黃。秋盤登兔官酌香。吳音訛雜變秦涼。令壺老柏笑覆觴。淹留平日夢欲翔。得君可樂殊未央。人生傾蓋何所望。結交松柏要冰霜。中天號出玉璽章。青驄御史騰康莊。歸期屈指未可忙。聞君況有夢虺祥。生女不惡嫁鄰牆。掃軒留客具酒漿。與君更約城南張。同文館倡和詩

余 幹

幹字樗年。

次韻贈无咎學士

毗陵城如金斗方。往事歷歷那能忘。相逢童子佩蘭芳。秀發人指誰家郎。未幾重見突而長。卽今不覺秋蓬蒼。戲笑豈復爲兒狂。追昔宓子初登堂。辭鋒峭拔森刀槍。器識況遠包夷羌。陽秋寧官露否臧。有子遊學先聚糧。相將百里陟岵岡。邂逅一揖坐僧牀。大辯傾注如無旁。天馬方謂先鶩驤。觀魚誰復駐濠隍。瓜期受代垂趨裝。當路奏牘交稱揚。行將起擢奄云亡。坐令志氣不得償。傳家豈詫錢一囊。諸兒經行名州鄉。挾書繼踵諸父行。旋見天衢飛驢驢。論治直要超周商。術卑效淺笑杜房。況是亨運遭興王。致君紹祖邦家光。何止追考歸焚黃。邃庭朝露明芸香。異書滿閣秋氣涼。詠歌閒成隨豆觴。讀之如欲凌雲翔。暫迂大手離未央。□□□□□望。挈篋來寄深閨霜。賓興賢能視文章。尊尙周孔麾韓莊。搜奇殆有通夕忙。英游疑動聚星祥。我歸復翳環堵牆。世味已能如飲漿。羲皇上人琴一張。同文館倡和詩

耿南仲

南仲字晞道。開封府人。元豐五年進士。徽宗朝爲太子詹事。改寶文閣直學士。欽宗朝。陞尙書左丞。門下侍郎。高宗卽位。罷爲觀文殿學士。提舉洞霄宮。言者論其主和誤國。鐫秩安置南雄州。行至吉州卒。

秋日同文館次鄧慎思韻

秋日同文館。閑無一事依。鬪羊誰得雋。倦鳥客思歸。寢處還相向。過從不患稀。何當有星聚。誰爲問璇璣。秋日同文館。褻然觀國光。泗濱何限磬。倍麓易求梁。劍氣頻衝斗。錐鋒定出囊。於余慙拙匠。操尺預量長。秋日同文館。新涼逐雨回。棘垣要吏局。蕙帳憶山隈。射爲巧狙發。田因文豹來。西城隨分鎖。夫我室多才。次韻謹思九日考罷試卷呈同院諸公

賁珍已選茂良克。猶被拘縻類縛鐘。淥酒強陪高館飲。黃花不似故園逢。棊枰苦戰挑燈坐。薜壁閑題捧硯從。風葉滿庭秋索寞。更籌向盡睡方濃。以上同文館倡和詩。

柳子文

子文字仲遠

次韻呈慎思學士

咸韶漢武來何方。鏗鏘入耳安能忘。陽春蘭芷秋菊芳。金門詞客青袍郎。昭回下燭光燄長。深山大澤龍蛇蒼。浩歌激烈元非狂。正逢聖主開明堂。風煙關塞收旗槍。舞干兩階臣戎羌。喋血拓境謀非臧。邊城夜

行休齋糧。採詩不復嘲青岡。蚩蚩戢羽戍婦牀。移文北山猿鶴傍。渥洼朱龍兩服驥。胥靡版築罷浚隍。白環楛矢貢篚裝。航海萬里風帆揚。犬羊種落嗟唇亡。諸蕃入學願可償。槐花舉子促書囊。成均貢士賢登鄉。東門宣詔札十行。我慙驚駘追驪驪。何敢望回不及商。毛遂未至空連房。同舍十九人。余獨後入。賴有墨妙。江都王傳摸共分此日光。驂騑綠驃兩耳黃。想見蹙踏披天香。坐覺暑退秋堂涼。拘攣齷齪漫引觴。門外烏兔雙飛翔。悠悠逝川東未央。故山魚鳥空相望。鄧侯意氣摩秋霜。朝吟百篇暮千章。駢羅經史貫列莊。落紙但見書吏忙。孔鸞羽儀各效祥。鄙夫不學空面牆。先饋不用驚五漿。烏號要須賁育張。同文館倡和詩。

商倚

倚淄川人。官太學博士。入元祐黨籍。

秋日同文館次鄧慎思韻

秋日同文館。高堂燕集齊。杯盤供魯酒。殺核欠張梨。楊孟持新論。韓莊鄙舊題。須知宗匠手。文采冠朝閨。秋日同文館。何人獨擅場。養莪方在泚。琢玉已成章。筆別千鋒陣。庭焚一炷香。得賢從此始。豈特致民康。秋日同文館。棲林看晚雞。斗垂宮殿北。月轉戶庭西。酒勸杯中淥。詩分燭下題。何時還九陌。細雨莫成泥。
初入試院

承詔掄材敢倦行。廣庭深鎖待羣英。分場自敵三千客。決勝誰降七十城。夜案尙閑塗卷筆。曉堂方聽讀書聲。每早嘗聞无咎諸公讀書。歸時還有黃花否。已覺秋風滿袖生。以上同文館倡和詩。

李之儀

之儀字端叔。之純從弟。元豐中舉進士。元祐初爲樞密院編修官。從蘇軾於定州幕府。元符中監內香藥庫。徽宗朝提舉河東常平。初草范純仁遺表。編管太平州。卒入黨籍。有姑溪集。

揮塵後錄。元祐開。端叔于尺牘尤工。

東坡先生稱之。以爲得發遺三昧。

利州湯泉

華清賜浴記當年。偶託荒山結勝緣。未必興衰異今昔。曾經天女卸金鈿。

墨莊漫錄。利州褒禪山相近。地名平疇。鍾湯泉。溫溫可探。是朱砂湯。人傳

昔有兩美人來浴。既去。異香郁郁。累日不散。端叔過浴池上。作詩云云。

贈人 一作與當塗楊球

通中玉冷夢偏長。花影籠塔月浸涼。挽斷羅巾留不住。覺來猶有去時香。情隨榆莢不勝飄。心似楊花暖欲消。擬借瓊林大盈庫。約君孤注賭妖嬈。

詠呂吉甫宅晉朝雙檜用劉夢得韻

故迹悲涼古木奇。勢分庭下蔚相差。霜根半露出林虎。畫影全舒破賊旗。寶界曾回鋪地色。節旄遠映插雲枝。劉郎風韻知誰敵。儒帥端能表異時。

墨莊漫錄。揚州呂吉甫觀文宅。乃晉鎮西將軍謝仁祖宅也。在唐爲法雲寺。有雙檜存焉。猶當時物也。劉禹錫有詩。吉甫家居時。檜尙依然。建炎兵火。樹遂亡矣。

李去言相別二年忽得書知在吳中答書偶成

官路相逢一笑休。共知身世兩虛舟。楚材有用誰青眼。趙將無功枉白頭。會見姓名通北闕。何妨風韻冠南州。求田接武如鳧鷖。只欠元龍百尺樓。

書扇

幾年無事在江湖。醉倒黃公舊酒壚。覺後不知新月上。滿身花影倩人扶。

會延之置酒後閣侍人以帶帶求詩

御醅盞畔千頭菊。椽燭光中四和香。紅紛莫嗟霜滿頰。也應歌處似周郎。以上姑溪集。

借范光祿麻師一雪雀圖時任許幕

圖中塵跡已冥冥。說著麻翁耳便醒。凍雀高低棲舞白。枯槎零亂倚寒青。欲憑妙手聊模寫。暫借遺蹤作典刑。老去未能忘著相。他年要伴草堂靈。過庭錄。

還俗道士

聞道華陽客。儒衣謁紫微。舊山連藥賣。孤鶴帶雲歸。柳市名猶在。桃源夢已稀。還家見鷗鳥。應媿背船飛。老學庵筆記。

趙德儒

德儒爵里未詳。與李端叔倡和。

中隱庵

在昔避世賢。隱居豈自喜。甘守西山餓。清洗潁陽耳。一旦事高尚。萬古激貪鄙。孰謂樂山林。便可輕朝市。竊笑效顰人。不知捧心美。妄將凡庸姿。敢希明哲軌。盜此嘉遯名。紛若干時子。仕途指捷徑。矯僞汚青史。聖朝揚仄陋。采綠無遐邇。不遺下體對。況乃中鄉芑。多士生此時。貧且賤焉恥。夢自傅巖來。獵從渭濱起。隱居聞此風。翻然烏可已。聊爲知者道。庶達名庵旨。姑溪集附

王鞏

鞏字定國。莘縣人。文正公旦之孫。工部尚書素之子。嘗倅揚州。坐與蘇軾遊。謫監筠州鹽稅。罷還。官至宗正丞。入黨籍。自號清虛先生。有集。

墨莊漫錄。王定國寄詩于東坡。答書云。新詩篇篇皆奇。老拙此回真不及矣。窮人之具。輒欲交割與公。魏道輔見而笑曰。定國亦難作交代。只是且權攝耳。

輓蘇黃門子由

憶昔持風憲。防微意獨深。一時經國慮。千載愛君心。坤道存終始。乾綱正古今。當時人物盡。惆悵獨知音。自注。元祐中議册后。宣仁御文德殿。發册公語余。密告呂丞相微仲。母后御前殿。茲不可啓。微仲明日留身。宣仁詔宮中本殿發册時。人無知者。

已矣東門路。空悲未盡情。交親踰四紀。憂患共平生。此去音容隔。徒多涕淚橫。蜀山千萬疊。何處是佳城。自注。公前年寄書約予至許田。曰。有南齋翠竹滿軒。可與定國爲十日之飲。此老年未盡之情也。

靜者宜膺壽。胡爲忽夢楹。傷嗟見行路。優典識皇情。徒泣巴山路。終悲蜀道程。弟兄仁達意。千古各垂名。

自注。公與子瞻嘗泊巴江。夜雨。相約伴選對。竟不果歸。今子瞻葬汝。公歸眉山。王祥有言。歸葬仁也。留葬達也。墨莊漫錄。

蕭相樓

盧杞姦邪四海憂。相君邦國自同休。分符朝去雲中闕。開府南來江上州。百尺樓高瞻故國。九華山色倚晴眸。定知直道傳千古。杜牧文章在上頭。

方輿勝覽。杜牧池州重建蕭相樓記。蕭丞相復爲刺史時。樹樓于大廳西北隅。上藏九經書。下爲刺史便廳。事大歷十年乙卯建。會昌四年甲子權刺史李方元具材。刺史杜牧命工。皆仍舊制。自初至再。凡七十一年。

湘山光孝寺

半嶺風吹草木香。落堦花雨送春忙。從師遠借雲庵臥。還我平生午枕涼。蓮社緇黃常得伴。鹽門妻子亦相將。化身欲似河東柳。更向山頭望故鄉。桂林府志。

楊天惠

天惠字佑父。鄆縣人。元豐進士。攝邛州學官。徽宗朝。上書言事。入黨籍。卒。左丞馮澥志其墓。號西州文伯。

次韻吳帥題保福壁

淨餅猶貯近頒冰。拄杖還扶舊醉藤。遮莫簪花倩天女。未妨燕坐折談僧。

送孫正忠移成都小漕

升平芝菌效神奇。況乃賢豪用世資。人物熙寧中興日。風流荆國適同時。起家便作三公客。乘傳何爲九

折馳少府。但分新賜節。石渠猶借舊官儀。素心久辨經綸計。妙意前知遇合期。聊與西南成勝事。暫將清獻續良規。橋橫萬里重開府。水接雙流共去思。悵惻參卿無限意。道旁索筆強題詩。

溫江縣二瑞頌并序

溫江隸成都。遠王畿三千幾百里有奇。蓋西南偏邑也。政和二年夏六月。有嘉禾產於嚴氏之圃。凡二本。是歲十二月。復有甘露降于學宮之柏。凡三日。鄉以白縣。縣以白府。府遣從事卽縣覈狀。皆有實可復。不誣。輒具書若圖。上尙書省。以聞。詔下其副。尙書禮部藏焉。于是前縣臣宗道馳書諭假彭山丞臣天惠曰。盍頌諸臣對越北闕而奏頌曰。

於皇御極。百志惟敘。曰農而農。曰士而士。爾安爾宮。爾寧爾畝。恩詔數下。仁滂德撫。農飽以歌。士喜式舞。協氣從之。祥嘏如雨。迺產嘉禾。以慶農扈。迺降甘露。以幸士子。其慶伊何。珠穗紛舉。俾爾甌窶。戶有億秬。其幸維何。雲液醲滑。俾爾膏馥。濡及嬰孺。維我哲后。博臨下土。相彼多禾。均此靈露。道拜稽首。誕告奔走。惠拜稽首。盱衡語語。敢獻稗官。以贊矇瞽。以上成都文類

劉拯

拯字彥脩。宣州南陵人。第進士。元豐中。爲監察御史。徽宗朝。累遷吏部尙書。

空心潭

碧潭發幽石。瀟灑無纖塵。寒光湛秋月。有物難比倫。離鉤況無魚。千尺徒垂綸。到此心已空。何用濯我纓。
破山寺志

張商英

商英字天覺，號無盡居士，蜀之新津人。登進士第，爲章惇所薦。紹聖初，累擢左司諫、工部侍郎。大觀中，歷尙書右僕射、中書侍郎，貶衡州。復官卒，贈少保，諡文忠。曾入黨籍，有無盡集。

揮塵前錄：張天覺紹聖初，章子厚薦登言路，攻擊元祐諸賢，不遺餘力。至欲發溫公、呂正獻公之墓，晚既免相，詩有回看同列進，不覺寸心忙之句。桐江集商英雄辨詭譎，自謂得兜率悅之傳，天下號相公禪。

孤憤吟

青青一本桑，下可百夫息。冷冷一井泉，上有千人汲。千里以爲郡，百里以爲邑。生齒豈不繁，教化緊爾力。何事北窗人，歎此徒勞職。宋文鑑。

留題護國寺時爲雒縣主簿，經攝堦薰鑪稅。

薄宦區區可歎嗟，寂寥寒館過村家。神錫豈向囊中出，寶劍聊憑醉後誇。就祿勉持毛義檄，讀書空滿惠生車。掩關不識青春好，一夜狂風已落花。成都文類。

靈泉寺著法華合論作寺在歸州西三里。

合道通爲七卷經，默教開眼示羣生。不須天女添瓶水，自有靈泉一派清。方輿勝覽。

中秋

不見柯山客，中秋月又圓。夜來清滴露，天末淡收煙。念遠情非俗，凌虛骨欲仙。素琴鳴此恨，相與對嬋娟。
合璧事類前集。

讀書燈

小籠疎四面，明紙罩孤燈。自小共寒熱，相親如友朋。舊書曾徧照，新燭莫相憎。幾爲吟詩苦，留光到夙興。

合璧事類外集

貓

白玉狡獪藉錦茵，寫經湖上淨名軒。吾方大謬求前定，爾亦何知不少喧。出沒任從倉內鼠，鑽窺寧似檻中猿。高眠永日長相對，更約冬衾共足溫。

合璧事類別集

華陽洞

素虎班蚪躡紫煙，幾看滄海變桑田。赤城玉笥尋真後，又到華陽第八天。

茅山志

見山亭

簾卷疎煙醉眼開，浮雲飛盡見崔嵬。苦嗟霖雨遮藏久，深謝清風引致來。丹桂有時明月滿，舊山無路白猿哀。禪僧指我真空理，心火茫然一夜灰。

杭州府志

青原山七祖塔

一派青原出少林，信衣到此只傳心。尋常示衆無人會，盡向廬陵米價尋。

青原山志

題睢陽五老圖肅奉嚴韻

德政調元向道閑，天朝詔許實辭冠。丹心耿耿懸象魏，青史昭昭照玉桓。晚節友賢陽鳳暖，老年憂世谷駒寒。太平猶自存龜鑑，後進儀刑仰慕看。

式古堂書考

吳與

與字可權。漳浦人。元豐五年進士。餘干令。累遷奉議郎。通判潮州。

白雲亭

在餘干縣白雲城上。唐李德裕建。

高城頓崇岡。上與白雲遇。昔賢此登臨。懷古得佳句。結亭自何人。歲月更已屢。古冢僅存名。頽簷颯將仆。我來訪遺蹤。環賞愜幽趣。鳩工扶墜陁。選木換墜蠹。津梁五道人。悉力願相赴。經營未終月。突兀見輦霧。英英蒼梧雲。朝暮此屯聚。時從南山來。條向高巖去。去來本無心。虛亭日新故。因之望故鄉。更識親闈處。南山互牽情。凭闌目空注。饒州府志。

鄒浩

浩字志完。常州晉陵人。元豐五年進士。擢右正言。坐諫立劉后。謫新州。徽宗朝。遷吏部侍郎。再謫永州。大觀元年。復直龍圖閣。卒。入黨籍。高宗朝。贈寶文閣學士。諡曰忠。有道鄉集。

送俞秀老歸維揚

踏雪驅驅原憲履。御風獵獵老萊衣。情投豈比鍾山出。興盡還同剡水歸。煬帝池邊松蔭遠。維摩室內燭光微。攜筇促席徜徉處。應記當年接下機。

湖上雜詠

荷葉如錢三月時。幅巾藜杖一追隨。爾來勝事知多少。惟有風標公子知。杜牧之以白鷺爲風標公子。

過永州澹山巖作

我入幽巖亦偶然。初無消息與人傳。訓狐戲學仙伽客。一夜飛鳴報老禪。以上道鄉集。

冷齋夜話。鄒志完南遷北還過永州澹山巖。巖有訓狐。凡貴客至則鳴。志

完將至而狐輒鳴。寺僧出迎。志完怪之。僧以鳴狐爲對。志完有詩云云。

弔仲殊長老

逆行天莫測。雉作瀆中經。漚滅風前質。蓮開火後形。鉢盂殘蜜白。爐篆冷煙青。空有誰家曲。人閒得細聽。

老學庵筆記。仲殊長老喜食蜜。崇寧中。忽上堂辭衆。閉門自縊死。

及火化。舍利不可勝計。鄒忠公作詩云。未句謂其工於樂府也。

游 醉

醉字定夫。建州建陽人。嘉祐閒。以文行知名。程明道典扶溝學。招使肄業。登元豐五年進士。仕至監察御史。歷知漢陽軍和舒濠三州。有集。

餞賀方回分韻得歸字

邀客十分飲。送君千里歸。情隨綠水去。目斷白鷗飛。松菊今應在。風塵昔已非。維舟後夜月。能不重依依。
濂洛風雅。

題河清縣廡

小院閑亭長薜蘿。鹿來穿徑晚經過。夕陽蕭散簿書少。窗裏南山明月多。

水亭

清溪一曲繞朱樓。荷密風稠咽斷流。夾岸垂楊煙細細。小橋流水卽滄洲。以上河南府志。

鍾 仙

仙字少游。又字公緒。贛州龍南人。元豐五年進士。累官廣西計度轉運使。進龍圖閣學士。兼本路安撫管句經略使。致仕。有集。

龍南玉石巖

萬石結叢林。縈回鳥道深。山高雲漠漠。洞古綠陰陰。壁擁蚪龍篆。崖懸鍾鼓音。不須愁日暮。勝景且追尋。贛州府志。

作 盤

盤字良翁。終南人。父信。本軍職。終文思副使。以蔭補借職。元豐中。監青州臨淄酒稅。

絕句

太一峯前是我家。滿牀書籍舊生涯。春城戀酒不歸去。老卻碧桃無限花。

西溪叢話。或以此詩題酒樓。皆云是神仙。非也。

陳 輔

輔字輔之。丹陽人。少負俊才。不事科舉。自號南郭子。人稱南郭先生。

訪建康楊德逢題壁

北山松粉未飄花，白下風輕麥腳斜。身似舊時王謝燕，一年一度到君家。

茗溪漁隱叢話：楊德逢驥居金陵，輔每清明上冢，卽過湖陰之居，清淡終日。元豐間，類歲訪之，不遇，乃題此詩。楊歸見之，吟賞不置，嘗稱于荆公。公笑曰：此正戲君爲尋常百姓耳。楊亦大笑。

湖上有作

平湖共天遠，浸月坐寒光。乘流溯荃壁，棹舟尋藥房。佳人折輕荷，隨風來珍香。顧眄但微笑，眉宇何清揚。日暮共攜手，遙指煙中湘。鎮江府志。

周邦彥

邦彥字美成，錢唐人。邪之姪。元豐中，獻汴都賦，后爲太學正。徽宗朝，仕至徽猷閣待制，提舉大晟府。出知順昌府，提舉洞霄宮。晚居明州，卒。自號清真居士，有文集。

陳郁話腴：周邦彥字美成，自號清真。二百年來，以樂府獨步。貴人學士，市儂妓女，皆知美成詞爲可愛。至于詩歌，自經史中流出。當時以詩名家如晁張，皆自歎以爲不及。

樓攻媿云：清真樂府播傳風。

流自命，顧曲名堂，不能自巳。

過羊角哀左伯桃墓

溧水縣南元祐中爲令時作。

古交久淪喪，末世尤反覆。谷風歌焚輪，黃鳥譬伐木。永懷羊與左，重義踰血屬。客行于楚王，冬雪無斗粟。傾糧活一士，誓不俱死辱。風雲爲慘變，鳥獸同躑躅。角哀哭前途，伯桃槁空谷。終乘大夫車，千騎下棺櫬。

子長何所疑。舊史刊不錄。獨行貴苟難。義俠輕殺戮。雖云匪中制。要可興薄俗。荒墳鄰萬鬼。溢死皆碌碌。何事荊將軍。揜戈相窘逐。

鳳凰臺

危臺飄盡碧梧花。勝地淒涼屬梵家。鳳入紫雲招不得。木魚堂殿下飢鴉。以上景定建康志。

春帖子

鸞輅青旂殿閣寬。祠官奠璧下春壇。曉開魚鑰朝衣集。綵勝飄揚百辟冠。合璧類事前集。

春雨

耕人扶耒語林丘。花外時時落一鷗。欲驗春來多少雨。野塘漫水可迴舟。後村千家詩。

曝日

冬曦如村釀。奇溫止須臾。行行正須此。戀戀忽已無。齊東野語。

天賜白井序

永樂城陷。王湛曲真夜縋以出。真持木爲兵。且走且敵。前陷大澤中。顧其旁有馬而白。暫上馳去。五鼓達米脂城。因以得脫。真名其馬爲天賜白。蔡天啓得其事於西人。邀予同賦。

君不見書生鑄羌勒兵入。羌來薄城束練急。蠟丸飛出辭大家。帳下健兒紛雨泣。鑿沙到石終無水。擾擾萬人如蝼蟻。挽絙竊出兩將軍。虜箭隨來風掠耳。道傍神馬白雪毛。噤口不嘶深夜逃。忽聞漢語米脂下。黑霧壓城風怒號。脫身歸來對刀筆。短衣射虎朝朝出。自椎雜寶塗箭創。心折骨驚如昨日。穀城魯公天

下雄。陰陵一跌。兵力窮。橫舟不渡。謝亭長。有何面目歸江東。將軍偶生名已弱。鐵花暗澀龍文鏢。縞帳肥芻。酬馬恩。閑望旄頭向西落。陳郁話腴。

翟嗣宗

嗣宗臨淮尉。

偶見蜘蛛因成四韻

織絲來往疾如梭。長愛騰空作網羅。害物身心雖甚小。漫天綱紀亦無多。林閒宿鳥應嫌汝。簾下飛蟲亦懼他。莫學螳螂捕蟬勇。須知黃雀奈君何。

復齋錄。翟尉臨淮。頗爲監司所窘。遂于館驛題蜘蛛云。林子中時爲發運。過而見之。召而詰責。且戒以毋爲浮薄。因薦之于朝。

陳傳

佐郎將

林中生致佐郎將。名王頭顱十四五。乾德可禽嗟不謀。同惡相濟能包羞。降書冉冉過中洲。中軍傳呼笑點頭。蠻首算成勿藥喜。君臣稱觴弭多壘。元戎凱旋隔天水。夜經枕榔趨決里。驅將十萬人性命。換得交州數張紙。

揮塵後錄。元豐中。交趾李乾德陷邕廉州。詔郭逵討之。遂復邕州。進次富良江。又破之。獲賊將洪真太子者。於是乾德議降。而逵以重兵壓富良江。與交人止一水之隔。吳冲卿丞相忌其成功。堂帖令班師。逵逗遛不進。交人大入。全軍皆覆。逵坐貶秩。當

時詩人陳傳作

佐郎將云云

魏泰

泰字道輔，襄陽人。曾布之婦弟，爲人無行而有口。米元章稱其與王平甫並爲詩豪。崇觀閒，章惇爲相，欲官之，不就。有臨漢隱居集、東軒筆錄、隱居詩話。

桐江詩話：道輔試院中，因上請主文，恃才豪縱，不能忍一時之忿，歐主文幾死，坐是不許取應。

潘子真詩話：道輔博極羣書，尤

能談朝野可喜事，應聲終日。

挽王平甫

海內文章傑，朝廷亮直聞。黃瓊起處士，子夏遽修文。貝錦生遷怒，江湖久離羣。傷心王佐略，不得致華勳。

東軒筆錄：熙寧中，河東河北陝西大飢，百姓流移于京西，就食。鄭俠監安上門，遂畫流民圖，及疏言時政之失，遂坐流竄。而中丞鄧綰知諫院，鄧潤甫言王安國嘗借俠奏，乘觀之，有獎成之言，意在非毀其兄，坐此放歸田里。逾年起爲大理丞，監真州糧。

料院不赴而卒，余嘗

爲挽詞，頗道其事。

題黃魯直集

端求古人遺。琢拱手不停。方其得機羽。往往失鵬鯨。

隱居詩話黃庭堅喜作詩得名好用南朝人語專求古人未使之一二奇字綴葺而成詩自以爲工其實所見之狹也故句雖新奇而氣乏渾厚吾嘗作詩題編後云蓋謂是也

荆門別張天覺

秋風十驛望台星。想見冰壺照坐清。零雨已回公旦駕。挽鬚聊聽野王箏。三朝元老心方壯。四海蒼生耳已傾。白髮故人來一別。卻歸林下看昇平。

桐江詩話詩律峻峭今人不可及也

闕題

博山燒沈水。煙燼氣不滅。日暮向門前。楊花散成雪。

潘子真詩話不滅

滅江左詩人語

優古堂詩話秦少章詩燭花漸暗人初睡金鴨

無煙卻有香姚道輔詩云與少章詩意同

寄米元章

蘆野風回草偃波。方塘疎雨淨傾荷。幾年蕭寺書紅葉。一日山陰換白鵝。湘浦夕同要月醉。洞湖還憶扣

舷歌。緇衣化盡。故山去。白髮相思一倍多。淨名齋帖。

邵 緝

緝神宗朝提舉淮南常平事。

題長興吳城

高臺無地曲池平。漂泊句吳宿古城。一岸溼雲沈夜色。四山涼葉下秋聲。湖州府志。

王无咎

无咎字補之。南城人。官直講。

遊麻姑山

仙輶昔日此流連。氣象遼遼尙宛然。溪落斷崖爲遠瀑。路從絕頂見平田。千年芝有靈禽戲。一洞雲留羽客眠。已樂勝游塵境外。況陪清論酒尊前。麻姑山志。

劉 誼

誼字宜翁。長興人。第進士。元豐閒。廣東江西提舉。常平官。上疏論新法。勒停。隱茅山。

題黃山溫泉

山有靈砂泉色紅。滌除身垢信成功。不除心上無明業。只與山閒衆水同。曲清舊聞。

居茅山作

會跨江西使者鞍。舊言才上便休官。三茅得夢全清瘦。頭髮鬚髻布襖寬。西吳里語。

趙彥若

彥若字元考。師民子。以父任為將作監簿。元豐中。歷官祕書監。哲宗朝。累擢禮部尚書。翰林學士。紹聖初。貶安遠軍節度副使。澧州安置。卒。與黨籍有集。

端午帖子

揚子江中方鑄鏡。未央宮裏更飛符。菱花欲共朱靈合。驗盡神姦又得無。容齋五筆

周壽

壽字李老。一字元翁。濂溪先生長子。元豐五年進士。初任吉州司戶。次秀州知錄。終司封郎中。

題金粟寺卷

清池帶蒼巘。結構俯林麓。扶疎竹外山。相向隔羅縠。老禪謝人境。歲晚收白足。誰聆梵然音。息隱尚爭逐。道場坐千劫。不媿桑下宿。定中觀潮汐。絕事心已熟。常案漱水志

徐嘉言

嘉言知海鹽縣事。

題金粟寺菴和前韻

招提敞山岳。新菴隱岳麓。石沼引清流。風漪皺文縠。晴暉滿虛室。一水淡自足。菴前有含暉亭。心明身宴閑。境寂誰尋逐。寒林帶月行。夜榻和雲宿。若欲問西來。一齋飽秋熟。漱水志

趙大成

閏中秋

桂影中秋特地圓。況當餘閏魄澄鮮。因懷勝賞初經月。免使詩人歎隔年。萬象斂光增浩蕩。四溟收夜助嬋娟。鮮雲清廓心田豫。乘興能無賦詠篇。合璧事類前集

宋詩紀事卷二十九

杜常

常字正甫衛州人昭憲皇后族孫元豐中知鄆州權發遣秦鳳等路提刑歷官工部尙書

畫墁錄神宗聞昭憲之家有登第者甚喜有旨令上殿翼日謂執政曰杜常第四人登第卻一雙鬼眼可令提舉農田水利

題華清宮

東別家山十六程曉來和月到華清朝元閣上西風急都入長楊作雨聲

夜雨晨霽

柏葉青青櫟葉紅高低相倚弄秋風夜來雨後輕塵斂繡出驪山嶺上宮

溫泉

已去開元四百年此泉猶自響潺潺也知不憤當時事長作悲聲恨祿山

驪山

漁陽烽燧起雲閒玉輦蒼黃下此山何事君王自神武區區南渡鹿頭關

錢唐厲鶚緝
仁和涓勘勘定

河上樁談臨潼驪山華清宮溫泉在焉中有萃玉屏皆宋元及今人詩刻內杜常詩四篇前題權發遣秦鳳等路提點刑獄公事太常寺杜常後跋云正甫大寺自河北移使秦鳳元豐三年九月二十七日過華清有詩四首詞意高遠氣格清古邑人曹端儀既親且舊因請副本勒諸方石以垂不朽閏九月初一日潁川杜詡記

劉吉甫

吉甫入元祐黨籍爵里未詳

聞笛

戍鼓停過月五更。鳴鳴巧作斷腸聲。江南自是春來早。吹到梅花夢也清。後村千家詩。

陳一向

一向桐廬人生元豐中。

題泰山靈巖寺

石龜泉畔鐵袈裟。上有猿銜五色花。見說道人時挂搭。旋將青拂掃煙霞。靈巖詩集。

黃夷仲

夷仲元豐中監察御史。

調王闢之

高唐不是那高唐。風物由來各異鄉。右向此中求薦枕。只應愁殺楚襄王。

山東通志。元豐中王闢之調博州高唐令。往別監察御史黃夷。仲夷仲口占一絕。譔之云云。此雖詠。亦足以辨輿地之殊也。

楊損

損字益老。華陰人。元豐中桂林郡僚。

七星山新開巖洞賦。呈經略龍圖曾公。

陽巖高敞。納晨曦。鶴駕雲輶。或可期。神物雕鐫。元入妙。人工開闢。更增奇。須知水石清涼處。絕勝塵沙熱惱時。紅旆碧幢。勞小駐。多慙主客濫追隨。桂勝

彭次雲

次雲吉水人。元豐中桂林郡僚。

曾公巖和曾子宣安撫

目擊煙霞晝卷舒。披榛敲石得蓬壺。洞天日月千年久。人世塵埃一點無。靈藥難尋雲縹緲。落花不見水縈紆。使君鳳閣翺翔近。謾與東山作畫圖。桂勝

彭澗材

澗材筠州人。釋惠洪覺範之叔。

句

雨過溫泉浴妃子。露濃湯餅試何郎。海棠。冷齋夜話。

張 釋

釋字思叔。壽安人。以文名。預鄉里計偕。受業程伊川之門。未及仕而卒。

寄友人

有客厭事事。潔身山之幽。寒暑不相貸。乃有卒歲憂。有生此有事。簡之成贅疣。澄江本無浪。不如信虛舟。六經力道要。無以利心求。一朝與理會。萬境真天遊。伊水正清冷。子行無滯留。西風昨夜至。送子至中流。落月灑殘夢。已看古岸頭。我病強送君。是行良難儔。異時青門下。誰識東陵侯。宋文鑑

張 勵

勵字深道。長樂人。神宗朝。官江淮制置發運使。

題張公翊清溪圖

九華鬱兮江南山。清溪下兮貫山閒。江北鰲兮溪東旋。濁湯湯兮清漫漫。山幾轉兮水幾盤。近交臂兮遠連環。決天末兮浮雲端。齊之山兮秋之浦。景晦明兮氣吞吐。草木蒼兮媚林莽。繡屏張兮翠綃舞。深窈窕兮幽掩隴。雨吟猿兮風嘯虎。下鳧鴈兮泳魴鱖。商之檣兮漁之罟。互出沒兮更散聚。樵有舍兮梵有宇。巖阿兮棘樊圃。輦連薨兮岸之滸。弄潺湲兮擢容與。中橫絕兮梁爲渡。隱孤城兮其西去。春之朝兮秋之夕。風旣清兮月又白。遐矯首兮俯陳迹。攜佳人兮不可得。空望遠兮中感百。思悠悠兮情惻惻。悵興亡兮懷今昔。獨茲溪兮無終極。嗟夫人兮擺塵滓。遙徜徉兮玩雲水。移山川兮置窗几。手舒卷兮千萬里。輶余車兮秣余馬。往其從兮山之下。柂吾舟兮汎清瀉。樂魚鳥兮放林野。願未適兮何爲者。聊寓言兮公墨畫。

吳禮部詩話張公翊清溪圖畫池陽清溪也郭功甫題五絕句有唯欠子瞻詩之語遂求東坡爲賦清溪詞蘇公復令某示秦少游寫小杜弄水亭詩其後自元豐以來諸賢題咏甚多真蹟在金華智者寺草堂蓋宋季王儻兀敬使君得之易世後其家以售於寺坡公作詞之後有長樂張勵深道長句彷彿蘇體亦佳

錢祈父

祈父失其名。

謝子瞻內翰浙西開府

雋庭鴛鴦集珍羣病翮摧頰下九門。罪戾我慙非畫錦。回翔公亦暫朱幡。龔黃政化知應爾。夔契謀謨想自存。缺二句。合璧事類後集。

李彥弼

彥弼字端臣廬陵人元豐中桂州郡僚。

傲暑棲霞洞

嵌竇棲霞敲虛轉杓左驂鸞翼右耳鳳簫爽排酷烈境邈氛囂靜者多妙於焉消搖。粵西詩載。

張吉甫

吉甫元豐中人見烏臺詩案。

肖梅香

江村招得玉妃魂。化作金爐一炷雲。但覺清芬暗浮動。不知碧篆已氤氳。春收東閣簾初下。夢想西湖被
更熏。真似吾家雪溪上。東風一夜隔籬聞。香乘

王仲修

仲修、丞相珪之子。元豐中登第。官崇文院校書。

慶姪耆登第

錫宴便傾光祿酒。賜袍還照上林花。衣冠盛事堪書日。六世詞科只一家。

雞肋編岐國公王珪在元豐中爲丞相。父準。曾祖贊。曾祖景圖。皆登進士第。其子仲修。元豐中登第。公有詩云。三朝遇主唯文翰。十榜傳家有姓名。注云。自太平興國以來四世凡十榜登科。後姪仲原子耆。仲孜子昂。相繼登科。昂又魁天下。本朝六世登第者。與晁文元二家。而晁一世賜出身也。崇寧四年。耆初及第。仲修作詩慶之。

宮詞

雲嬌煙嬾雨初晴。環碧風輕細浪生。盡日黃鸝不飛去。萬年枝上聽簫聲。
玉闌萬朵牡丹開。先摘姚黃獻御杯。翠幙重重圍繞定。料應蜂蝶不曾來。
玉簫聲裏酌玻璃。風獵旂旗卷絳霓。星渚月斜珠露重。銀河流水亦東西。
聖人獨看臨軒陛。殿後雙龍捧翠華。明日集英排大宴。御前先降出琵琶。

教坊使花日新嘗爲臣言。神宗見教坊

琵琶制作不精。每遇大宴前一日。降出琵琶。

雪消宮殿苑梅芳。曉漏聲遲下建章。天氣清寒當臘日。沈香甲煎賜諸房。
月沈天角曉星明。上直妝成趁五更。昨夜宣徽初進曲。仙韶院裏未知名。十家宮詞。

送越帥程公闢

一麾占得山川勝。金紐新提左顧龜。蒼闕鬪龍辭日下。紅旌引騎照江湄。
剡溪月午何妨醉。山水春餘好賦詩。玉案天香攜滿袖。錦衣誰似過鄉時。刻錄。

趙汝礪

汝礪官監察御史裏行。

送越帥程公闢

畫舫參差看欲飛。紛紛車馬厭塵泥。右軍筆墨空蘭渚。安道風流訪剡溪。
白首得時歸莫遽。丹心懷國去猶稽。月明會醉蓬萊閣。應笑雲霄自有梯。刻錄。

曾孝宗

送越帥程公闢

虎符分鎮浙江東。艤櫂都門使旆雄。雙槳徘徊粉社日。高牙搖曳剡溪風。
蓬萊閣讌公書簡。賀監湖游獄榜空。行聽越民謠德政。亟還青瑣見旌忠。刻錄。

王仲甫

仲甫字明之。岐公之從子。少年以詞賦登科。

中吳紀聞。仲甫風流翰墨名著一時。其歿也。丁永州注藻光祭之。有云。爽秀豪拔。出於天資。談經咏史。博識周知。文華自得。不務競時。古格近體。率意一揮。金玉鏘揚。組繡陸離。世俗所得。特其歌辭。生習華貴。不見艱巖。徘徊鷗閣。出入鳳池。乘輿南遊。曠達不羈。朝賞夕宴。選勝搜奇。擺脫冠裳。卻去輪蹄。不驚榮辱。不競是非。擾擾萬緒。付于一卮。頽然終日。去智忘機。

無題

黃金零落大刀頭。玉筯歸期劃到秋。紅錦寄魚風逆浪。碧簫吹鳳月當樓。伯勞知我經春別。香蠟窺人一夜愁。好去渡江千里夢。滿天梅雨是蘇州。

中吳紀聞。仲甫客吳門。嘗有所愛往京師。爲岐公強留之。逾時不返。因作詩云云。此詩效古樂府。秦帖今何在。體人皆愛其巧。

苗時中

時中字子中。甬上人。元豐中廣南西路轉運副使。

曾公巖和曾子宣安撫

紅旆尋幽東郭旁。泉巖新得冠殊方。一川氣象天開作。萬古榛荆地蔽藏。崖穴乍驚堂室闢。榜名知與日星長。異時人指溪橋水。思愛還同召伯棠。桂勝

毛滂

滂字澤民。衢州人。爲杭州法曹。任滿去。抵富陽。以詞爲東坡所賞。追還。知名後。乃出京下之門。嘗知武康縣。政和中。守嘉禾。有東堂集。

揮塵後錄毛澤民受知曾文肅擢置館閣文肅南遷坐黨與得罪流落久之蔡元度鎮湖州與澤民俱臨川王氏婿澤民傾心事之一日家集觀池中鶯鶯元度席上賦詩云莫學飢鷹飽便飛澤民和呈曰貪戀恩波未肯飛元度夫人笑曰豈非適從會者乎澤民大慙

相公池中飛過來

夏夜

毒暑彌三伏微涼起二更月窗風竹亂煙渚露荷傾

後村千家詩

溪上

溪光照秋房娟然臥流萍水仙弄幽姿寄余汀洲情眷懷玉色子弄波濯塵纓夜寒有佳意屬此冷然清

全芳備祖

響潭

水面平鋪映碧空夜深明月照龍宮猿啼未響潭先響一樹花開兩樹紅

遊翠峯寺

隔牆楊柳舞腰斜傍砌鵝梨玉作花此地風光誰管領小詩收入長官家

以上西吳里語

曉出定光寺

曉出開霜阪飢鳥啄麥畦山腰餘雪瘦天面冷雲低寒意梅花北禪心栢子西窗前借殘月照我度前溪

題餘英館

故第園林改，遺亭壁戶新。垂虹一橋月，夾繡兩隄春。花落俯流水，鳥啼懷故人。憑闌看翠荇，無意數游鱗。
以上湖州府志。

下渚湖

春渚連天闊，春風夾岸香。飛花渡水急，垂柳向人長。遠岫分蒼紫，澄波映渺茫。此身萍梗爾，泊處卽吾鄉。
武康縣志。

句

百里飽看紅糲稔，一杯輕媿黑蜿蜒。
禱雨 湘煙錄。

蔡載

載，字天任，潤州人。肇之弟。元豐中嘗爲晉陵簿，尋以薦改承事郎。

錢仲漆塘四詠

結廬傍林泉，偶與初心期。佳處時自領，未應魚鳥知。
遂初亭。

白雲來何時，英英冠山椒。西風莫吹去，使我心搖搖。
望雲亭。

高人不惜地，自種無邊春。莫隨流水去，恐汗世閒塵。
芳美亭。

水行天地閒，萬派同一指。胡爲穿石來，要洗巢山耳。
通惠亭。

容齋三筆：錢仲大夫於錫山所居漆塘村作四亭，自其先人已有卜築之意，而不克就，故名曰遂初。先壠在其上，名曰望雲。種桃數百千株，名曰芳美。鑿池涌泉，或以爲與惠山泉同味，名曰通惠。求詩于一時名流，自葛魯卿、汪彥章、孫仲益，旣各極其

妙。而母舅蔡天任四絕獨擅
場。諸公皆自以爲弗及也。

庚溪詩話。蔡天任頗工詩筆。力窺陶謝之藩。錢仲
漆塘詩。唯天任語簡而意遠。諸公服其韻勝。

題膠山寺繡佛

妙相奪天真。針針巧入神。幾多瞻佛者。還想用心人。常州府志。

盛次仲

次仲、元豐中翰林學士。

題慈溪普濟寺松石小軒呈關彥長明府

一松偃蹇蒼龍蟠。一石巉巖怒虎踞。我來題作龍虎軒。祇恐風雲捲將去。乾道四明圖經。

句

看來天地不知夜。飛入園林總是春。

冷齋夜話。盛學士次仲。孔舍人平仲。同在館中。雪夜論詩。平仲曰。當作不經人道語。曰。斜拖
闕角龍千丈。澹抹牆腰月半棱。坐客皆稱絕。次仲曰。句甚佳。惜其未大。乃云云。平仲服其工。

陳律

律政和人。元豐八年進士。龍溪令。

游洞霄山中

古木陰陰擁澗深。青山九鎖極幽尋。白雲也似知人意。飛落長松伴醉吟。洞霄詩集

樓 异

异字試可。鄞人。元豐八年進士。建中靖國初。爲登封令。累官徽猷閣直學士。知平江府。提舉崇福宮。

嵩山二十四詠并序 存四首。

僕性嗜山水。幾成癖。所至雖假館。儻舍莫不聚拳石。環斗池。終日玩觀。殆忘食寢。一日來令嵩陽。正在清泉白石中。始至數月。訟庭清暇。乃芟廢圃。鑿芙蓉菡萏二池。取餘土築臺。高五丈許。名之揖山。北面嵩嶽。西顧少室。南望許由。自餘諸峯。環擁軒檻。于是居高遠眺。盡山川之形勢。暇日既作三十六峯賦。以自廣。然僕舊聞嵩山二十四峯。圖經傳記所不載。求之士人。亦莫知也。一日觀明大師李得柔勝之。自京師來訪。迺得其名。出道藏吳天師靈跡記。歷東而西。一一可指。遂命畫史圖諸峯於仰嵩堂。以證其名。僕謂勝之曰。二十四峯之名。湮沒久矣。今自吾二人者發之。不可無述也。乃作嵩山二十四詠。並命勝之作焉。

華蓋峯

華蓋峯高未易窮。捫參歷井到天中。回頭卻顧人間世。但見羣青似小童。

玉女峯

玉仙曾此駐雲車。日薄窗紗暎雪膚。七字天書人不辨。定知元女手中符。

青童峯

斬新高髻掠雲開。翠色羅衣一樣裁。知有真仙此中住。故令天女捧書來。

玉鏡峯

皎皎冰盤瑩百圍。廣寒宮殿見依稀。春山萬疊渾如洗。浮翠光中一鏡飛。以上河南府志。

宿少林寺

六六仙峯遶佛居。俗塵至此暫銷除。西來未悟禪師意。北去還馳使者車。五品封槐今尚在。九年面壁昔何如。心知一宿猶難覺。花藏重尋貝葉書。嵩少集。

強淵明

淵明字隱季。至子元豐八年進士。宣和中爲翰林學士承旨。兼太子賓客。卒贈資政殿學士。謚文憲。

景鐘頌并序

宣和元年八月丁丑。皇帝詔大晟作景鐘。是月二十五日。鐘成。皇帝以身爲度。以度起律。以律審聲。以聲制鐘。以鐘出樂。而樂宗焉。于以祀天地。饗鬼神。朝萬國。罔不用。又在廷之臣。再拜稽首上頌。

明明天子。以身爲度。有景者鐘。衆樂所怙。於昭於天。乃眷斯顧。揚于大廷。罔不時序。億萬斯年。受天之祐。揮塵後錄。

薛昂

昂字肇明，錢唐人。元豐八年進士，附蔡京。仕至尚書左丞。靖康初，責徽州居住。

羅志仁姑蘇筆記：薛昂賦蔡京君臣慶會閣詩云：逢時可謂真千載，拜賜應須更萬回。時人謂之薛萬回。

能改齋漫錄：荆公在鍾山下基，薛門下昂與焉。賭梅花詩一首，薛敗而不善詩。荆公爲代作，今集中所謂薛秀才者是也。薛既宦達，出知金陵，或者嘲以詩曰：好笑當年薛乞兒，荆公坐上賭梅花。而今又向江東去，奉勸先生莫下基。薛書名似丐字，故人有乞兒之論。

湖堂

一段風煙不可關，出門滿目是湖山。昔人華廈今何在，湖堂在涌金門旁。郡守蔣樂安公瓶建。此日漁舟任自閑。

鳳觀漸新霄漢上，近作涌金樓甚偉。龍洲依舊水雲閒。柳洲祠五龍，此兩處與湖堂鼎足相照。歸來正壑多幽趣，願與

諸賢約往還。咸淳臨安志。

陳祐

祐字純益，仙井監人。第進士，建中靖國初，爲右司諫，入黨籍，編管歸州。赦還卒，有集。

冬夜

寒氣侵人夜未央，九門傳令一聲長。庭除半露牆根雪，月影斜分瓦壠霜。後村千家詩。

朱京

京字世昌。南豐人。舉進士。官太常博士。元符初遷國子司業。

祥光寺

山寺藏遺刻。塵埃字半昏。空揮峴首淚。誰起謝公門。白石千年像。蒼頭五世孫。他年想陳迹。卜築向雲根。
西江詩話

愈紫芝

紫芝字秀老。金華人。流寓揚州。少有高行。不娶。游王荆公之門。弟澹字清老。志操修潔。頗使酒。有詩名。敝帚集。

詩人玉屑。有時俗事不稱意。無數好山都上心。愈紫芝秀老句。荆公手寫於扇。山谷所書釣魚船上謝三郎一帖。石刻在金山寺。雞林每入貢。輒市數百本以歸。亦秀老句也。

石林詩話。紫芝少有高行。不娶。得浮屠氏心法。所至儵然。而工於詩。王荆公尤愛重之。每見於詩。所謂公詩何以解人愁。初日芙蓉映碧流。未怕元劉爭獨步。不妨陶謝與同游。是也。秀老嘗有夜深童子喚不起。猛虎一聲山月高之句。尤爲荆公所賞。和云。新詩比舊仍增峭。若許追攀莫太高。秀老卒於元祐。初惜時無發明者。不得與林和靖一流。槩見於隱逸。

南澗月夕

華髮念秋晚。青燈憐夜長。香團菊花露。寒著橘林霜。月在北窗底。人行南澗傍。婆婆不知去。身世兩相忘。

旅中諭懷

白浪紅塵二十春。就中奔走費光陰。有時俗事不稱意。無限好山都上心。一面琴爲方外友。數篇詩當麈中金。會須將爾同歸去。家在碧溪煙樹深。以上宋文鑑。

詠草

滿目芊芊野渡頭。不知若箇解忘憂。細隨綠水侵離館。遠帶斜陽過別洲。金谷園中荒映月。石頭城下碧連秋。行人悵望王孫去。買斷金釵十二愁。

歲杪山中

石亂雲深客到稀。鶴和殘雪在高枝。小軒日午貪濃睡。門外春風過不知。以上墨莊漫錄。

吳興

沽酒店穿斜巷出。採蓮船傍後門歸。翠霏城郭山千點。清蘸樓臺水一圍。談鑰吳興志。

松聲

萬壑搖蒼煙。百灘度流水。下有跨驢人。蕭蕭吹凍耳。

鍾山僧舍酬辟疆祕授

同謁臨川丞相時。不期顏色偶然披。綠葵自得山人味。絳帳難求俗士知。午磬喚回幽枕夢。夕陽催就小牕詩。松毛桂葉山中路。肯顧非公復是誰。

水村閑望

畫樓兩兩枕汀沙。隔岸煙蕪一望賒。翡翠閑居眠藕葉。鷺鷥別業在蘆花。溪雲淡淡迷漁屋。野旆翩翩露酒家。可惜一縑真水墨。無人寫得寄京華。以上詩林萬選

句

莫怪野人經宿住。白蘋霜落蟹螯肥。蟹略

饒 竦

竦臨川人。

下第投荆公

又還垂翅下丹霄。歸指臨川去路遙。二頃荒田都賣卻。要錢準備納青苗。豫章詩話

龍太初

詠沙

茫茫黃出塞。漠漠白鋪汀。鳥去風平篆。潮回日射星。

王直方詩話。郭功甫方與荆公坐。有一人展刺云。詩人龍太初。功甫勃然曰。相公前敢稱詩人。其不識去就如此。荆公曰。但且請來相見。既坐。介甫曰。賢道能詩。爲我賦乎。是時方有一老兵以沙擦銅器。荆公卽曰。可作沙詩。太初不頃刻閒誦云云。功甫

遂闕筆。太初緣

此名聞東南。

王邦憲

客宛陵遇鄉人作集句

楊子江頭楊柳春。衣冠南渡多崩奔。柳條弄色不忍見。東西南北更堪論。誰謂他鄉各異縣。豈知流落復相見。青春作伴好還鄉。爲問淮南米貴賤。

竹坡詩話。司馬溫公稱。

其敘事有情致爲可喜。

王復

復洛人鄉貢進士官典郡正郎。

句

早秋蟬有信。多雨暑無權。題洛陽大字院。明道雜志。

李愿

愿官京東轉運使。

四景樓。在登州蓬萊縣北。

縱目有佳處。須登四景樓。輪蹄喧市井。桑穀暗郊丘。翠蓋雲生裏。滄溟天盡頭。闌干知幾曲。徙倚恣清愁。
山東通志。

王忠玉

忠玉失其名。東坡集有與王忠玉游虎丘詩。此刻但題忠玉。同時又有馬中玉。未知孰是。

遊華清留絕句

廢宇頽垣不復新。朝元輦道盡荆榛。惟餘一派溫湯水。長與行人洗路塵。己未八月二日。驪山刻石。

朱光庭

光庭字公揆。河南偃師人。以父景蔭擢第。從呂大防於長安幕府。哲宗朝。仕至右諫議大夫。出知亳州。徙潞州。卒。紹聖中。追貶柳州別駕。入黨籍。

華清偶成

驪山秀色古今同。盡入詩人感慨中。只徇霓裳一曲樂。不知天下樂無窮。元豐辛酉仲春八日。驪山刻石。

吳雍

雍字子中。治平初。平涼令。元豐中爲秦帥。

登驪山閣留詩

山頭羯鼓奏霓裳。斷送君王入醉鄉。凭閣無言念興廢。孤煙猶起泰陵傍。元豐八年十月四日。驪山刻石。

宋詩紀事卷三十

劉季孫

錢唐厲鶚輯
宣城施念曾勘定

季孫字景文。贈侍中平之子。以左藏庫副使爲兩浙兵馬都監。蘇軾薦其才。除知隰州。仕至文思副使。有集。

題饒州酒務廳屏

呢喃燕子語梁閒。底事來驚夢裏閑。說與傍人渾不解。杖藜攜酒看芝山。

石林詩話。王荆公爲江東提刑。巡歷至饒。按酒務。始至廳事。見屏閒題詩云云。大稱賞之。問專知官誰所作。以季孫對。卽召與之語。嘉嘆升車而去。不復問務事。旣至傳舍。適郡學生持狀立庭下。請差官攝州學事。公判監酒殿直。一郡大驚。遂知名云。

次韻黃魯直同游郭氏西園

雨過西園物物佳。柳風竹日掩葵花。更無人迹宜清睡。柰此池頭一部蛙。史容山谷後集注。

守關

晨雞三叫未開關。留住行人更解鞍。卻上月明高處立。曉風吹面作清寒。宋文鑑。

陪東坡中和堂賞月

中和堂上月。盛夏似高秋。天瀉銀河水。人披紫綺裘。氣飄聞赤壁。語勝踊黃樓。歸袂接夫子。適從何處遊。
咸淳臨安志。

寄蘇內翰

倦壓黿頭請左符。笑尋穎尾爲西湖。二三賢守去非遠。六一清風今不孤。四海共知霜鬢滿。重陽曾插菊花無。聚星堂上誰先到。欲傍金樽倒玉壺。

石林詩話。李孫平之子。能作七字詩。家藏書數千卷。爲杭州鈐轄。子瞻作守。深知之。後嘗以詩寄子瞻云。四海共知霜鬢滿。重陽曾插菊花無。子瞻大喜。在穎州和季孫詩。所謂一篇向人寫肝肺。四海知我霜鬢鬢。蓋記此也。

題子瞻揚州借山亭

給事風流在。虛亭景趣閑。全臨故宮水。盡致別州山。峯勢時相向。嵐光夜不還。無時供勝賞。歷歷白雲間。
以上瀛奎律髓。

越山寺看泉

龜溪有路蓮花引。鶯嶺無時雲霧生。聊放一身留舴艋。不逢人處聽泉聲。
吳氏詩水。

句

詩書魯國眞男子。歌吹揚州作貴人。
送孔宗翰知揚州。石林詩話。

賈收

收號耘老。烏程人。有詩名。喜飲酒。其居有水閣。曰浮暉。李公擇蘇子瞻與之遊。倡酬極多。蘇去收

作亭以懷蘇名有詩一編號懷蘇集。

湖州府志東坡嘗寫古木怪石書其後贈買耘老云今日舟中霜寒十指如懸槌適有人致嘉酒遂獨飲一杯醺然徑醉念買處士貧甚無以慰其意爲作古木怪石一紙每遇飢時輒一開看飽人否若吳興有好事能爲君月致米三石酒三斗終君之世者當便以贈之不爾可令雙荷葉收掌須添丁長以付之也雙荷葉買侍姬添丁買之子事詳沈借詩

題有美堂

自刊宸畫入雲端。神物應須護翠巒。吳越不藏千里色。斗牛常占一天寒。四簷望盡回頭嬾。萬象搜來下筆難。誰信靜中疎拙意。略無蹤跡到波瀾。

庚溪詩話錢塘吳山有美堂。迺仁宗朝梅學公儀出守杭。上賜之詩。有曰。地有吳山美。東南第一州。梅以上詩名堂。士大夫留題甚衆。東坡倅杭。因令筆吏盡錄之。而未著其姓名。默定詩之高下。遂以買收詩爲冠。因此與耘老游從。

和沈君與送蟹

彭越孫多伏下風。螭蚌奴視敢稱雄。江湖縱養膏腴紫。鼎鑊終烹爪眼紅。嘲稱吳兒牙似鍍。劈慚湖女手如蔥。獨憐盤內秋臍實。不比溪邊夏殼空。齊東野語

舒煥

煥字堯文。徐州教授。

和蘇子瞻觀百步洪原韻

先生何人堪並席。李郭相逢上舟日。殘霞明滅日腳沈。水面浮光天一色。磷磷石若鐵林兵。翻激奔衝精甲白。岸頭旌旗簇五馬。一鷁飛蝗信東下。入夜寒生波浪閒。汗衣如逐秋風乾。相忘河魚元出沒。得性沙鳥鳴關。委蛇二龍乃神物。游樂諸溪誠爲難。築臺種柳恐不暇。天下龍雨須公還。蒼溪漁隱語。

顏幾

幾字幾聖。錢塘人。

獄中寄酒友

龜不靈身禍有胎。刀從林甫笑中來。憂惶囚繫二十日。辜負醞酣三百杯。病鶴雖甘低羽翼。罪龍尤欲望風雷。諸豪俱是知心友。誰遣尊罍向北開。

句

白日尊中短。青山枕上高。

春渚紀聞。錢塘顏幾聖。俊偉不羈。性復嗜酒。無日不飲。東坡先生臨郡日。適當秋賦。幾於場中潛代一豪子劉生者。遂魁。送舉子致訟下幾吏。久不得飲密以詩付獄吏。送外開酒友。吏以呈坡。坡因緩其獄。會赦得免。一日醉臥西湖寺中。起題壁云云。不

數日而卒。

袁穀

穀字公濟。鄞人。試秩館職。首薦。與東坡倡和。

次韻劉景文登介亭

東南富山水。所病在卑溽。陰晴變朝暮。梅雨大田足。翰苑宴高堂。金罍浮蟻綠。清冷四座耳。醉飽五經腹。亭午登介亭。縈紆俯山麓。行路愁暍死。是月丁初伏。乘高瞰羣峯。前後浪奔逐。三吳在指掌。百粵入雙目。漢憂分朱幡。堯意注黃屋。下輿曾未幾。傳命甚郵速。霜遂伏下風。元白仰高躅。倡余而和汝。談笑唾珠玉。所恨繼者貧。囊箱無寸幅。劉侯世良將。文史三冬讀。坐嘯胡騎卻。行歌燕旦哭。儒將久寂寥。斷弦今日續。所得最在詩。鈛利鋒莫觸。唱酬黃卷上。如響蒼空谷。王侯富方丈。熊掌我所欲。獨餒不得飽。中心但誠服。
王梅溪蘇詩集注。

許仲蔚

仲蔚字子均。杭之新城令。曾和東坡十韻詩。

杜公井

井在新城。唐大順間。淮南楊氏遣兵圍城。城乏水。兵民穿井百餘尺。不得泉。杜棧至誠請之。泉立至。城得不陷。人目爲杜公井。

德地見圖牒。神機發杜棧。寇圍炎甚火。壺渴冽于冰。古邑桑田換。雲源鑑面澄。如今風月夕。煮茗詫山僧。
咸淳臨安志。

何去非

去非字正臣。浦城人。累舉對策稱旨。授左班殿直武學博士。後以東坡薦授承奉郎司農寺丞。通判廬州。有集。

次韻翟公巽猩猩毛筆

貌妍足巧語，軀惡招歐歛。賦形具人獸，寧脫荆榛居。肉嘗登俎鼎，餉餽傳甘腴。失計墮醉鄉，顛躓無與扶。柔毫傳束縛，航海歸仙壘。浴質逸少池，攜藻知章湖。殺身固有用，賦芋從衆狙。坐令宣城工，無復誇栗鬚。宣城出栗鼠鬚也。文房甲四寶，萬兔慙蒙膚。數管友十年，閉門賦三都。之子信豪邁，嗜學每致劬。未冠游膠庠，已推經行儒。蓬山天祿閣，嶢嶢凌碧虛。期予早登躡，同舍校魯魚。墨莊漫錄。

何頰之

頰之，字斯舉，黃岡人。從蘇黃學。日瑄按：道山清話作頰之。

觀李伯時題閣立本西域圖

窮荒未信子年欺，自笑山林老一枝。海上嘗思龜殼卷，天涯欲化鳥工窺。丹青閣令如曾到，風俗張騫舊獨知。公喜著書尤博雅，山經暇日補殘遺。能改齋漫錄。

句

身到瀛洲須命好，官稱庾氏莫言卑。寄錢仲監倉。合璧事類後集。

長安古碑用樂石，蠶尾銀鈎擅精密。缺訛橫道已足哀，況復鑄裁代輓髀。有如天吳及紫鳳，顛倒在衣吁可惜。

道山清話：天聖中詔發浮圖，姜遵在永興毀。漢唐碑之堅好者以代甄甃。何斯舉詩云云。

邵迎

迎高郵人登進士。

渾水燕談邵迎高郵人博學強記尤長於詩為人恭儉孝友長於吏事而清羸多病奇蹇不偶登進士十餘年官止州縣窮死無嗣其妻困苦子瞻哀之集其文爲之引以爲原憲之管顏回之短命揚雄之無子馮衍之不過皇甫士安之篤疾彼遇其一

人猶哀悼而君兼之非命也哉

句

鹽鼓調羹金液賦。橙齋薦鱸玉絲肥。蟹略。

王祐

祐官禮部侍郎出守長沙奉詔禱南岳訪魏夫人壇得異人率子廉東坡作率子廉傳

贈率子廉

下瞰虛空臨絕澗。上排煙霧倚山巔。四邊險絕無猿鳥。獨臥深雲二十年。能改齋漫錄。

朱炎

答講僧

四大不須先後覺。六根還向用時空。難將語默呈師教。只在尋常語默中。

苕溪漁隱叢話東坡言從上人爲余言有節度判官朱炎學禪久之忽於楞嚴經若有得者問講僧義江云此身死後此心何在江云此身未死此心何在炎良久以偈答云云師可之

劉賓

賓官至太傅。

鄂州白雪樓

江上樓高十二梯。梯登偏與白雲齊。人從別浦經時去。天向平蕪儘眼低。寒色不堪長黯黯。秋光無奈更
淒淒。闌干曲盡愁無盡。水正東流日正西。

皇朝類苑。鄂州白雪樓。素多題咏。一日守倅燕集是樓。方命坐客賦詩。時劉太傅賓以恙羈置是郡。不得預會。遂使人持詩以獻。才致蕭散。一坐爲之闌筆。

朱適

句

燒殘紅燭客未起。歌斷一聲塵繞梁。

補夢溪筆談。朱適高郵士人。納婦之夕。夢爲詩兩句。不踰月卒。

侯穆

穆字清叔。汝陽人。

寒食飲梨花下

共飲梨花下。梨花插滿頭。清香來玉樹。白蟻泛金甌。妝靚青娥妒。光凝粉黛羞。年年寒食夜。吟遶不勝愁。

雲齋廣錄。侯稷有詩名。因寒食郊行。見嫩少年共飲於梨花下。稷長揖。就坐。衆皆晒之。或曰。能詩者飲。乃以梨花爲題。稷吟此詩。衆客闐筆。

陳智夫

智夫襄陽人。長於歌詩。遇異人。授吐納之術。佳句多於夢中得之。

句

花笑似留客。鳥啼如喚人。野花臨水數枝恨。芳草連天千里情。遜齋閑覽。

劉鄂

鄂青州推官。

諧謔詩

坐上若有一點紅。斗筲之器飲千鍾。坐上若無油木梳。烹龍庖鳳都成虛。迂齋詩話。

胡志道

夜宿仙都山聞松聲作

仙都古洞天。雲闕高嶮嶮。新宮欣然成。碧瓦燦鱗列。我時宿琳房。六月失煩熱。松聲起中夜。夢枕忽驚輟。天籟鳴虛徐。玉簫遞冷徹。鳳歌諧律呂。鶴舞想應節。安知非羣仙。宴罷搖佩玦。從來箏笛耳。一洗萬相滅。
仙都山志。

黃帝祠宇李陽冰篆在縉雲山

李侯神仙才。宇宙在其手。古篆誇雄奇。鐵柱貫金鈕。標榜黃帝祠。字畫氣渾厚。想當落筆時。雲夢吞八九。每傳風雨夜。蜿蜒龍蛇走。光怪發巖竇。草木潤不朽。鬼物煩撝訶。一旦忽失守。隨煙遽飛騰。無復世間有。因訪山中人。石刻尙仍舊。誰能一新之。易若運諸肘。宋藝圃集

胡份

份字子文。縉雲人。官國子司業。

仙都山

鳥道盤空上。松根抱石生。羽人分兩舍。雞犬自聞聲。仙都山志

李士舉

士舉官浙運使。

過仙都徐氏山居

四海無塵戰馬閑。稻梁桑柘綠迴環。不知盡是君王力。華屋重重對好山。仙都山志

郭瑄

瑄官涇州監副。

涇州懷古

危坡下盡見殘墟。勢扼長川萬古雄。涇水無泥分畎澮。回山有脉自崆峒。唐文會祀龍君廟。漢武猶存阿母宮。更喜筆峯青翠處。雨餘疑是畫圖中。陝西通志

葉集之

送李道父辟大名司錄

李侯江南英。身自藏器。讀書盡百紙。落筆必千字。況兼熊豹姿。特負縱橫志。淒其望高躅。異世猶一致。大名國北門。自昔雄元帥。名賢慎東拔。薦引必同類。操持紀綱地。實藉循良吏。要成百鍊鋼。小大須歷試。合璧事類後集。

李膺仲

題自畫蘆雁

晚來無事理扁舟。吹起騷人漫浪愁。過雁飛鴻三兩字。淡煙寒日荻花秋。聲畫錄。

王山

山、魏人。

答盈盈長歌

東風豔豔桃李鬆。花圍春入屠酥濃。龍腦透縷鮫綃紅。鴛鴦十二羅芙蓉。盈盈初見十五六。眉試青膏鬢垂綠。道字不正嬌滿懷。學得襄陽大隄曲。阿母偏憐掌上看。自此風流難管束。鶯啄含桃未噉時。便會郎時風動竹。日高一丈羅窗晚。啼鳥壓花新睡短。膩雲纖指擺還偏。半被可憐留翠暖。淡黃衫袖仙衣輕。紅玉欄干糝粉淺。酒痕落腮梅忍寒。春羞入眼橫波豔。一縷未消山枕紅。斜睨整衣移步嬾。才如韓壽潘安亞。擲果竊香心暗嫁。小花靜院酒闌珊。別有私言銀燭下。簾聲浪皺金泥額。六尺牙牀羅帳窄。釵橫啼笑

兩不分。歷盡風期腰一搦。若教飛上九天歌。一聲自可傾人國。嬌多必是春工與。有能動人情幾許。前年按舞使君筵。睡起忍羞頭不舉。鳳凰簫冷曲成遲。凝醉桃花過風雨。阿盈阿盈聽我語。勸君休向陽臺住。一生縱得楚王憐。宋玉才多誰解賦。洛陽無限青樓女。袖籠紅牙金鳳縷。春衫粉面誰家郎。只把黃金買歌舞。就中薄倖五陵兒。一日憐新棄如土。雲零雨落正堪悲。室入他人夢來去。浣花溪上海棠灣。薛濤朱戶皆金鑲。韋臯筆逸玳瑁落。張佑蓋滑琉璃乾。壓倒念奴價百倍。興來奇怪生毫端。醉眸覩紙聊一掃。落花飛雪聲漫漫。夢得見之爲改觀。樂天更敢尋常看。花閒不肯下翠幕。竟日烜赫羅雕鞍。掃眉塗粉迨七十。老大始頂菖蒲冠。薛濤壽七十始頂菖蒲冠。學謝自然上升之術。至今愁人錦江口。秋葦露草孤墳寒。盈盈大雅真可惜。爾身此後不可得。滿天風月獨倚欄。醉岸濃雲呼佚墨。久之不見予心憶。高城去天無幾尺。斜陽銜山雲半紅。遠水無風天一碧。望眼空遙沈翠翼。銀河易闔天南北。瘦盡休文帶眼移。忍向小樓清淚滴。

弔盈盈

浮世繁華一夢休。登臨因憶昔年遊。人歸依舊野花笑。玉冷幾經墳樹秋。風月過情須感慨。江山多恨即遲留。如今縱擬誇才思。事往情多特地愁。

夷堅志。魏人王山能爲詩。標韻清卓。因省試下第。薄遊東海。值吳女盈盈者。來年方十六。善歌舞。尤工彈箏。容貌甚冶。詞翰清思。翹翹出羣。少年子爭登其門。不惜金帛。盈盈適簡嘉耦。乃許一笑。府守田龍圖召使侍宴。山預賓列。相得於樽俎之間。從之驩。

虛累月。山辭歸。盈垂泣悲啼。不能自止。明年寄傷春曲示山。山作長歌答之云云。又明年。山適淄川。遇王通判於邸舍。出盈盈簡。欲借遊山東。時方初夏。山已病。不克赴其約。秋中再知山東。盈已死。山登岱岳。至玉女池。題詩於石。弔之云云。

王崇

崇字極之。

送王才元入京白晷按王直方父名械字才元

渭城楊柳已青青，強駐行人聽渭城。不問使車歸路遠，且從蘆酒滿杯傾。相逢洮塞休兵後，此去秦川照眼明。若立螭頭前借箸，且教克國事春耕。

王直方詩話王崇極之與先君同在熙河作詩送先君入京云先君誦其詩于吳沖卿丞相由此知名

王禹錫

句

打葉雨拳隨手重，吹涼風口逐人來。

王直方詩話王禹錫行十六與東坡有姻連嘗作賀知縣春雨詩云東坡云十六郎作詩恁得如此入規矩禹錫云是醉中作異日又持一大軸呈坡坡曰爾復醉耶

李孝伯

晚泊鳳凰驛次韻蔣穎叔

維舟亭下號三灣，萬疊青山一水閒。偏愛澄江照天碧，飛來幾片白雲閑。錦繡萬花谷

唐默

默字存中。會稽人。陸農師列爲上客。每愛其詩。

句

茅屋不聞雪。紙窗宜讀書。山林誤探槍旗信。卻怪枝頭雪未消。莫似君家三十五。時來不寄一行書。

送高彥應 會稽志

黃嗣徽

題宋復古郎中畫山水

匣有瑤琴篋有書。棲遲猶未卜吾廬。主人況是丹青手。乞取生涯似畫圖。

許彥周詩話。嗣徽少年時。讀書有俊聲。不幸爲後母訴于官。隸軍籍。王岐公宣籍得之。聞其識字。使抄書。一日觀宋復古郎中
所畫山水。使子弟賦詩。嗣徽亦請賦。公頷之。頃刻成一絕云云。公大嗟賞之。及問知曲折。以故人子奏於朝。乞以門客。恩澤承
務郎。特補之。命
下之日暴卒。

方澤

武昌阻風

江上春風留客舟。無窮歸思滿東流。與君盡日閑臨水。貪看飛花忘卻愁。

西清詩話。題華清宮一絕。乃杜常作也。武昌阻風一絕。乃方澤作也。二人不以文藝名世。而詩語驚人如此。殆不可知矣。

張軫

句

山曉月初上，江鳴潮欲來。
錦繡萬花谷。

宋詩紀事卷三十一

錢唐 厲鶚 輯
仁和 梁啟心 勘定

呂川

川字里未詳。呂吉甫知維揚日，賣詩于市。

贈致仕郭朝儀

漫道任公釣有神，六鼇無跡海生塵。爭如靜臥南窗下，蘭菊任爭秋與春。陶朱新錄。

張頌

頌字公美，潁昌人，舉進士，不第。

句

人散鞦韆閑挂月，露零蝴蝶冷眠風。塵史。

徐璿

璿字全父，少年登科，晚益流落，終武義縣主簿。

春日醉中作時寓婺州清澗寺。

驚雷殷殷南山曲，一夜山前春雨足。美人睡起怯餘寒，衣褪香消紅減玉。朝雲靄靄弄情態，野柳狂風無

管束東風也自足春情。吹破一溪烟水綠。泊宅編。

薛紹彭

紹彭字道祖。號翠微居士。長安人。定武帥薛向師正之子。米元章書畫友。

雲頂山

山壓重峯首。寺占紫雲頂。西遊金泉來。登山緩歸軫。昨暮下三學。出谷已延頸。山名高劍外。回首陋前嶺。躋攀困難到。賴此晝亦永。巍巍石城出。步步松徑引。青霄屋萬楹。下俯二川境。玉壘連金雁。西軒列阡畛。青城與岷峨。天際暮雲隱。少城白烟裏。水墨淡微影。江流一練帶。不復辨漁艇。東慚梓澤隘。右喜錦川迴。磐陀石不轉。枯枿弄芒穎。四更月未出。蕙帳天風緊。客行弊絮垢。到此凡慮屏。暫時方外遊。聊愜素心靜。明朝武江路。拘窘逐炎景。

左綿山中多青松。風俗賤之。止供樵爨之用。郡齋僧刹。不見一本。余過而太息。輒諷通守晉伯移植佳處。使人知爲可貴。東川距縣百里餘。入境遂不復有。晉伯因以爲惠。沿流而來。至此皆活。作詩述謝。并代簡師道史君紹彭上。

越王樓下種成行。濯濯分來一葦杭。偃蓋可須千歲榦。封條已傲九秋霜。含風便有笙竽韻。帶雨偏垂玉露光。免作爨烟茅屋底。華軒自在拂雲長。

和巨濟韻

通泉字法出官奴。日日臨池恨不如。雙鯉可無輕素練。數行惟作硬黃書。鄉關何處三秦路。馬足經年萬

里餘多謝玉華宮。醉客新詩未覺故人疎。臨池通泉爲如字韻率非實事也不笑不笑。

句

曾夢春塘題碧草。偶來霧夕看紅蕖。曉露凝蕪逕。斜陽滿畫橋。不眠聽竹雨。高臥枕風湍。去意已輕千里陌。深杯難醉九迴腸。灞陵葉落秋風裏。忍對霜天數雁行。以上郁氏書畫題跋記。

王 欲

欲字稚川與黃山谷倡和。

書旅邸壁

雁外無書爲客久。葦邊有夢到家多。畫堂玉佩縈雲響。不及桃源欸乃歌。

天社任淵山谷內集注。彭山黃氏有山谷手書此詩。云王欲稚川元豐初調官京師。寓家鼎州。親年九十餘矣。嘗閱貴人家歌舞。醉歸書其旅邸壁云云。余訪稚川于邸而和之。

蔣 擴

擴字充之。

送鄧德甫

高談耳冷幾經秋。解后長沙得少留。莫畏洞庭風浪險。主翁元是濟川舟。

范公稱過庭錄。鄧璋德甫永州人。鄉舉入行。忠宣謫永館門下。教授諸孫。後過長沙與故人蔣充之遇。蔣送詩云云。蔣由是詩名播湖湘間。

呂由庚

由庚誨之子。

句

地下若逢中執法，爲言今日再昇平。

聞見前錄。神宗卽位，呂誨獻可擢御史中丞。一日紫宸早朝，司馬溫公爲翰林學士，相遇朝路。溫公密問曰：「今日請對，何所言？」獻可舉手曰：「袖中彈文乃新參也。」溫公愕然曰：「王介甫素有學行，奈何論言獻可正色曰：『君實亦爲是言耶？』」安石雖有時名，好執偏見，不通物情，喜人佞己，置諸宰輔，天下必受其禍矣。未幾中書省置三司條例司，始變祖宗舊法，所用皆儉薄少年，天下騷然。溫公退居洛，慨然曰：「呂獻可之先見，吾不如也。」獻可出知鄧州，病乞致仕。溫公康節日就臥內問疾，一日手書托溫公以墓銘。溫公亟書之，已瞑目矣。溫公呼之曰：「更有以見屬乎？」獻可復張目曰：「天下事尙可爲。」君實勉之。後溫公相天下，再改元祐之盛，獻可不及見矣。溫公薨，獻可之子由庚挽詩云云。

鄭景望

景望，湘山人，生元豐元祐閒，有蒙齋筆談。

在潁州作

城頭曉漏鳴丁丁，窗閒月落卻未明。衡陽歸雁過欲盡，汝南荒雞初一鳴。悠悠斷夢了不記，草草微吟還獨成人。生得意須幾許，一睡稍足無餘情。

蒙齋筆談：余每夜寐過分，輒不能再睡，展轉一榻，時聞鼠嚙，唧唧有聲，亦是一樂事。當門老僕，鼻息如雷，閒亦爲嚙語，或悲或喜，或怒或歌，聽之每啓齒意，其亦必自以爲得，而余不得與也。常在潁州時，初自翰林免官，先君爲倅歸，居後園三閒小室。

芻無與鄰左右惟一豨意
況已如此書有詩云云

鄭周卿

周卿襄邑人公肅右丞之孫知鄆州中都縣

鶴歸空有恨雲散本無心悼妾許彥周詩話

楊萬畢

萬畢字通一淇州人

句

千里暮雲山已黑一燈孤館酒初醒

蔡寬夫詩史索寬之意盡于此矣

史 驤

驤字思遠

句

花分先後留春久地帶東南見月多慶史

令狐挺

題相思河 鄭州北百里有相思河岸有郵置曰相思鋪

誰把相思號此河。塞垣車馬往來多。只應自古征人淚。灑向空川作逝波。墨客揮犀

魯千之

題崇明寺

心情稍覺難如舊。勝迹依然日月新。鶴怨猿驚嗟往事。再來山色似迎人。修武縣志

許元祐

風水洞

野寺依山立。松橋避石斜。壞梁飛白蟻。枯木挂青蛇。道路悲蓬轉。功名惜鬢華。聊將洞中水。試洗眼前花。咸淳臨安志

周弁

臨海淨土院

一徑森森入翠微。翠微深處見禪扉。倚雲殿閣光相照。蔽日松杉碧四圍。竹引澗泉寒透屋。雨蒸山靄潤侵衣。十年遊宦今重到。景物依前舊識稀。輿地紀勝

闔欽受

欽受官御史

宿瀛州高唐館

借問襄王安在哉。山川此地勝陽臺。今朝寓宿高唐館。神女何曾入夢來。漫叟詩話。

闕伯才

句

魚貫羸師堪坐縛。爾時可歎蜀無人。陰平橋。困學紀聞。

張冕

冕官翰林學士。

海棠

海棠栽植偏塵寰。未必成都欲詠難。山水瓜開千顆顆。水林檎發一攢攢。自注。大約木瓜林檎花初發。皆與海棠相類。但花稀而先葉耳。惟山木瓜水林檎尤似。山木瓜揚州有之。楮木叢也。初疑紅豆爭頭綴。忽覺燕脂衆手丸。西蜀人

家根撥小。南荆官舍樹枝寬。高穿羣木無因蔽。平倚危樓最好看。十畝園林渾似火。數方池面悉如丹。錦

袍萬丈仍連袂。自注。白傳。珠被齊光更合歡。自注。楚辭。風嫋細腰妝正罷。自注。楚宮。露晞銅雀淚新乾。晨曦遠

借彤雲暖。秋魄微侵甲帳寒。會讌豈勞供幄帳。採香應見費龍檀。穠燒遊女青絲髮。殷染妖姬白玉冠。鬢

席半移隈茜綬。使車多熱蔗雕鞍。層層排朶縈飛蝶。密密交柯宿翠翰。詩客早慙矜縷管。畫工誰敢銜霜

紈。本期相伴千場醉。可忍輕邀百卉殘。川路尙移隨迅瀨。蕃盤猶折出長瀾。飄零絳雪深盈尺。收拾晴霞

散結團。時去獨應賢者識。色空潛有達人觀。譜爲仙子終須美。自注。花譜。以海棠爲神仙。王禹偁海仙詩序。實作

寒梅況不酸。自注寒梅事具序中。五六年來離別恨，春宵頻夢石臺盤。自注荆王石臺盤在後園海棠下，至今存焉。

海棠譜。

元溥

溥字泉卿，宜興人，號耘軒。

歲後書懷

他鄉故鄉老若此，新歲舊歲窮依然。烹茶但有二升水，沽酒初無三百錢。咸淳毘陵志。

徐範

過太行山

路繞羊腸躡屐齊，萬山金碧總堪題。舉頭日月中天近，極目乾坤五嶽低。自笑鹽車騏驥厄，誰憐枳棘鳳皇棲。欲投古寺禪房宿，喜見僧歸落日西。河內縣志。

晁元忠

西歸

安得龍山一作湖潮，駕回安河水。水從樓前來，中有美人淚。人生高唐觀，有情何能已。復齋漫錄。

徐評

評新城邑令。

寧國院

岑寂千山曲，縈紆一徑微。樓臺青嶂合，窗戶亂雲飛。野色侵僧衲，池光射客衣。偶來修吏隱，到此益忘機。
咸淳臨安志。

周式

成都人。

句

花前嫫母醜，雪裏屈原醒。庭松。歷代吟譜。珠簾繡戶遲遲日，柳絮梨花寂寂春。蒼溪漁隱叢話。

查許國

許國，字匪躬，海陵人。官奉議郎，僑居荆南。

鳴弦峯 在英州南慶舜南巡撫琴于此。

木葉蕭蕭江水清，幅巾藜杖遶山行。忽然行到山深處，聽得鳴弦一兩聲。方輿勝覽。

王觀國

觀國，長沙人，著學林。

題北巖院

雲巖亂石漱寒泉，通夕泉聲到枕邊。宛似昔年巖瀨口，五更風雨宿溪船。南安縣志。

陳古

過武侯廟

羣雄角逐自驅除。邂逅真龍起畏途。材並管蕭非亞匹。氣吞曹馬直庸奴。兩朝冠蓋尊元老。千載風雲屈壯圖。天欲鼎分終割據。可憐憂國竟捐軀。成都文類

王潤之

潤之字德玉山陰人。

寶林寺

支公會駐錫。規矩舊叢林。飛鼠殿堂古。靈鰻井穴深。磬聲來竹外。塔影臥池陰。幸有相知客。時時過我吟。越詠

王子思

表兄丁行之俾予作山水一軸

禿髮管城書不中。麝煤滿硯隨輕濃。烟雲變怪本無定。丹青故匪能形容。解衣盤礴無人久。妙跡于今復何有。揮毫要使眞宰泣。歎息初非癡絕手。遼東有人丁令威。去家得仙今暫歸。上界繁華異正壑。安得長林大麓長追隨。聯翩大軸要予寫。敲冰不在鵝溪下。吾既不能爲喬松。直幹摩蒼天。又不能爲小童。一線飛紙鳶。萬里江山入平遠。映取畫師閣立本。

何源秀才爲余畫山水圖覓詩

孤峯特立何巉巖。勢與霄漢高相參。左蟠右列分嶺岫。儼如至尊朝子男。怪子蝸室不函丈。欲有異境超塵凡。素嫌挂壁故妥帖。平地作此千嵌巖。雲蒸霧結深莫測。長林大麓亂不芟。想當變怪蟄龍虎。中有窟

穴誰能探。將崩未崩。江動石欲去。不去風滿帆。山坳林缺見天際。隱約萬里橫煙嵐。嗟予質性素山野。視此正壑心益耽。斗升之粟真秣莖。野馬垂耳就轡銜。西山爽氣日在望。吏卒侍側嚴若監。青鞵布鞵棄不著。誰令自苦披青衫。頗羞漁父駐短櫂。似笑大夫新被讒。寄言烏獸儻可侶。吾將從汝棲林巒。以上聲畫集

陳遠

長橋玩月

世閒八月十五夜。何處樓臺得月多。不及吳江橋上望。水晶宮殿揖嫦娥。吳江縣志

曾晦之

晦之南豐人。

次唐彥猷顧亭林韻

烟雨三家市。黃門卜此居。著書千紙在。祠宇幾椽疎。潮汐成今古。牛羊有里墟。舉兵鉏逆節。風烈照無餘。至元嘉禾志

蘇文饒

文饒官大監。

鴻溝

置俎均牢斃。我冠信沐猴。方矜几上肉。已墮幄中籌。海岳歸三尺。衣冠闕一丘。路人猶指示。上下是鴻溝。

春晚

芳草莫尋遊處跡。好花空認折殘枝。啼鶯似怨歸何速。舞蝶應憐出太遲。以上後村千家詩。

傅子容

題楊汝士玉蕊帖

比場更饜總未佳。要須博物是張華。因觀異代前賢帖。知是唐昌玉蕊花。

高齋詩話。唐人題唐昌觀玉蕊花詩云。一樹龍鬚玉刻成。飄廊點地色輕輕。女冠夜覓香來處。唯見階前碎月明。今瑒花卽玉蕊花也。介甫以比瑒謂當用此瑒字。蓋瑒玉名。取其白耳。魯直又更其名爲山簪。謂可以染也。廬陵段謙叔多聞士也。家藏異書。古刻至多。有楊汝士與白二十二帖云。唐昌玉蕊。以少故見貴耳。自來江南山山有之。士人取以供染事。不甚惜也。則知瑒花之爲玉蕊無疑矣。傅子容見此帖。乃作絕句云云。

鄭 猶

詠王子安應城新亭

一簪華髮一牀書。盡日新亭適意無。莫道長安天樣遠。長安自不厭江湖。

前年諫獵出長楊。乞得新亭作醉鄉。好把青衫送酒媪。從教人識御爐香。侯鯖錄。

宋 翰

題涪陵郡

錦繡洲猶在。熊羆夢已無。文風齊兩蜀。仙洞接三都。白石從天設。青崖見地圖。荔支妃子國。不復曩時輸。
方輿勝覽。

傅翼

翼永豐令

猿橋在建昌軍新城縣

參差茅屋帶村烟。驛路崎嶇石岸邊。風物盡成三谷景。溪山分斷七閩天。夜猿乘月悲霜樹。秋石和雲瀉澗泉。謝守來遊已千載。何人能為續佳篇。輿地紀勝

史 沈

沈早登進士第。坐事遷謫而死。平生好持人短長。世以凶人目之。雖古人亦妄肆詆訾云。

題琵琶亭

坐上騷人雖有淚。江邊寡婦不難欺。若使王涯聞此曲。織羅應過賞花詩。寶退錄

李冲元

過姑孰作

琉璃萬頃碧如堆。畫棟連雲戶牖開。晴嶂勢吞三楚盡。暮潮聲帶九江來。六朝寂莫惟流水。孤壘荒涼只舊臺。惆悵騎鯨人已老。夜船空棹月明迴。輿地紀勝

房 偉

訪古

訪古城西話劫灰。子雲相如安在哉。成都萬事變亦盡。惟有石筍雙崔嵬。成都文類

馬 驍

次吳江驛

蘭舟東下泊吳江。暫寄郵亭看渺茫。魯望舊蹤追感歎。季鷹前事入思量。當軒雨過峯巒秀。隔岸風來橘柚香。散髮未能歸未遂。鱸魚時節負秋光。吳江縣志。

柳伯達

題濮公仙洞

昔日何人占弋山。波光嵐翠照淮灣。佩蘭隱者今何在。煉石仙人去不還。綠水渡頭空自急。白雲嶺上至今閑。高峯張令祠邊望。古井荒城半草閒。汝寧府志。

何 泳

送成都護戎韓舍人。

戎符重析引絲言。慎簡長才護外藩。三戟傳榮存北第。二城分職俯南原。嚴墀密侍親中扆。危棧前驅屬左韃。江泊夜聲頻度枕。山行晴碧互迎軒。歌驪暫愴朋遊遠。叱馭都忘暑氣煩。仄席正求詩禮帥。詔歸非久俟東轅。成都文類。

范 祥

送成都護戎韓舍人

全蜀兵符重。霄宸注念勞。臨戎號人傑。分組得時髦。軍府威名播。齋壇世閱高。歷橋題驪馬。揚旆啓三刀。

饗鑠前謀大澄清此志豪忠臣希子貢民頌繼王褒臘市繁千蓋春江漲萬艘浣溪雲粉薄公暇廢援毫
成都文類

蔡若水

若水庫部員外郎

麻源靈豐祠

偶因乞雨到麻源碧澗縈紆亂石閒未省謝公吟賞後更誰乘月弄潺湲麻姑集

王子韶

子韶字聖美太原人舉進士歷禮部員外郎哲宗朝進祕書監拜集賢殿修撰知明州卒

神宗皇帝挽詞

寶餌方噉玉金盤忽造冰周人悲地拆杞國怨天崩杳霧霾陰月鮠膏耿夜燈傷心歌舞妓灑血望西陵
脫屣人寰忽上天投淵果熟會羣仙帳宮雲暝龍爲駕綴幄天寒鶴記年萬里出師輕衛霍一朝行事付
談遷功名半古升遐早獨抱遺弓涕泫然楊公彥齡筆錄

閻伯敏

朝雲峯巫山十二峯之三

山頭行雲自朝朝陽臺暮色連雲霄朝來暮去變雲雨送老行客無回橈

淨壇峯

山頭枝枝竹墀壇。舟子竹枝歌上灘。炷香上廟擲杯琰。但乞如願舟平安。

起雲峯

欽頭孀娜山花枝。羣尾舊纈山麻衣。朝隨雲起採薪去。暮趁女伴穿雲歸。以上全蜀藝文志。

陳純

純字元朴。莆田人。游桃源。與三仙女倡和。

中秋月和桃源夫人

仙源嘗誤到。羈思正蕭然。秋靜夜方靜。月圓人更圓。清尊歌越調。仙棹泛晴川。幽意知多少。重重類楚綿。
詩話總龜。

饒師道

師道。南城人。

遊麻姑山

拂曉旌幢遠訪真。洞中和氣一番新。爭迎謝守同遊客。盡是方平舊會人。山峭亭臺多占月。地靈風物只如春。清歡何必笙簧助。自有紅泉碧澗鄰。輿地紀勝。

閻孝忠

題黃相山

東帶連山接五羊。西分郴水下三湘。路人到此休南去。嶺外千峯盡瘴鄉。錦繡萬花谷。

查仲本

溫泉在重慶府城北。

浴罷臨泉一整冠。令人搔首憶長安。
御湯搖蕩雙龍影。疑是胡兒蒺馬鞍。
錦繡萬花谷。

宋詩紀事卷三十二

錢唐 厲鶚 緝
錢唐 吳城 勘定

許景衡

景衡字少伊。温州瑞安人。元祐元年進士。高宗朝官至御史中丞。遷尚書左丞。罷爲資政殿學士。提舉洞霄宮。卒諡忠簡。有橫塘集。

寸碧亭

杖履尋常行樂處。不論小逕與幽亭。誰知蒼莽千峯外。尙有仙山一點青。東甌詩集。

登仙巖寺

龍穴梅潭抱嶺斜。憶曾同試雨前茶。稍須林壑開雲葉。便倩兒童汲井花。一別仙山空夢寐。三年邊塞走塵沙。合須覓片閑田地。鄰舍如儂有幾家。仙巖寺志。

魯百能

百能。吳興人。元祐元年進士。

醉仙崖。在秦州。舊天水縣。連鳳山。

高倚青冥揖酒星。山崖誰作醉仙形。從來天地爲衾枕。應笑人閒有獨醒。方輿勝覽。

李 廌

廌字方叔。陽翟人。少以文字見知于蘇軾。元祐初。軾知舉。意在必得廌以魁多士。及考章。撥程文。以爲廌無疑。遂以爲魁。既拆號。悵然出院。廌竟無成而卒。有濟南集。

友人董耘饋長沙猫筍。廌以享太史公。太史公輒作詩爲貺。因筍寓意。且以爲贈耳。廌卽和之。亦以寓自興之意。且述前相知之情焉。

節藏泥滓氣。凌空薦俎寧。知肉味重。未許韋編充簡策。已勝絲委誑蛟龍。短萌任逐霜刀重。美榦須煩雪壤封。他日要令高士愛。不應常共宰夫供。師友談紀。

蒼溪漁隱叢話。李方叔稱范淳甫。

爲太史公以其爲國史修撰也。

觀吳正獻真

次公不許畫麒麟。孝宣妙選知名臣。拜公之像想風度。乃是雲臺子顏之文孫。元豐天子建原廟。玉宇萬棟臨端門。累朝名臣儼冠劍。列聖御坐開乾坤。修廊祕殿鎖春色。彷彿音容皆駿奔。相君相業皆元元。旂常彝鼎定書助。儀形在歿侍神考。英氣靈靈凝天關。嗣皇方思服口美。欲考辟公觀列文。君傳茲圖落人世。世人遂得知瑜璠。吾知袁公固有後。能平楚獄竟無冤。召公甘棠猶不伐。衛武之德誰能諉。君不見溫公之像滿人閒。願廣此圖令並傳。聲畫錄。

寒食

千株蜜炬出嚴闈。走馬天街賜近臣。我亦茅簷自鑽燧。煨針燒艾檢銅人。

媿書堂詩話。此詩

善述冷淡況味。

飲襄陽沈氏家醉題侍兒小瑩君帶

旋剪香羅列地垂。嬌紅嫩綠寫珠璣。花前欲作重重結。繫定春光不放歸。墨莊漫錄。

驪山歌

君門如天深九重。君王如帝坐法宮。人生難處是安穩。何爲來此驪山中。複道連雲接金闕。樓觀隱隱橫翠紅。林深谷暗迷八駿。朝東暮西勞六龍。六龍西幸峩眉棧。悲風便入華清院。霓裳蕭散羽衣空。麋鹿來遊虛市變。我上朝元春半老。滿地落花人不埽。羯鼓樓高挂夕陽。長生殿古生青草。可憐吳楚兩醯雞。築臺未就已堪悲。長楊五柞漢幸免。江都樓成隋自迷。由來流連多喪德。宴安鳩毒因奢惑。三風十愆古所戒。不必驪山可亡國。宋文鑑。

遊寶應寺

雨後秋風入翠微。我來仍值晚涼時。山遮日腳斜陽早。雲礙鍾聲出谷遲。故國空餘煙冉冉。舊宮何在黍離離。興亡滿眼無人語。獨倚闌干默自知。詩林萬選。

劉延世

延世字述之。臨江人。公是先生猶子。少有盛名。元祐初。遊太學不得志。築堂講業。名曰抱甕。

自題墨竹

酷愛此君心，常將墨點真。毫端雖在手，難寫淡精神。畫繼。

翡翠

避人忽起鳴衣桁，掠水飛來立釣磯。靜處欲留看不足，翠光點破夕陽歸。後村千家詩。

和孫公索酒

紫貂寒擁鼻，綠蠟細侵脣。蓮燭當時事，壺頭此日春。孫公談圃。

種竹

梅蒸方過有餘潤，竹醉由來自古云。掘地聊栽數竿竹，開簾還當一溪雲。歲時廣記。

句

靜室焚香盤膝坐，長廊看畫散衣行。

孫公談圃劉述之句。

趣尚之高，有如此者。

王履

履字坦翁，開封人。元祐初，從父景琚南郊，恩爲三班奉職。元符上書，編置新州，入黨籍。靖康初，除相州觀察使，扈駕被留，死之。

臨難歌曰：瑄按此歌宋史作李若水。

矯首向天兮。天卒無言。忠臣效死兮。死亦何愆。三朝北盟會編

喻陟

賀岷州太守种誼破鬼章

周后持盈日。戎夷負固年。廟謀期必勝。闢略制於先。不假天山箭。行聞杖杜篇。凱還俘馘獻。圖像有凌煙。
陝西通志

王純臣

賀岷州太守种誼破鬼章

黃塵匹馬捷書來。且喜洮東破虜迴。縱使淮西功第一。未聞生縛七渠魁。
陝西通志

鄭至道

至道、莆田人。伯玉之孫。元祐二年以雄州防禦推官。知天台縣。爲政寬簡。邑人悅服。秩滿。拔戀。因家于台。今廣龍鄭乃其裔也。

劉阮洞

采藥歸來世代賒。洞門方此埽煙霞。碧流清泚弄明月。翠巘高低飄落花。芳草已迷當日路。白雲空想舊人家。自慙不是浮觴侶。謾向人前醉帽斜。
台州府志

王公亮

公亮、字明遠。

句

足穀醫還驗，占桑夢已靈。

王得臣塵史，子弟光輔，鄰臣郡以經行應詔，元祐丁卯，賜第歸，未幾，因出墜馬傷甚，十一日而卒，年四十八。王公亮明遠挽詞云：衆咸推服。

范子正

子正、忠宣公純仁長子。鶚按：范忠宣二子，正平字子夷，次正思字子默。范公稱過庭錄云：六伯祖子正，七伯祖子夷，是子正爲忠宣長子，史不載，故佚其名。

孔林

漢陵玉匣盡，秦山銀海空。干戈百世後，獨究先聖宮。樹有千年色，門無數切崇。盛德包覆載，遂順因所宗。坐若顏闕後，頗聞鄒魯風。撫膺感遺言，零落涕霑胸。過庭錄。

寄季顏師顏謫齊州

歷下故人今何在，音書又已隔寒暄。多年別後紛紛事，何日尊前細細論。忍見風霜摧羽翮，空教江漢瀉詞源。聖朝寬大超前古，卽有恩光照覆盆。

范公稱過庭錄：六伯祖子正，丞相長子，有大才，博學，年甫三十二而卒，有文集百卷，魯直爲跋，其後兵火，集散亡，而魯直集中此跋亦闕。其略云：士之學期于沒而不朽，君子之道百世以俟，聖人故壽天之際，未嘗置言鳧鶴之短長，故物不能齊也。雖然，宥連城之壁，操之甚栗，中道而毀，豈能使人無槩于心哉。范子正，余不及友也。予聞其人，又得其言，皆可傳。後問其所遊，則司馬溫公愛之，問其爲吏，則年三十試吏，單父方使者，剝膚椎髓，取于民以自爲功。子正以歲饑，獨捨單父民錢十九，雖沒可以

不朽矣。或謂子正父祖皆名世士，自宜如此。應之曰：文王割烹，武王征鼎，叔旦舉而用之，管蔡不食，誰強之？則子正賢于人遠矣。元祐二年三月庚午，豫章黃庭堅書。

范致虛

致虛，字謙叔，建陽人。元祐三年進士。徽宗朝爲尚書左丞。靖康中，知京兆府。高宗卽位，終資政殿學士。

汎松江

黛潑峯巒安用染，鏡澄湖面不須磨。已驚張翰鱸如玉，想見西施髻似螺。目斷樓高知水闊，雲開山盡見天多。吾家本是煙波主，好律漁翁一曲歌。吳江縣志。

趙宗印

宗印，汾州孝義人。少爲僧。范致虛令還俗，授河東制置使，提義兵。所向輒下。王師敗於富平，慟哭入華山，不知所終。

題佛刹

七十勞生西復東，鄉關在念感飄蓬。大遼半歲九分盡，全晉一年千里空。周召已亡無善政，蔡童雖死有餘風。華陰乞食商山去，巖谷幽尋四老翁。

封氏編年：范致虛在長安，措置兵馬，招募諸色人，借補官資。宗印本姓趙，汾州人。題詩佛刹云：安撫席益，遣人追回，與語大奇之。薦之致虛，令還俗爲節制參議。宗印以僧爲一軍，謂之尊勝隊，以行童爲一軍，謂之靜勝隊。軍至陝州，攻奪潼關。

劉燾

燾字無言，長興人。誼之子。元祐三年進士，仕爲祕閣修撰。有見南山集。

上庠錄：元祐間，馬涓、張庭堅等四人，擅名太學。時號四俊。劉燾，湖州人，年少亦自負，初補太學生，聞而慕之，以刺謁曰：不識可當一俊否？涓等詭計以困之，曰：每誠當預爲一字，限于程試中用之。善者乃預，旣而程試燾請字涓等曰：第一句用將字，其時策問神宗實錄。燾對曰：秉史筆者，權猶將也。雖君命有所不受，而況其他乎？後果爲第一，聞者服之。因目燾曰：挨屍俊。

同友人汎舟至仁王寺

青秧出水細於鍼，嫩葉初齊綠未深。又是一年春欲盡，杖藜乘興足幽尋。前賢小集拾遺。

題召伯埭斗野亭

地勢如披掌，天形似覆盤。三星羅戶牖，北斗挂欄干。晚色芙蓉靜，秋香桂子寒。更無山礙眼，剩覺水雲寬。

庚溪詩話：此詩題梁開盡得斗野景物。

卷畫溪在長興

竹林深處杜鵑啼，兩岸青青草色齊。欲識人閒真卷畫，朱藤倒影入清溪。湖州府志。

宿華嚴院

夜宿霧山霧，晨茹芝山芝。年來嗜好衰，但與青山宜。登臨意未愜，出戶車已脂。王事有期程，愛山豈余私。

崎嶇田野間。食寢將安之。天寒未落日。稅駕忽在茲。二山已陳迹。茲處尤新奇。翠竹與黃花。一一對山扉。對景自忘言。若與予心期。眠雲飽山色。那得困與飢。山僧喜我來。迎我留新詩。我有愛山癖。山僧知不知。
吳氏詩永

郭三益

三益字慎求。常州人。元祐三年進士。仙居令。靖康閒。湖南安撫。建炎初。同知樞密院事。

題仙居南峯寺藍光軒

山光竹影交寒輝。下有碧浸吹漣漪。沙痕隱隱白鳥去。石聲鑿鑿扁舟歸。芝蘭發香禪味遠。雲霧吐秀人家稀。須知春事不可挽。杜鵑已遶林中飛。
吳禮部詩話

寒巖

道人棲碧山。雲居在空曲。十年海潮音。外物緣已熟。更尋妙高頂。超然具幽築。古木插空青。寒筠抱巖綠。時攜貝葉書。步入深林讀。雲衣冷蕭條。靜對含煙玉。客來境非喧。客去境自足。宵眠護神虎。晝引穿花鹿。庵中三昧語。藥我貪癡毒。何當脫雙屨。藜杖追高躅。
天台山志

馬存

存字子才。鄱陽人。因募徐節孝道德。寓楚州。卒業于其門。元祐三年進士。爲越州觀察推官。有集。

長淮謠節孝先生作淮之水贈之子才答以長淮謠

長淮之水青如苔。行人但覺心眼開。湘江豈無水。魚腹忠魂埋。但見愁雲結雨猿聲哀。浙江豈無水。鳴革

漂胥骸。但見潮頭怒氣如山來。孤臣詞客到江上。何以寬心懷。長淮之水遠楚流。先生家住淮上頭。黃金萬斛浴明月。碧玉一片含清秋。酒花八面歌一曲。淮上百物無閑愁。合璧事類前集

句

可憐一覺登天夢。不夢商巖夢權郎。咏漢文帝困學紀聞

孫發

發字妙仲。元祐三年進士。崇仁尉。

絕句

林亭長夏愛重陰。來引茶甌一散襟。忽去卻來蜂个个。自啼還住鳥深深。能改齋漫錄

太史章

章德清人。元祐三年進士。

題宴坐石

白雲曾罩定中身。石上雲歸不見人。應有山神長守護。松風時爲埽埃塵。吳興藝文補

張壘

壘字子厚。武進人。元祐三年進士。甲科養親不仕。蘇軾薦爲校書郎。不出。崇寧初。賜處士號。卒諡

正素。

蒙齋筆談正素處士清通遠略不爲崖異質鑄最有口才好
雌黃人物於子厚亦無閒言每折節事之稱曰通隱先生

夢中作

楚峽雲嬌宋玉愁。月明溪淨印銀鉤。襄王定是思前夢。又抱霞衾上玉樓。紫薇詩話。

送呂子進

籬鷓雲鵬各有程。匆匆送別未忘情。恨君不在篷籠底。共聽蕭蕭夜雨聲。宋文鑑。

宗澤

澤字汝霖。婺州義烏人。元祐六年進士。靖康元年。知磁州。勤王兵起。康王以澤爲副元帥。建炎間。累遷延康殿學士。京城留守。兼開封尹。連結諸路義兵。方剋日渡河。力請上還京。爲黃潛善。汪伯彥所沮。憂憤疽發背。卒。贈觀文殿學士。諡忠簡。有集。

華陰道上二絕

煙遮晃目初凝雪。日映爛斑卻是花。馬渡急流行小崦。柳絲如織暎人家。
管茅作屋幾家居。雲碓風帘路不紆。坡側杏花溪畔柳。分明摩詰輞川圖。

詩說紀事。楊用修云。余嘗

見石刻宗忠簡此二絕。

至洛

都人士女各紛華。列肆飛樓事事嘉。政恐皇都無此致。萬家流水一城花。以上宗忠簡公集。

朱之純

之純、華亭人。元祐六年進士。

自題谷陽園湖齋

平湖十頃水汪洋。得意茅齋且屈藏。園種小桃今結子。池栽翠芰更聞香。六龜已兆千年瑞。雙鶴看呈八月祥。居此翛然忘世味。此心尤嬾去龍陽。自注云：湖上治園於桃根。獲古龜六枚。其小如錢。雲間有仙鶴觀。每歲中秋夜。有仙鶴下觀。因得名。今余治園谷水鄰其地。至元嘉禾志。

歐陽闢

闢字晦夫。桂州靈川人。從學於梅聖俞。元祐六年進士。任石康令。

困學紀聞：歐陽闢字晦夫。桂州人。東坡南遷至合浦。闢時爲石康令。出其詩稿數十幅。注坡詩者以爲文忠之族。非也。

寄京師畫院待詔王公器

有唐畫癖唯王維。自謂前身應畫師。君今畫祖躡神奧。權敵造化爭分持。君今畫品到神處。祖身再生何異疑。宋唐相距更累代。典型尙在寧少墜。正恐聲名出祖上。況早力學工文詞。曩吟佳句每記憶。一字可買堪貧羸。天地兩閒府萬物。物物圖繪略不遺。飛潛動植出把握。臻幽造妙窮豪絲。顧堂陸室牆數仞。直發門鏑深探窺。人間流落已足貴。況蔑國手展設施。景靈九殿初締構。九屏博選丹青奇。容旨屬君亟應。

命牡丹孔雀他無爲。雕闌醜石耍傑怪。議敢其事纔郭熙。屏間散布十八種。爛然逼真生羽儀。南徐西趙不復數。宸翰點賜收高貲。慈聖光獻升仙際。眸容將貌精者誰。都城名輩皆縮手。君特奉詔趨宮闈。重瞳背淚親睽矚。一筆立就難動移。上心中愜愈增慟。金口由此皆歎咨。禁庭內外日唯肖。進秩一等躋官資。聖表神蹤闕天上。盛美空傳萬一知。考牧一圖最卓絕。羊牛爾牧俱來思。羊羣三百牛九十。角耳纖溼訛寢宜。聚無鬪觸形甚澤。馴擾畢來肱以麾。地從善利畜得所。或□升降或飲池。牧人負餼荷蓑笠。可禦暑雨仍禦飢。薪蒸用足尙餘力。博取禽獸雄與雌。紛紛事物已曲盡。亡一不合無羊詩。豐年富庶義亦備。舉目如在宣王時。前視未有後鮮儷。獨步詎官容並馳。不見古人豈君恨。但恨古人不見之。琅玕碾軸蜀錦標。賢王寶祕輕瓊琦。鉅公名卿競題跋。鋒起議論誇淵微。我始鄰居久結好。草廬對雪傳孱衰。喬松瘦竹秀掩映。梅花半拆臨澗湄。素琴橫榻書滿架。綠瓶注酒傾椰卮。鑪灰不識炭火爐。坐擁緜褐裘接離。筵前凌亂舞六出。筆凍硯底方生澌。女奴瞰窗不避冷。青裙赤腳丫髮垂。我無泉石營此景。君畫雖巧令人悲。十年遠別如夢寐。此圖出處嘗自隨。去春京國重會合。愈見極藝觀忘疲。矜我孜孜嗜益篤。爲作秋江四鷺鷥。芙蓉照波蔭寒菊。芰菱獵獵西風吹。感君贈我瀟灑意。意勸把釣江湖歸。煙瀾素闊無寸尺。今縱見勸歸已遲。君嗟五十眼力減。將亦謀隱長掩扉。我擬更求冬月景。知君老筆尙能揮。聲畫集

楊 拙

拙字持正。閩人。元祐六年進士。終建寧軍節度書記。入黨籍。

玉泉院荔支軒

曾觀荔支圖。幾費丹青妝。能紅能紫亦能綠。不能寫作天然香。曾讀荔支譜。品品堪第一。較量滋味論高低。大抵聞名不聞實。我疑眞宰推化工。安排百果分番紅。杏梅桃李不足數。先教碌碌隨春風。錦囊玉液相渾淪。百果讓作東南元。別有眞香與色味。一時分付荔支軒。廣羣芳譜

秦觀

觀字少章。觀弟元祐六年進士。調臨安簿。日啓案。宋史。觀弟觀字少章。觀字少儀。天社任瀾注。陳後山詩云。秦觀字少章。從蘇公學。任瀾宋人。當無誤。今從之。

和王直方夜坐

幃幔高深夜漏長。頗從詩酒傲冰霜。燭花漸暗人初睡。金獸無煙卻有香。

王直方詩話。少章初登第。成親後。和余夜坐詩云。讀者無不笑其貧富之頓異。

呈東坡先生

十里薰風菡萏初。我所至有西湖。欲將公事湖中了。見說官閑事亦無。

鶴林玉露。東坡守杭守穎。皆有西湖。故穎川謝表云。入參兩禁。每玷北扉之榮。出典二州。輒爲西湖之長。秦少章詩云云。

鮑慎由

慎由字欽止。處州龍泉人。元祐六年進士。徽宗朝。除工部員外郎。歷知明海二州。卒。有夷白堂小

集

雨餘

礎潤雨欲作。好風每見先。蕭蕭清入簾。合我心灑然。閉門倦永夏。枕書日昏眠。快此風雨餘。端如濯飛泉。盆山有佳趣。草木更幽妍。井華養文石。香篆橫雲煙。俯仰方丈閒。勝事亦可憐。永懷觸熱子。我勞良獨賢。

宋文鑑

謝傳神蔡景直

馳譽丹青有古風。筆端及我未宜蒙。雲臺麟閣遙相望。枉寫褒公與鄂公。能改齋漫錄

夜坐

萬卷堆中種眼花。睡魔亦厭夜深茶。平生不草長門賦。豈有黃金送酒家。後村千家詩

與鄭公華自胸山鄰舟行

舟行有後先。相去能幾許。鏗轟金鼓聲。見面不得語。水花來幽香。岸柳過疎雨。登艫各乘風。解帆會聯浦。閑攜小龍團。睡起就君煮。楊慎清暑錄

周行已

行已字恭叔。永嘉人。師事程伊川。登元祐六年進士。官至祕書省正字。有浮沚先生集。

絕境亭

雲橫絕塵境。峻嶒若繩削。羣山列培塿。衆星分脈絡。下瞰萬瓦居。縹緲見樓閣。松風發天籟。冷然衆音作。

晶晶天宇清。塵襟一澄廓。東甌詩集。

周之深

之深、長興人。元祐六年進士。

遊清果寺

西郊出郭未十里。寺在白雲深處藏。僧爲愛閑長閉戶。客來無路自迴廊。近松古瓦落夜子。傍水小池生暮光。指點依稀飯籬水。不知何處問興亡。吳氏詩水。

鄭居中

居中、字達夫。開封人。舉進士。徽宗朝。歷少保太宰。兼門下侍郎。兼知樞密院事。封燕國公。進太保。薨。贈太師。華原郡王。諡文正。

挽顧學正公甫

可惜病相如。誰尋封禪書。雙親千里外。一葉九秋餘。風露翻歸旆。塵埃鎖故廬。虎丘山下路。會葬有鄉車。廣文官舍冷如冰。幾歎朝衫脫未能。忽買春田埋玉地。猶懸絳帳讀書燈。佳名空綴仙都石。妙偈爭傳海寺僧。一幅粉旌春水漫。惜君誰不涕奔騰。中吳紀聞。

崔鷗

鷗、字德符。雍工人。徙陽翟。元祐中第進士。元符末。上書入邪等。坐廢三十年。靖康禡。擢右正言。以疾乞解官。除直龍圖閣。提舉嵩山崇福宮。卒。自號婆婆先生。有婆婆集。

雪溪齋日記。德符詩所謂。食鯨老氣橫九州。廬山詩云。遙知金刹近林表。鷗幡尾。滕王閣詩云。小艇元從天上來。白雲自向杯中落。潁昌富文物。崔鷗陳恬猶爲下士。

郡齋讀書志。鷗長於詩。

清婉敷腴。有唐人風。

鄱陽詩

記得詩狂欲發時。鄱陽湖裏月明知。無人爲覓桓伊笛。自卷秋蘆片葉吹。過庭錄。

會節園梅花下作

去年白玉花。結子深林閒。小憩藉清影。低顰啄微酸。故人不復見。春事今已闌。繞樹尋履迹。空餘土花斑。

墨莊漫錄。德符監洛南稻田務。時中官容佐掌宮鑰。于洛郡僦事之。唯恐不及。獨德符不肖見之。容極銜之。德符一日送客于會節園。時梅花已殘。與客飲梅花下。已而容奏陳以會節園爲景華御苑。德符初不知也。明年暮春。復騎羸馬從老兵。徑入園中。梅下哦詩。徘徊而去。次日容見地有馬跡。問園吏。以崔對容。遂劾奏鷗。徑入御苑。以此罪廢。

秋日卽事

秋草門前已沒韉。更無人過野人家。離離疎竹時聞雨。淡淡輕煙不隔花。

黃州道中

莫愁微雨落輕雲。十里長亭未墊巾。流水小橋山下路。馬頭無處不逢春。以上墨莊漫錄。

早秋雨霽圖

我離蜀山來，赤日走東州。奇峯作眼想，一過神已留。翩翩宋公子，新詩藹風流。丹青見新韻，蕭灑出林丘。依微萬里遙，曠朗一雨收。高雲杳塞開，縞日明華秋。風翫暎山青，眇眇行李幽。得非送將歸，色有離別憂。念我山海僻，鍼砭不爲瘳。目看孤鴻飛，心已麋鹿游。吾兒能扶犁，此轅便可投。勿言尺寸許，是中有菟裘。

與叔易過石佛看宋大夫畫山水

霜落石林江氣清，隔江猶見暮山橫。箇中只欠崔夫子，滿帽秋風信馬行。

觀黃筌畫花

蒼顏白髮我雖陳，見了青紅幾度新。更向黃生毫末裏，全家看盡劍南春。淺淺紅顏與白腮，臥枝斜葉抱新開。何人與作春風面，詎得蜂兒日日來。

和老人觀牧圖

作官畏人嘲，胡孫騎牧牛。卻離大江水，還家整歸舟。還家此計不可移，此樂勿令兒輩知。行歌帶索拾遺穗，耳靜不復聞征鼙。功名亦妄爾，吾生去此將何之。趁此青草長，自牧牛與羊。不減九十頭，何翅三百強。沙平水淺南山下，千角萬蹄如此畫。牛腰吹笛遡秋風，不問人閒矍鑠翁。以上聲畫集。

子石硯

石家有兒玉含品，噓爲雲氣吸爲晴。純精與之相感并，孕育萬狀流千名。黃昏鬼泣不忍聽，且爲白鵝換

黃庭。硯箋。

海棠

渾是華清出浴初。碧綃斜掩見紅膚。便教桃李能言語。要比嬌妍比得無。海案譜。

潛心齋以上三首寄漫叟。

雙扉掩餘香。一榻下涼幔。前人嗟不死。萬古曠黃卷。時時擷英華。一一詣微遠。鼎食姑置之。此味良不淺。

止遽軒

我如萬斛船。歲久腰已嬾。誰能逐相師。終日問手版。去謀一寸安。輒被三尺挽。憐公謝蠻觸。鼓臥旗亦偃。

丈室

此家英妙姿。玉雪照冠冕。新詩一何似。鸞鵠見蕭散。躡屐往從之。寧復念重趼。以上苕溪漁隱叢話。

早春偶題日齋按。此詩又見林之奇拙齋集。

寒風淅瀝鳴枯葦。小鴨睡殘猶未起。更教細雨結春寒。坐聽蕭蕭打窗紙。石盆養蒲已抽翠。雕斛栽花先弄紫。擁爐閉閣賦幽香。未怕春冰生硯水。

題續溪雪峯樓

題詩最高處。不爲待人看。記著今朝勝。山明松雪寒。以上宋文鑑。

婆娑園在郟縣西鵬居此。

晚禽噪竹百千翅。殘菊橫枝三兩花。好在山園養衰疾。風波不到野人家。河南通志。

黃葆光

葆光字元暉。黟縣人。賜進士出身。崇寧初。以薦爲太學博士。擢侍御史。守處州。

贈孫至豐

勸農因到好溪頭。把酒相看憶舊遊。三十年來如一夢。可憐空負釣魚舟。

蓉塘詩話。麗水孫薪至豐。元祐中以明經擢第。授荆門軍教授。不赴。質性清介。絕意仕進。與黃葆光爲太學舊游。宣和六年。黃出守處州。薪不屑詣郡謁。見黃約以勸農日會于洞溪僧舍。至期薪以扁舟來會。黃贈詩云云。

晁詠之

詠之字之道。說之從弟。以蔭入官。復登進士第。又中宏詞科第一。除河中教授。元符上書。罷爲京兆錄事。以朝請郎提舉崇福宮。卒。有崇福集。

曲洧舊聞。崇寧初。凡元祐子弟仕宦者。並不得至都城。晁之道自洛中罷官回。留中牟驛。累日以詩寄京師姻舊。其結句云。一時雞犬皆霄漢。獨有劉安不得仙。語傳于時。讀者美之。

壽星寺

石磴插青漢。禪宮入渺冥。歸雲侵客坐。流水亂松聲。天近月逾白。竹多山更青。從來正整志。不獨付孫登。
咸淳臨安志。

杭州思歸

正整情無盡。田園興有餘。何當厭澤國。不柰憶吾廬。庭戶草應長。江山木已疎。何時整歸棹。八月洞庭湖。
杭州府志。

句

旌旗太乙三山外。車馬長楊五柞中。柳外雕鞍公子醉。水邊紈扇麗人行。紫微詩話。

岑象求

象求字巖起。梓州人。終寶文閣待制。入黨籍。

遊定林院

野闊蓮宮迴。樓臺半倚山。地連巴峽近。門對濮溪灣。柏徑松煙溼。巖房雨蘚斑。白雲邀客住。明月伴僧閑。經梵喧譁外。香燈杳藹閒。勝遊或邂逅。危構喜躋攀。世路長何極。塵心久欲還。輜車正催發。緩步出重關。全蜀藝文志。

程頤

頤字正叔。顯弟。元祐初。以薦授崇政殿說書。紹聖中削籍。竄涪州。徙峽州。卒。入黨籍。學者稱伊川先生。嘉定中。追諡曰正。封伊陽伯。從祀宣聖廟庭。有伊川集。

陸渾樂遊

東郊漸微綠。驅馬欣獨往。舟縈野渡時。水樂春山響。身閑愛物外。趣逸諧心賞。歸路逐樵歌。落日寒山上。河南府志。

司馬樞

樞字才仲。溫公姪孫。元祐中。舉賢良科。調錢唐尉。有夏陽集。

郡齋讀書志才仲喜爲宮體
詩故世傳其爲鬼物所崇

閨怨

銷盡輕寒不自禁。新愁唯向靜中深。尋常曾入三更夢。咫尺空論萬里心。人去鳳幃雲漠漠。雁回珠箔日沈沈。春風洞口花常在。只許劉郎一度尋。前賢小集拾遺

遊富陽蛻龍洞憩池上

梅萼春前破。松髯雨後滋。石崖鳴野鶴。竹塢竄香狸。山腳重重轉。溪流活活遲。殷勤窺洞府。又到濯龍池。

遊千頃山

在昌化縣。上有龍潭。廣數百畝。禱雨輒應。

欲爲龍池遊。束裝戒虀食。雞鳴天未曙。呼童蠟雙屐。縈迴溯寒溪。确犖凌亂石。迢迢萬丈嶺。宛轉蒼龍脊。山高吐朝氣。恍不辨咫尺。俯聽雷雨聲。仰逐猿猱迹。委蛇度花塢。綠淨草可席。喜如出籠檻。身輕飛鳥捷。不辭雙足困。遠探蛟龍窟。傳聞此山頂。舊有滄海色。邇來三十年。潭湫變枯荻。至今應江潮。尚有鷗鷺集。至理竟未解。對之空太息。不如西湖遊。揮篙汎瑤碧。以上咸淳臨安志

遊九鎖

撩花踏水細尋香。閑逐孤雲入翠岡。九鎖已深看更好。七人相對話應長。百年空向塵埃老。五月聊乘洞府涼。可笑潛川狂道士。未逢玉室與金堂。洞霄詩集

洛春謠

洛陽春水揚春風。銅駝陌上桃花紅。高樓疊柳綠相向。綃帳金鸞香霧濃。錦裘公子五陵客。拳毛亦免雙蹄白。金鉤寶玦逐飛香。醉入花叢惱花魄。青蛾皓齒別吳倡。梅粉妝成半額黃。羅屏繡幕圍寒玉。帳裏吹笙學鳳皇。細綠圍紅曉煙溼。車馬駢駢雲櫛櫛。瓊蘂杯深琥珀濃。鴛鴦枕冷珊瑚澀。吹龍笛。歌白紵。蘭席淋漓日將暮。君不見灞陵岸上楊柳枝。青青送別傷南浦。古今詩統

遊佛日山淨慧寺

石冷苔生暈。風高竹度涼。道人何處去。春色半滄浪。鐵網珊瑚

句

身既事十主。女亦妃九龍。

懶真子集。同州登城縣。有九龍廟。只一妃耳。土人云。馮瀛

王之女也。司馬才仲戲題詩云。過客讀之。無不一笑。

司馬械

械字才叔。櫛弟。登進士第。嘗應賢良。以黨錮不召。有逸堂集。

郡齋讀書志。才叔詩雖

纖豔。比其兄稍莊雅。

妾薄命

自注。近有里中舉子棄其妻者。戲爲賦之。

二月東風初不惡。後園桃李先春落。高堂去婦對花愁。君恩非輕妾命薄。憶昔三星光在天。煌煌車馬朱

門前結襦。幸得事君子。願託絲羅千百年。履痕纔徧君家地。相看已覺君心異。門外新歡一破顏。室中舊愛雙垂淚。妾心比玉自堅貞。君眼如星到處明。女子睽離秦山重。丈夫棄置鴻毛輕。莫誇綠鬢紅顏好。女色由來不長保。君不見灞上鑾輿被禊回。阿嬌已向長門老。

春晚獨遊鳳林園

紅英亂點綠苔錢。林影扶疎翠可憐。飛蝶惹殘花上露。戲魚搖碎水中天。金羈不見尋芳馬。蘭橈空停載酒船。送盡春歸人亦去。鶯啼花發又明年。

江干小雪

楓落吳江小雪天。三三兩兩捕魚船。蹇驢瘦馬何方客。眼看風波不著鞭。

以上前賢小集拾遺。

趙鼎臣

鼎臣字承之。衛城人。自號葦溪翁。元祐進士。宣和中。以右文殿修撰知鄧州。召爲太府卿。有竹隱畸士集。

二蘇賢良硯

不見東坡老弟昆。年年曲阜履猶存。計功何必悲周鼎。會使詞林百怪奔。

硯箋。

句

詞源江海浩奔忙。句法風騷森出入。古來此景歎經歲。今夜誰家不倚樓。

中秋待月。以上雪浪齋日記。

馬珣

珞合肥人生元祐閒。

華嚴寺此君亭歌次韻信安毛漸

八座鎮俗光文翁。政閑鳴珂晚丁東。邀賓尋勝遇郊郭。最愛檀欒森梵宮。虛簷新敞小亭峻。幽徑靜掩閑門重。脩枝應待丹鳳集。勁節只許青松同。根蟠南借秦淮潤。影疎北露鍾山峯。乃知景淡有真趣。何必花豔羅雕櫳。放懷喜遂開口笑。傳杯不覺酩顏紅。談圍浩浩真意得。碁戰紛紛嘉興濃。人生條忽猶逆旅。少壯易失今衰容。得喪何須論塞馬。用捨寧復驚鬻桐。逍遙齊物慕蒙叟。澹泊無生師大雄。英游幸陪諸公後。傾蓋夙已披懷胸。芝蘭亦既序蒙益。切磋願使協子中。佳章每出連戰勝。格調綽有先賢風。顧予酬和不量力。嗟哉寸莛撞巨鐘。景定建康志

梁君貺

春帖

東方和氣斗回杓。龍角聲中轉紫霄。聖主問安天未曉。求衣親護玉宸朝。宋藝圃集

吳則禮

則禮字子副。富川人。中復子。以父澤入仕。晚居豫章。自號北湖居士。有北湖集。

簡田升之時升之赴金陵

建業流風端可憐。石城江色曉鮮鮮。鳥窺漢節梅花底。雨溼柁樓春水邊。霜髮讐書有東觀。錦囊覓句屬南天。枯腸不飽大官肉。我種芋魁今年。宋文鑑

絕句

華館相望接使星，長淮南北已休兵。便須買酒催行樂，更覓何時是太平。滿船買了洞庭柑，雪色新裁白苧衫。喚得吳姬同一醉，春風相送過江南。

楊誠齋詩話尤延之

嘗誦吳則禮此二詩

仰

忻、忻
忻字大旣。吳興人。徙永嘉。以孝行稱。元祐中。郡守郝亶奏聞。大觀二年。敕贈將仕郎。有永嘉百題詩集。

南湖

酒旗翻野色。漁棹弄秋光。百里荷花境。曾圖入帝鄉。溫州府志

林放

放字達本。仙居人。元祐中。將上禮部。以親死。廬墓不果。遂築草堂於東山隱焉。左譽銘其墓。

東山高臥

三間老屋青山幽。清風灑灑寒颼颼。脫巾坦腹臥其下。此身直與淵明儔。老松飛翠落夏簟。六月不暑涼於秋。人生百年一夢幻。世閒萬事空悠悠。一聲野鶴忽驚醒。山爐活火茶煙浮。

贈琴僧

霜林凋落雲影垂。朔風獵獵鼓寒威。偶來禪房訪虛寂。上人爲我彈金徽。此調悠悠混千載。今日忽聞一
嗟咨。上人所彈不在指。我亦非于耳聽之。霜天玉磬敲清曉。夜月秋聲動翠微。舉世紛紛愛箏筑。寂寥古
意誰能知。過門不知鍾期子。慎勿汗漫調朱絲。以上台州府志。

范純粹

純粹字德孺。仲淹第四子。以蔭仕。元祐中。歷寶文閣待制。知熙州。紹聖中。入黨籍。徽宗朝。鄂州安
置。

句

慣處賤貧知世態。飽諳遷謫見家風。

風月堂詩話。范德孺崇寧之貶。與山谷倡和。

甚多有一聯云云。可以識范氏之名節矣。

林旦

旦字次中。希之弟。第進士。元祐中。歷太僕卿。河東轉運使。

曲水亭 治平中宰定海作。

巖溜抱山急。傳觴何太頻。迴看野客醉。還笑濁醪醇。漢曲人方遠。蘭亭跡易陳。勞生無足校。酣放卽天真。
射圃

百步開新圃。彎弧注采正。尊壘供樂事。金鼓疊歡聲。敏手徒爲妙。中心自要平。何人能舉觶。觀堵定縱橫。

以上乾道四明圖經。

蘇元老

元老字在廷。眉山人。東坡從孫。舉進士官太常少卿。坐元祐黨累罷。提點明道宮。卒。有九峯集。

懷安官舍病起九日作

籬菊今年折最繁。繞叢新朶上雕盤。病知嘉節霜風冷。喜對高堂骨肉懽。久廢笑歌慵飲酒。只聞兒女勸加餐。如何猛下藜牀去。又逐鷓鴣振羽翰。古今歲時雜詠。

冤亭卞

留題靈巖古詩十韻

石刻在泰山。

屈指數四絕。四絕中最優。此景冠天下。不獨奇東州。夜月透巖白。亂雲和雨收。甘泉瀉山腹。聖日穿崖頭。大暑不知夏。爽氣常如秋。風高松子落。天外鐘聲浮。祖師生朗右。古殿名般舟。人巧不可至。天意何所留。老生笑相語。此事常窮求。移出蓬萊島。待吾仙子遊。元祐庚午三月二十八日。東武王璞書求古錄。

蔡安持

安持字資中。睢陽人。

題靈巖寺

四絕之中處最先。山圍宮殿鎖雲烟。當年鶴馭歸何處。世上猶傳錫杖泉。元祐壬申十月。求古錄。

李周

周元祐初直龍圖閣充陝西轉運使。

華清懷古

胡雛鐵騎正縱橫。環上羅衣血染腥。蜀道歸來應悔禍。香囊特地泣娉婷。
吾家居處本關西。舊記遺蹤事不迷。屢過華清無一字。恐人笑我不留題。
元祐四年春二月。驪山刻石。

